



Հարգելի՛ ընթերցող.

ԵՊՀ հայագիտական հետազոտությունների ինստիտուտը, չհետապնդելով որևէ եկամուտ, իր կայքերում ներկայացնելով հայագիտական հրատարակություններ, նպատակ ունի հանրությանն ավելի հասանելի դարձնել այդ ուսումնասիրությունները:

Մենք շնորհակալություն ենք հայտնում հայագիտական աշխատասիրությունների հեղինակներին, հրատարակիչներին:

Մեր կոնտակտները՝

Պաշտոնական կայք՝ <http://www.armin.am>

Էլ. փոստ՝ info@armin.am

Ա Պ Ր Ի Լ 24

Այս հաստիքը լոյս է տեսնում թեհրանահայ
ազնուասիրտ ազգային պրն. ԹՈՎՄԱՍ ԹՈՎՄԱՍ-
ԵԱՆԻ նիթական աջակցութեամբ, ի յիշատակ իր
ծնողների՝ ՅՈՎՀԱՆՆԷՍ և ՅԱՍՄԻԿ ԹՈՎՄԱՍ-
ԵԱՆՆԵՐԻ:

Այս առթիւ յայտնում ենք մեր ջերմ շնոր-
հակալութիւնները յարգելի նիհրատիւն:

ԵՐԿՈՒ ԽՕՍՔ

1965 քաղաքը երկու կաթողիկոսների սրբատառ կոնդակներով յայտարարեց Բիրաուր Նահասակների յիսնամեակի տարի՝ երկու կաթողիկոսներն էլ պատշաճ ձևով բնութագրեցին մեր մեկ միլիոն նահասակների ոգեկոչումը և համայն հայութեան կողմից ուղղեցին վայելուչ կերպով սգահանդեսներ կազմակերպելու և հրապարակային դասախոսություններով, ինչպես նաև Եղեռնը իմաստաւորող հրատարակություններով անհակեցիկ կապ ստեղծելու նահասակների յիշատակի հետ, ինչպես նաև ողջ հայութիւնը արթուն պահելու ազգային իրաւունքների ստացման և պատշաճ ձևով հնձապնդման նախապահի վրայ՝

Արդարեւ, յիսնամեակի տոնակատարութիւնը լաւագոյն հանգրուանն է յիսուն տարիների ընթացքին ձեռք բերած մեր նշանումների փառասօնը կատարելու և ազգային դասի լաւագոյն ձեւաւորման, բանաձեւումի և հնձապնդումի համար՝ Հակառակ այն իրողութեան, որ յիսնամեակի ոգեկոչումը և հայկական գասը միմեանց հետ սերտ կապ ունենալով հանդերձ անջատ հարցեր են, նկատի ունենալով որ յիսուն տարիներ առաջ արդեն իսկ գոյութիւն ունէր հայկական խնդիրը, սակայն և այնպէս սխալեցիկ առիթ է հաւաքական աշխատանքով, իմաստուն ղեկավարութեամբ, օտար եղանակներում վերջիւումներ կատարելու այն դառն իրողութիւնների մասին, որոնց ենթարկեց ողջ հայութիւնը, և այդ կերպով միջազգային կացութեան մէջ

արքուն վիճակի մէջ պահելու մեր արդար իրաւունքները:

1965 թուականի տնտեսաարտադրութեան համար արդէն իսկ բոլոր հայաստան տարածքում յանձնարարներ կատարելու կոչւեցին, պատճառն էլ վայելուց ձեռքով սպահանդէսներ կազմակերպելու համար: Ամէն կողմ դասախօսութիւնների եւ հրատարակութիւնների միջոցով տնտեսական գործի լուծուցին ձեռնարկ անձինք: Հայկական Դատն ու Եղեռնի պատմութիւնը ծանօթացրելու համար մասադ սերնդին: Նոյն նպատակով մենք էլ մեր համեստ բաժինն ենք բերում, ժողովրդական խաւերին ծանօթացնելու համար: Մենք Եղեռնը իր ընդհանուր գծերի մէջ, Մենք աշխատել ենք առաւելաբար նահատակների ոգեկոչումը կատարել եւ նրանց յիշատակը միշտ վառ պահել՝ մեր հոգու եւ նրանց միջեւ կենդանի կապ ստեղծելու համար: Անուշ, այլ հրատարակութիւններ աւելի վաւերական կը լինեն եւ ըստ էութեան հարցը կը բացատրեն ժողովրդական լայն զանգուածներին եւ պատճառն առաջարկութիւններ կանեն: Մենք նման յաւակնութիւններ չունենք: Մեր արածը խորի մէջ ժողովրդական ձեռնարկ է, վերջիւսումներ կատարելու այդ բոլոր դառն իրողութիւնների եւ մեր բազմաթիւ կորուստների մասին:

Անուշ, հետաքրքրական պիտի լինէր, եթէ երբեք հնարաւոր լինէր պատկերել, թէ անցնող յիսուն տարիների ընթացքում ի՞նչ նւաճումներ կատարեց Սփիւտում ցրած հայ ժողովուրդը եւ այդ նւաճումները պիտի յասկանէր հայ ժողովրդի փառասունը: Աւելի հետաքրքրական պիտի լինէր, եթէ երբեք հայոց մամուլի սիւնակներում «Ազգային կենտրոն» եւ «Թուրք մամուլ» տարազի ներքոյ երեւացող արձագանգի համեմատական հրատարակութիւնը կատարէր անցնող այս վերջին յիսուն տարիների ընթացքում:

Այս կերպով, համեմատական ցուցակներով ի յայտ կը գային երկու ազգերի հոգեկան, մտային եւ բարոյական արժանիքները, ինչպէս նաեւ մեր կատարած նւաճումները: Վերջիւսում աշխատանքը հետաքրքրամբ կարելի է կատարել, թերեւ լավ արտասահմանեան մամուլի հաւատարմութեամբ:

Յուսով ենք, որ մեր այս աշխատանքով մեր համեստ բաժինը բերած կը լինենք մեր թեմում կատարուող յիսունամեակի ոգեկոչումի աշխատանքին եւ ժողովրդին ծանօթացրած կը լինենք յիսուն տարիներ առաջ կատարած դառն իրողու-

թիւններին:

Հացի, ողբի երգեր չենք հիւսում այլեւս. փառաւորելու եւ հպարտանալու սխալելի իրողութիւններ եւ երեւոյթներ մեծապէս ամրապնդում են մեզ հայրենիքի միջեւ հեռաւոր գաղութները, սպասուող փառասունի վերածելու համար:

Ապագայի վառ յոյսերով, սխալելի արեւելոյսների հեռանկարով ոգեկոչում ենք յիսունամեակը:

Անպայմանօրէն, մի օր, մենք էլ Արարատին կը նայենք ոչ թէ «նայելու եւ անցնելու» համար, այլ այնքան մնալու, մեր պատկերական հողերի ամբողջութիւնը հրեւագին ըմբռնելու եւ հայկազենեան դրօշը պարզելու համար:

Նոր Արարատ, նոր տապան, մէկ միլիոն հայերի արեւմտեալ քարտուն:

ԱՊՐԻԼԵԱՆ ՔՆԱՐ

Զարկին ներքեւ ուռնակներուն՝
Յիւղոյթեան կը վերբերուի
Անցեալը մութ մեր պատմութեան,
Հարուածիս սակ կը պատճառի
Սուգերն ամբողջ մեր անցեալին,
Որոնց վրայ ժամանակին
Թանձր փոշին ի զուր կ'իյնայ
Ու կը բաժնէ իմ աչներէս:
Հարուածիս սակ մարմին կ'առնեն
Արիւնահոտ եջերը մեր,
Որոնց վրայ աչքն արցունքոտ
Կը սարածուի մեր Արարչին
Ծածկոց մ'ինչպէս սրկիհին շուրջ:
Նայուածիս սակ կը բլրանան
Քանկերն անթիւ մեռելներուն,
Որոնց վրայ կը ծածանի
Դո՛ւ մ'ինչպէս պատահողը վեհ
Հազար-հազար վրեժներուն,
Նայուածիս սակ արդ կը ցցուին,
Արիւնոսած սիրտերը մեր

Դիցազներուն, որոնց շուրթին
Դնո կը հնչէր երգը հնչել,
Կանչը արի ազատութեան,
Զարկներուն հետ ուռնակներու
Կ'ըլլամ մօտիկ մեր անցեալին,
Որուն մէջէն համերգ մ'ինչպէս
Կու գայ ինծի կեանքը սրխուր,
Կամքը պողպատ մեր պապերուն,
Կարծեք ըլլար անցեալը մեր՝
Քրնար մը մեծ, լարերն որուն
Կը հեղեղեն ճիչերն անհուն
Մեր հին ռու նոր մեռելներուն,
Ու հարուածիս սակ կ'արթնան
Հազար վրէժ, հազար իղձ,
Որ դարերով եղան զայրոյթ
Ու սփոփանք մեր պատմութեան:

Ականջ դրեք,
Արդարութեան, խաղաղութեան,
Դրօշներուն նայող մարդեր,
Գարուն եր, հարսը շենդ
Բընութեան, նրբ կը ծաղկէին
Արևերը ձեր, լի արեւով,
Ու սիրտերէն կ'անցնէր կեանքի
Դողը կախարդ նման հողին,
Որու կողին կը հասուննար
Ոսկին հացին,
Ծառերն ամբողջ կը կախէին
Պրտուղն իրենց նրակներուն,
Երդիփներէն երգը դիւթել
Կը բարձրանար երկինքներու,
Մարդեր զըլարք կը փաղէին

Ցանուած ոսկին երջանկութեան.
Սեղանին շուրջ բաժակ-բաժակ
Կը պարպուէր դիւթել գինին,
Ու կը բերէր հետեանքն անոյշ
Վըրան բոլոր մեղկ սիրտերուն,
Ու երփներանգ բընութեան մէջ
Սերով, խիւղով կեանքը կ'անէր:

Անդին սակայն, Տիեզերքի
Մէկ անկիւնին,
Ազգ մը ամբողջ կը շարդուէր
Ճիրանին սակ մարդ-գազանին,
Գազանացած բազմութիւններ
Խիղճը իրենց յանձնած սուրին,
Բլուր-բլուր կուսակեցին
Գանկերն անթաղ մեռելներուն,
Ճիչերն աղի լքեալներուն
Սուրին՝ սակէն, հուրին մէջէն
Բարձրացան վեր աղերսելու
Ենովային աջը զօրեղ,
Դուռն եր սակայն, փակ երկինքին,
Որու ետին դնո կը նիւրհէր
Գութը ոսկի մեր Արարչին,
Մանուկ ու ծեր երկու սնուէ
Եղան նոխազ. յանցանքն իրենց.
— Հայ են ծընած:

Խըլեակներու կարաւաններ
Անապատի կրակին մէջ,
Ու սուրին սակ բունաւորին
Կը ճանջուէին իբրև դալար
Ճիւղեր ծառի կըրակին դեմ:

Երկիր մ'ամբողջ կը խնդրուէր
Լիննուն մէջ արիւններու,
Երկիր մ'ամբողջ կ'ամայանար,
Գազաններուն իսկ անյարմար
Աւերակներ կուսակելով,
Նորէն սակայն կը փերուէր
Սուրն արիւնոս թեւամփին,
Ապրիլին մէջ, կամփին առջեւ
Մեր պապերուն, որոնք հազար
Մահերէ նսփ գիտցան ապրիլ,
Այսօր անոնք սուգէն անդին
Ուսած գնարը Ապրիլի
Դարձնալ կ'երգեն անմահութեան
Տաղը կախարդ, վաղուան անոյժ
Դափնիներով բերկրապատար:

Ձայնին վրայ սա գնարին
Ցան է ինկած մեր զոհներուն,
Երիտասարդ իջած հողին,
Հոգին է ողջ մեղեկներուն...
Որուն վրայ կը յամենայ
Վնիոր սուրբ արդարութեան:

* * *

Հընչէ՛ գնար...
Թող թելնուդ մէջ թանձրանայ
Վրէժն ամբողջ մեր դարերուն.
Հնչիւններէդ մարմին առնեն
Հողին ինկած ոսկերոսին
Մեր հայրերուն, նման հունսին
Վերընձիւղող հողերուն մէջ,

Հնչէ՛ գնար...

Ձայննուդ հետ թող փարատին
Սուգն ու մոռլ մեր սիրներուն,
Սափոր-սափոր բաժնես մեզի
Արիւնն ազատ մեր պապերուն,
Որոնք սուրին, քաղցին դիմաց,
Կննիռին դէմ բռնաւորին,
Խոյացան միշտ՝ ազատութեան
Դափնիներով պսակելու
Էջը վսեմ մեր պատմութեան:

Հնչէ՛ գնար...

Բազմահնար թելնուդ նկուն
Ամուլ հողին, մեր սիրներուն
Պիտի բերեն սուրբ մայրութիւն,
Ժայտնն ամբողջ պիտի դառնան
Շէն ու աւան եւ մրգասան,
Սիրները մուր սափոր ոսկի,
Մոխիրներէն վերածնելու
Անձայրածիր լեռնադաշտեր
Կննդանութեան ու բարիփի,
Ու բազուկներ պողպատացած,
Պիտի լանկարծ անստանան
Ընդդէմ անոնց, որ կը դաւեն
Իր վերնլիքին հազարամեայ:

Հնչէ՛ գնար...

Առջիդ ահա կը բարձրանայ
Վաստակն արդար Հայրենիքին.
Դաշտեր անքն ոյժին դիմաց
Մըշակներուն, կ'ըլլան յղի
Ծով բարիքներ հեղեղելու

Ծարաւացած հոգիներու,
Սփիւռփի մէջ կը խմբուին
Քարէն, թուղթէն յառաջ եկող
Շուրջը ոսկի Մըշակոյթին:

Հնչէ՛ քնար... հնչէ՛ ուժգին...
Թող հոգիները հրնուին
Սենը հագած հագարներու,
Ըլլան պատրաստ ըմբոխներու,
Այգն անաղօս մայիսներու,
Որուն համար հեղեղի պէս
Մեր պապերուն նրակներէն
Արիւնը սուրբ հոսեցաւ միտ:

Հնչէ՛ քնար...
Աղերսելու խաղաղութիւն
Ու բարութիւն վրան բոլոր
Այրիացած նրկիրներուն:
Թող քու կանչէդ մութ սիրներուն
Իջնէ պսակ, կրօնք մը գութ,
Կախարդելու մարդերն ամբողջ
Բերկրաններու սեղանին շուրջ,
Մարդեր ըլլան իրար եղբայր,
Որուն համար եկաւ աշխարհ
Տիեզերփի Աստուածորդին,
Հնչէ՛ քնար, հնչէ՛ ուժգին
Տիեզերքն ողջ քու կանչներդ
Պիտի դառնայ համանուագ...:

ԱՐՏԱԿ ԱՐԵՂԱՅ

1953

ՈՒՐԻԱԳԾԱՅԻՆ ՊԱՏՄՈՒԹԻՒՆ

«Յուշ լիցին քեզ ատուրքն յախտն-
նից, իմացարուք զամսն ազգաց յազգս.
հարց ցհարսն քո եւ պատմեցնն քեզ,
եւ ցծնրս քո, եւ ասացնն քեզ»:

(Բ. ՕՐԻՆԱՅ, ԼԲ 7)

ՈՒՐԻԱԳԾԱՅԻՆ ՊԱՏՄՈՒԹԻՒՆ *)

ԺԱ դարի սկիզբը սելջուկեան թուրքերը զանգւածային գաղթով արշաւանքի սկսեցին: 1040 թին, Մերվի ճա՛ւմարտից յետոյ, գրաւեցին Պարսկաստանը: Բազրատունեաց թագաւորութիւնը նրանց բազմաթիւ յարձակումները ետ մղեց: Բիւզանդիոնի սխալ քաղաքականութեան հետեանքով Հայաստանը թուլացաւ և 1064 թին սելջուկեան թուրքերը ներխուժեցին Հայաստան և գրաւեցին Անին: Այնուհետև, Մանազկերտի ճակատամարտից յետոյ, յունական Փոքր Ասիան անցաւ թուրքերի տիրապետութեան տակ:

ԺԳ դարին մոնղոլական արշաւանքի հետեանքով սկսեցին հայկական զանգւածային արտագաղթերը: Արծրունի իշխանը ԺԱ դարի սկզբնաւորութեան Վասպուրականը յանձնեց Բիւզանդիոնին և փոխարէնը ստացաւ Սեբաստիան: Իսկ հայ բնակչութեան մեծ մասը, ըմբոստացած օտար տիրապետութեան դէմ, իր իշխանների ղեկավարութեամբ, ուղղւեց Կիլիկիայի լեռները և այնտեղ ստեղծեց հայկական մի նոր պետութիւն: Հայերը գաղթեցին նաև Ղրիմ ու Մոլդաւիա: Երբ թաթարները գրա-

*) Ներկայացնում ենք քաղաքագրութեան:

ւեցին Ղրի՛րը, հայերի մէկ մասն անցաւ Հեհաստան, ուր
և դարերի ընթացքին ձուլւեց:

Օսմանեան թուրքերը (տաճիկներ) իրենց նւա-
ճումներով, ամենից նշանաւորը հանդիսացան թուրանա-
կան ժողովուրդների մէջ և երկու դարի ընթացքին ըս-
տեղծեցին մեծ կայսրութիւն: 1453 թւին արդէն տէրն
էին Բիւզանդիոնի հսկայ կայսրութեան:

ԺԶ. դարին տաճիկները գրաւեցին Հայաստանը:
Նրանց հսկայական կայսրութիւնը տարածւեց Վիեննայի
դռներից մինչև Քաւրիզի մերձակայքը: ԺԷ. դարին Օս-
մանեան կայսրութիւնն արդէն տկարութեան նշաններ
ցոյց տւեց և նւաճւած երկրները փորձեր կատարեցին
ազատագրելու համար նրանց տիրապետութիւնից:

Ռուսաստանի զօրացումը, Մեծն Պետրոսի և Կա-
տարինէ Բ. ի գործունէութիւնը գլխաւոր պատճառը
հանդիսացաւ տաճիկների աստիճանական տկարացման:
Ֆրանսիական յեղափոխութիւնը Ռուսիոյ և Աւստրիոյ
ուժերը շեղեցին իրենց նպատակից և Օսմանեան կայս-
րութիւնը փրկեց անդամահատումից: Այս անգամ անգ-
լիացիք նեցուկ կանգնեցին Օսմանեան կայսրութեան և
ամբողջ մի դար ապահովեցին նրա գոյութիւնը:

Ռուսիան ամէն գնով ուզում էր Պոլիս թափան-
ցել, նախ որպէս Բիւզանդիայի կայսրութեան ժառան-
գորդ և յետոյ նեղուցների մէջ հաստատուելուց յետոյ
պիտի կարողանար Բալկանեան թերակղզու, Փոքր Ասիայի
և մինչև իսկ արևելեան Միջերկրականի վրայ ազդեցու-
թիւն ունենալ: ԺԹ. դարում Ռուսիան իր այս ծրագրի
դէմ գտաւ Անգլիոյ և Աւստրո-Հունգարիոյ դիւանագի-
տութիւնը և ոյժը: ԺԹ. դարում Ֆրանսիայի իշխանու-
թիւնը փոխեց իր քաղաքականութիւնը, օժանդակեց յոյ-
ներին անկախութիւն ձեռք բերելու համար, ընդդէմ
տաճիկների, օժանդակեց Եգիպտոսին և 1862 թւին նա-

պոլէոն Գ. միջամտեց ի նպաստ Չէյթուեի հայ լեոնա-
կանների, որպէսզի նրանք պահեն իրենց կիսանկախ հա-
մայնքի վիճակը:

Այսպէս, Օսմանեան կայսրութեան անդամահատ-
ման քաղաքականութեան հետևանքով և միւս կողմից
կայսրութեան տկարացման պատճառով հրապարակ եկաւ
Արեւելեան Հարցը:

Օսմանեան լուծի տակ գտնւող քրիստոնեայ ժո-
ղովուրդներն ստրկական վիճակի էին մատնւած, գրկւած
էին ամէն տեսակի իրաւունքներից, շատանում էին կեղե-
քումները և չկար կեանքի ապահովութիւն: Այս վիճակին
էին մատնւած գլխաւորաբար բուլղարները, յոյները և
հայերը, չնայած որ կայսրութեան ամենից աշխատասէր
զանգւածն էին ներկայացնում:

Օսմանեան կայսրութիւնն իրեն ենթակայ ժողո-
վուրդներին գոհացնելու համար յղացաւ բարեկարգու-
թիւնների մի ծրագիր, բոլորին ներքին ազատութիւն
խոստանալով, բայց բոլոր խոստումներն էլ ապարդիւն
մնացին:

ԺՔ. դարում տեղի ունեցաւ Բալկանեան քրիս-
տոնեայ ժողովուրդների ազատագրումը Օսմանեան լու-
ծից: Հերոսական պայքարներ, անձնագոհութիւններ, մեծ
պետութեանց, մանաւանդ Ռուսիոյ միջամտութեամբ: Ա-
ռաջին իսկ առիթով սերբերն էին, որ 1804—1812 թւա-
կանների շարունակական ապստամբութիւններով ձեռք
բերեցին իրենց ազատութիւնը: 1827 թւին յոյները, ի
գին մեծ գոհողութիւնների, վերագտան իրենց անկախու-
նը: 1856 թւին ռուսական իշխանութիւններն օգտու-
լով առիթից, ձեռք բերեցին իրենց անկախութիւնը:

Այդ ժամանակաշրջանում հայերն ևս ձգտեցին ան-
կախութեան և վերոյիշեալ ազգերի նման փորձեցին ձեռք
բերել ինքնավար իշխանութիւն:

Բայց հայկական անկախ մի պետութեան ստեղծումն անկարելի էր: Նախ ցարական կառավարութիւնը նեցուկ պիտի չկանգնէր, և երկրորդ, պայմանները ձեռքնտու չէին այլ օժանդակութիւններ ակնկալելու: Այս իսկ պատճառով հայերը բարենորոգումներ պահանջեցին օսմանեան կայսրութիւնից: Ներկայացւած բոլոր պաշտօնական պահանջները բարենորոգումների հարց էին արծարծում: Դեռևս ինքնավար և անկախ Հայաստանի խօսք չկար:

1877—1878 թւի ոռու-տաճկական պատերազմի նախօրեակին Տաճկահայաստանի հայերի վիճակը շատ անմխիթար էր: 1862-ին տեղի ունեցան Տաւրոսի շրջանների ջարդերը: Խրիմեան Հայրիկի պատրիարքութեան շրջանում բարենորոգումների հարցն է՛լ աւելի արծարծւեց: Բայց ստիպումների պատճառով Խրիմեանը հրաժարւեց պատրիարքութիւնից:

Տաճկահայաստանում բռնութիւնն ու կողոպուտը շարունակւում էին: Քիւրդերը շարունակ կեղեքում էին հայերին: 1875-ին տաճիկ խուժանը կրակի տւաւ Վանի հայկական թաղամասը: Իսկ ոռու-տաճկական պատերազմի ընթացքին Բայազէդի, Ալաշկերտի, Կարսի, Բասէնի և Վանի շրջանների հայերը ծանրածանր կորուստներ և մարդկային զոհեր ունեցան:

Երբ Տաճկաստանը բանակցութեան մէջ մտաւ Ռուսիոյ հետ, Նիկոլայ դուքսը, Ալէքսանդր Բ. ցարի հաճութեամբ ընդունեց Տաճկահայաստանի բարեկարգումների հարցը և մինչև իսկ համաձայնեց վարչական ինքնավարութիւն տալ էրզրումի, Վանի և Մուշի վիլայէթներին, ուր հայերը բնակչութեան մեծամասնութիւնն էին կազմում: Օսմանեան կառավարութիւնն իր պարտութեան պատճառով յօժարւեց, մինչդեռ իր ամբողջ մտահոգութիւնն այն էր, որ ոռուսները չհաստատեն Տաճ-

կահայաստանում:

1878 թւին ստորագրւեց Սան Ստեֆանոյի դաշնագիրը: Ասիական Տաճկաստանի համար կնքւում էր հետեալ դաշինքը. —

Ռուսիան ստանում էր Բաթումի, Արդահանի, Կարսի, Բայազէդի և Ալաշկերտի շրջանները: Յանձն էր առնում պարպելու էրզրումի նահանգը, որը գրաււած էր ոռուսների կողմից: Հայերի պնդումների վրայ Ռուսիան ջանաց ապահովել այդ շրջանների բարենորոգումները:

Սան Ստեֆանոյի դաշնագրի 16-րդ յօդւածը նախատեսում էր. «Քանի որ ոռուս զօրամասերի կողմից պարպումը այն հողամասերի, որոնք գտնւում են Հայաստանում և որոնք պիտի վերադարձեն օսմանեան կառավարութեան, կարող է յառաջ բերել բարդութիւններ ու խռովութիւններ, վնասելով երկու երկրների բարւոք յարաբերութիւններին, Բարձրագոյն Դուռը յանձն է առնում անյապաղ իրագործել հայկական նահանգների տեղական կարիքներից բխող վարչական ինքնավարութիւնը և երաշխաւորել նրանց ապահովութիւնն ընդդէմ չեքքեզների և քիւրդերի»:

Օսմանեան պատւիրակութիւնը քաջալերւած Անգլիայի կողմից, Դուքս Նիկոլային փոխել տւեց, և «վարչական ինքնավարութիւն» բացատրութեան տեղ դրւեցին «բարելաւումներ և բարենորոգումներ» բառերը:

Ռուսական բանակները քաջալերուց առաջ բարենորոգումները պիտի գործադրէին: Անգլիան հետապնդում էր յօդւածի գործադրումից առաջ թուրքիան պարպել տալ ոռուսական զօրքերից, որպէսզի Տաճկահայաստանում ոռուսները որեւիցէ յենակ չուենային: Սան Ստեֆանոյի դաշնագիրը երբեք չգործադրւեց. Սնդիւն կարողացաւ պարտագրել, որ Ռուսիան հրաժարւի այդ

դաշնագրից և ընդունի Բերլինում գումարելիք նոր վեհաժողովի հրաւիրումը: Որպէսզի մի նոր դաշնագիր կնքւի: Անգլիան իր ծրագրի մէջ յաջողեց և փոխարէնը Օսմանեան կայսրութիւնից ստացաւ Կիպրոս կղզին:

1878 թւին Բերլինի վեհաժողովին հայերը պատուիրակութիւն ուղարկեցին Պրիմեան Հայրիկի գլխաւորութեամբ: Հայ պատուիրակները բախւեցին Բիսմարկի և Դիզրայէլիի հակառակութեան: Հայ պատուիրակութիւնը պահանջում էր Էրզրումի, Մուշի և Վանի շրջանների հայոց կեանքի ապահովութիւնն ու բարելաւումը:

Բերլինի վեհաժողովը Սան Ստեֆանոյի 16-րդ յօդուածը վերածեց 61-րդ յօդուածի, հետևեալ ձևով. «Բարձրագոյն Դուռը յանձն է առնում անյապաղ իրագործել այն բարենորոգումներն ու բարելաւումները, որոնց կարիքը ունեն հայերից բաղկացած նահանգները և երաշխաւորել նրանց ապահովութիւնը չեքքեզների և քիւրդերի դէմ: Բարձրագոյն Դուռը պարբերաբար տեղեկութիւններ պիտի տայ այս ուղղութեամբ իր ձեռք առած միջոցների մասին այն պետութեանց, որոնք պիտի հսկեն գրազործադրութեանը»:

Բերլինի դաշնագրից յետոյ, 1880 թւին, Գլատըստոնն անցաւ Դիզրայէլիի տեղը: Նա թրքական վարչակարգի տակ ճնշւած ժողովուրդների նկատմամբ համակրբանք ունէր, բայց հակառակ կատարող աշխատանքներին և բանակցութիւններին, Բերլինի դաշնագրով նախատեսւած բարենորոգումներն իրագործելու համար եղած բոլոր փորձերն ապարդիւն մնացին: Հայերի կրած շարչարանքները մեծ պետութիւնների համար շահաստանի էին վերածւել, նրանք բողոքելով, ի շահ իրենց էին քաղաքականութիւն վարում: Թրքական քաղաքականութիւնը շատ յստակ էր. քանդել հայութեան ապագայ ինքնավարութեան հիմքերը, բնաջնջելով փոքրացնել հայ-

յութեան թիւը և իրենց հայրենի հողի վրայ փոքրամասնութեան վերածել: Ահա, այս ճնշումները, կեղեքումները և շարաշահութիւնները հայերին ապստամբութեան մղեցին:

Սասունի հայերը տառապում էին քիւրդերի չարագործութիւններից: 1893-ին մերձեցին ենթարկւել հարստահարութեանց և ապօրէն տուրքերը քիւրդերին չվճարեցին: Բայց թուրք պետութեան նկատմամբ շարունակեցին իրենց պարտականութիւնը կատարել:

Քիւրդերը յարձակեցին Սասնոյ հայութեան վրայ, բայց ետ մղւեցին խիզախ ու արի լեռնականների կողմից. տաճիկները դիմեցին օսմանեան իշխանութեան և կանոնաւոր բանակներ եկան Սասուն: Սասունը գրաււեց և 1894-ին սկսեց կոտորածը: Անգլիական կառավարութեան նախաձեռնութեամբ, հակառակ ոռոս կառավարութեան խափանարար փորձերին, տեղի ունեցաւ քննութիւն և անարժէք համարւեցին տաճիկ կառավարութեան տւած քացատրութիւնները, թէ հայերն ապստամբել էին օսմանեան իշխանութեան դէմ. օսմանեան գորքը Սասուն հասնելուց յետոյ, միանալով քիւրդերին, շարունակել էին միասնաբար ջարդել:

Այնուհետև Սուլթան Աբդուլ Համիդը մշակեց սիստեմատիկ ձևով ջարդի մի ծրագիր: Յիստ գրաքննութիւն հաստատւեց, ճանապարհները խիստ հսկողութեան տակ առնւեցին: Մասնաւոր մարդիկ ուղարկւեցին հայաշատ կենտրոնները, և տեղի տաճիկներին ու քիւրդերին հայերի դէմ գրգռեցին: Ձէնք բաժանեցին և 1895 թ. Սեպտեմբերին մեծ թւով հայեր ջարդեցին: 1894 — 97-ի շրջանին տաճիկ կառավարութիւնը կարողացաւ 400,000 հոգի պակսեցնել հայկական նահանգների բնակչութիւնից:

Եւրոպական պետութեանց ուղադրւելու գրա-

ւելու համար և նրանց միջամտութիւնն ստիպելու համար, 1895-ին հայկական կուսակցութիւնները յանդուգն միջոցների գիմեցին: 1896-ին գրաւեցին Բանք Օթոմանը, և 14 ժամ գրաւեալ վիճակի մէջ պահեցին: Շէնքի պարպումը յաջողեցին միայն հայ յեղափոխականներին միջամտութիւն խոստանալով: Բայց առաջին հակազդեցութիւնն այն եղաւ, որ տաճիկները Պոլսում 700 հայեր շարդեցին:

1908-ին «Երիտասարդ Թուրքեր»ի կուսակցութիւնը Մակեդոնիոյ օսմանեան բանակի օգնութեամբ տապալեց Սուլթան Համիդի վարչաձեւը և սահմանադրական միակետութիւն հաստատեց: Օսմանեան կայսրութեան քրիստոնեայ տարրերին, մասնաւորաբար հայերին, որոնք մեծ յոյսեր էին կապել Երիտասարդ Թուրքերի կուսակցութեան, թրքացման քաղաքականութիւն որդեգրեց: Այսպէս, չնայած որ հայերը պատրաստակամութիւն ցոյց տւին նոր Թուրքիոյ հետ գործակցելու, բայց փոխարէնը թշնամանք գտան:

Այս կացութեան մէջ, 1913 — 14 թւականներին, հայկական բարենորոգումների ծրագիրը դարձեալ շարունակեց, այս անգամ Պօղոս Նուպար փաշայի գործակցութեամբ, Եւրոպայում: 1914 Փետրւար 8-ին ստորագրեց բարենորոգումների ծրագիրը, ուր նախատեսուում էր հայկական նահանգների համար ընդհանուր քննիչների նշանակումը, չէզոք փոքր երկրների ներկայացուցիչներից ընտրւած, տեղի վարչական գործերին հսկելու համար:

Բայց հազիւ 1914 թ. Յուլիսին, նախքան հոլլանդացի և նորւեգիացի քննիչների հասնելը, պայթեց համաշխարհային առաջին պատերազմը:

1915 թւականին Թալէաթը, էնւերը և Բեմալը կազմակերպեցին Տաճկահայաստանի բնակչութեան բնա-

ջընջումը և մէկ միլիոն հայ սպանելուց յետոյ մնացեալներին էլ ցրեցին աշխարհի շուրջ չազերը:

Ռուսաստանում ծագող յեղափոխութիւնից յետոյ, 1918 թ. Մայիս 28-ին, Հայաստանն անկախ հռչակեց և նոյն տարւայ Յունիսի 4-ին, Բաթումի դաշնագրով, օսմանեան կառավարութիւնը ճանաչեց հայկական նորաւստեղծ պետութիւնը:

1919 թ. Մայիսին Հայաստանի խորհրդարանի և տաճկահայոց համագումարի որոշման համաձայն, Հայաստանի Հանրապետութիւնը Տաճկահայաստանի միութիւնը հռչակեց:

1920 թ. Յունւարին դաշնակիցները փաստօրէն ճանաչեցին Հայաստանի Հանրապետութեան անկախութիւնը: Իսկ նոյն տարւայ Օգոստոսին, Թուրքիոյ և դաշնակիցների միջև Սեւրում կնքւած հաշտութեան դաշնագիրն ստորագրեց Ա. Ահարոնեանը, Հայաստանի անունով, և այսպէս, իրաւականօրէն ևս ճանաչեց Հայաստանի Հանրապետութիւնը:

Սեւրի դաշնագրի Հայաստանին վերաբերող երկու գլխաւոր կէտերն էին.

Յօդւած 88 — Թուրքիան յայտարարում է, թէ Հայաստանը ճանաչում է որպէս ազատ և անկախ պետութիւն, ինչպէս արդէն ճանաչում են դաշնակից պետութիւնները:

Յօդ. 89 — Թուրքիան և Հայաստանը, ինչպէս նաև դաշնակից միւս ազգերը, ընդունում են Ամերիկայի Միացեալ Նահանգների նախագահի իրաւաւորութեանն յանձնել Թուրքիոյ և Հայաստանի սահմանների ճշտորոշումը, էրզրումի, Տիգրանակերտի, Վանի և Բիթլիսի վիլայէթներում, ընդունել նրա որոշումը, ինչպէս նաև ամէն կարգադրութիւն, որ նա պիտի կարողանայ անել Հայաստանին ղէպի ծով ելք տալու և օսմանեան երկրի բոլոր

սահմանակից հողամասերի ճշտորոշման վերաբերեալ:

Մի քանի ամիս յետոյ Միացեալ Նահանգներին նախագահ Ուիլսընը տալիս է իր իրաւարարի վճիռը, որով Հայկական պետութեան պիտի յանձնւէր Վանի, Էրզրումի և Բիթլիսի վիլայէթներէ մեծ մասը, Տրապիզոնի վիլայէթի մէկ մասը, և այսպէս, հայկական նոր պետութեան համար ապահովում է ծովի վրայ մի ելք:

Բայց Լոզանի խորհրդածրոյցով թուրքիան և դաշնակիցները հաշուեցին և թուրքիան գարձեալ յաթթական դուրս եկաւ:

Սերի դաշնագրի ստորագրումից յետոյ թուրքերը յարձակողականի անցան Հայաստանի Հանրապետութեան դէմ: Այդ շրջանին թուրքիոյ և Պորհրդային Միութեան միջև սերտ կապեր էին ստեղծուել, 1920 թ. Ապրիլին կարմիր բանակը գրաւեց Բաքուն, Ադրբէջանի հանրապետութիւնը և այնտեղի խորհրդային նոր իշխանութիւնն իրեն վերապահեց Ղարաբաղի և Չանգեզուրի հայկական շրջանները: Սեպտեմբեր և Հոկտեմբեր ամիսներին հայկական զօրագունը կարողացաւ կասեցնել թուրքերի առաջխաղացքը 1920 թ. հայ և թուրք պատերազմի շըրջանում:

Հայաստանի Հանրապետութեան ներկայացուցիչներն ստիպուեցին ընդունել տաճիկ կառավարութեան պարտադրած հաշտութեան ծանր պայմանները: Թուրքիան իրեն էր վերապահում Տաճկահայաստանի ամբողջութիւնը և գրաւում էր Կարսի ու Արդահանի շրջանները: Հայաստանն իջել էր 30,000 քառ. քիլ. տարածութեան, և միշտ գտնւում էր տաճկական վտանգի ներքոյ: Նոյն օրը, Դեկտ. 2-ին, Հայաստանը դառնում է խորհրդային պետութիւն և նոր շրջան է սկսւում հայ ժողովրդի համար:

Ա Պ Ր Ի Լ 24

Յաւախական ի նակասամարսին,
յաւախական ի նակասամարսին եւ
ի մեծ պասերազմին ընդդիմամարսեալ
լինէր անօրինացն պասերազմ: Իսկ ե-
րանելի նահասակն զմոլութիւն անօ-
րինացն խափանեցին եւ յաղթող գսան:

ԺԱՄԱԳԻՐԸ

ԱՊՐԻԼ 24

Ապրիլ 24...

Ինքնիրմով ամբողջական և հասկանալի մի թւական, առանց բացատրութեան և առանց մեկնութեան: Համակ սուգ, տրտմութիւն և կենդանի զգացում, եկած մօտաւոր անցեալի արիւնոտ էջերից: Այլազան պետութիւնների մէջ ցրւած արեմտահայութիւնն այդ անպատմելի տառապանքի, շարժարանքի և սպանդի կենդանի վկան է: Մէկ միլիոն նահատակ, նիւթական և քարոյական կորուստներից գատ: Մտաւորական, հոգեորական և ազգային ղեկավարների աքսոր և սպանութիւն: Ինչքի և ըստացւածքի, ինչպէս նաեւ մշակութային գանձերի կորուստ: Հակառակ այն իրողութեան, որ մի քանի տասնամեակներ են անցել արգէն, սակայն, վէրքը չի սպիտցել տակաւին:

Իւրաքանչիւր տարի, երբ մի ամբողջ օր կրօնական և ազգային արարողութիւնների և սգահանդէսների միջոցով մտածում ենք մէկ միլիոն նահատակների և ազգային կորուստների մասին, մեր մտածումները շարունակում են հեղեղի պէս հոսել և մնում ենք շւար, թէ որտեղի՞ց սկսենք և ի՞նչ ձևով համազրենք և վերջաց-

նենք մեր գաղափարները: Հատուցման և ատելութեան զգացումից աւելի մեր կորուստներն են, որ մեզ պահում են շարք վիճակում: Ապրիլեան Եղեռնի պարզ յիշատակումն իսկ սարսուռ է առաջացնում մեր հոգիներում: Անպատմելի, անասելի մի զգացում հեռանկարներ է բացում մեր հոգիներում: Երագ, տեսիլք, վրէժ և յոյսեր իրար են հրմշտկում: Այս պայմաններում դժւար է ներկայացնել ամբողջութիւնը՝ ինչպէս որ պատահեց:

Յիշել և շուգւել և վրէժի զգացումով շլեցւել, անբնական երևոյթներ պիտի թւան: Մէկ միլիոն նահատակներ ջարդի ենթարկւած, բարբարոս ցեղի կողմից, գազանային միջոցներով: Նահատակներ ամէն խաւի պատկանող. — մտաւորական մեծ ոահվիրաներ, հանճարներ, տաղանդներ, որոնք ոչնչացւեցին իրենց փթթումի մէջ: Եկեղեցու պաշտօնեաները հազիւ նոր ոգի տւած եկեղեցու պայծառութեան, ենթարկւեցին առաջին դարերի քրիստոնեաների նահատակութիւնից աւելի անմարդկային բարբարոսութեան և մահը դիմաւորեցին: Կրթական մշակներ, մամուլի ներկայացուցիչներ, արւեստագէտներ, ազգային ու հասարակական գործիչներ, պետական պաշտօնեաներ, աքսորի ճամբաների վրայ խոշտանգւեցին: Իրենց առօրեայ հացը արդար քրտինքով շահող արհեստաւորներ, բանւորներ, գիւղացիներ տեղահան եղան հայրենի տներից, շատերն անապատի աւազի տակ ողջ-ողջ թաղւեցին, ուրիշներ կենդանի վիճակով Եփրատ գետի հոսանքին յանձնւեցին: Այսպէս, բազմաթիւ քաղաքներ, գիւղեր պարպւեցին և նահատակների թիւը հասաւ մէկ միլիոնի:

Արիւն և աւեր: Բռնի գաղթ և աքսոր: Հարկ կա՞յ շեշտելու, թէ այդ բոլորի հեղինակը հայ ժողովրդի դարաւոր սոտխն էր, որի անունը ցեղային բնորոշումից աւելի համայն մարդկութեան համար արդէն իսկ դարձել

է հոմանիշ վայրագ և բարբարոս ցեղի: Ֆրանսացի մեծ վիպագիր Վ. Հիւգօն մէկ տողի մէջ տւել է արդէն այդ ցեղի ամբողջական պատկերը. «Ամէն ինչ աւեր, ամէն կողմ սուգ, քուրֆն և անցել >: Վ. Հիւգօյի որակումը միայն հայն է, որ հասկանում է իր ամբողջութեան մէջ, աւելի ճիշտ պիտի լինէր ասել՝ միայն հայն է որ գիտէ թէ վիպագիրն ի՞նչ է ուզում հասկացնել:

Ապրիլ 24-ը, Եղեռնի յիշատակի հետ, բացայայտում է նաև երկու յղացքներ՝ հայը և իրեն հալածող ցեղը: Առաջինը շինարար, ստեղծագործ արւեստների և մշակոյթի գործերի հետամուտ, միշտ նորանոր նւաճումներ արձանագրող. վկայ իր անցեալի և ներկայի մշակութային հարստութիւնը, իսկ երկրորդը՝ աւերող, թալանող, քանդող և միշտ էլ յայտնի իր բարբարոսութեամբ. վկայ իր պատմութիւնը:

Անապատի ու որբանոցների մէջ հասակ նետած սերունդը դարձել է արդէն Ապրիլեան Եղեռնի դէպքերի շրջուն պատմութիւն: Իր մորթի վրայ Եղեռնի սպին ունեցող, իր հոգու ծայքերի մէջ տխուր յիշատակները պահող իւրաքանչիւր հայ եթէ միայն իր ականատեսի յուշերը պատմի, արդէն բաւ է գաղափար կազմելու համար մեր նահատակների և ողջ մնացողների շարչարանքների մասին:

Արտասահմանում աստիճանաբար նւագում են ականատեսները, բայց իրենց մանկութիւնն աւազի վրայ անցկացրած և տարտամ գաղափարներ ունեցողներ դեռևս շատ կան: Իսկ այն սերունդը, որ մեծացաւ նրանց անմիջական շնչի տակ, մանուկ հասակից իր մէջ աճեցրեց կենդանի զգացումը, որ խորքի մէջ նւագ չէ գաղթ և աւեր ճաշակողներից:

Ո՞ր մէկ երիտասարդը կտմ պատանին ժամերով չի լսել իր ծնողների Գողգոթայի ճանապարհի նկարագրը-

րութիւնը. ո՞ր մէկ հայը իր երակներէ մէջ չի ունեցել արեան արագ մի ընթացք, կարդալով և լսելով սպանդի մասին: Ո՞ր մէկ հայը սգաւոր չի եղել Ապրիլի 24-ին և չի յիշել իր մեռելներին: Ընտանիք կա՞յ, որ մեռել չի ունեցել, տուն կա՞յ, որ չի քանդուել: Բոլորն էլ տըրտմութեան և սուգի թելերով կապուել են Բիւրաւոր նահատակների յիշատակի օրւան: Մեր և նահատակների միջև դարերի երկար կամուրջ չկայ, մօտաւոր անցեալ է այն, և դեռևս չգրւած պատմութիւն, որը թերևս երբեք էլ չգրւի և մնայ յաւիտեանս կենդանի և ապրող զգացում: Ո՞վ պիտի կարողանայ գրել այնքան աւերների, բարբարոսութիւնների, խոշտանգումների և նահատակութիւնների պատմութիւնը: Ականատեսը իր յուզումնալի մտածումները պիտի գրի. լսողը և պատմական վաւերաթղթերի վրայ հիմնւած գրողը տարտամ, ազօտ և չոր իրողութիւններ պիտի փոխանցի թղթին: Պիտի տայ փառաւոր դէմքերի անունները, պիտի հիւսի չարքաշ և գործունեայ ժողովրդի պատմութիւնը, պիտի թւի աւերումներն ու զանգւածային ջարդերը, պիտի գրի նաև արի կեցւածքի և դիւցազնական մարտերի մասին: Եւ այս բոլորը որպէս արիւնոտ մէկ էջը հայոց պատմութեան:

Բայց մենք տակաւին Եղեռնի անմիջական տպաւորութեան տակ, եկեղեցական և ազգային հանդէսների ընթացքին, վերյիշումն է որ կատարում ենք մեր նիւթական և բարոյական կորուստների: Գիտակցում ենք, թէ անցեալի վերյիշումներն ու ցաւերի կրկնւած պատմութիւնները լուսեղէն ճամբայ չեն մեր հետապնդած իրաւունքների տէրը լինելու համար: Վիշտն ու ցաւը չէ, որ յաւերժացնում ենք, այլ ի խնդիր արդարութեան, մեր ձայնն է որ բարձրացնում ենք երկինք, մեր իղձն է որ յանձնում ենք տարտղնւած և ցրւած հայորդիներ-

րին, և ի վերջոյ, ապագայի համար հիւսւած տեսիլն է, որ պատմում ենք բոլորին: Բնականօրէն, չենք անտեսում նաև ներկայի իրականութիւնը, որ աւա՛ղ, միշտ էլ մխիթարական չէ:

Կրօնական տեսակէտից վրէժխնդրութիւնն ասուածային պատուիրանների դէմ գնալ է: Բայց մենք, ամէն անգամ, երբ ոգեկոչում ենք Ապրիլեան Եղեռնի յիշատակը, ծանրանում ենք աւելի մեր ազգի կրած տառապանքի և մեր անելիքների վրայ: Մեր իրաւունքն է, որ պաշտպանում ենք և հայկական ոգին է, որ ներշնչում ենք բոլորին: Այս զգացումը յաւերժացնելու հա-



Բիւրաւոր նահատակների յուսարձանը Անթիլիասում.

մար արտասահմանի հայութեան սրտի վրայ, Մեծի Տանն Կիլիկիոյ Կաթողիկոսութեան կենտրոնատեղի Անթիլիասի մայրավանքում, Մայր Տաճարի և Դպրեվանքի միջև բարձրացրել ենք Ապրիլեան Յուշարձանը, նրա մէջ գե-

տեղելով նաև նշխարները մեր նւիրական նահատակներին, մեր յոյսերի ծաղկումը Յուշարձանից թելագրուող և տպաւորող խորհրդի մէջ խտացնելով:

Երբ մտածում ենք անցած այդ տասնամեակների մասին, մեր ստացւածքի և մշակութային գանձերի կորուստներից բացի, խորհրդածում ենք նաև անցնող այդ տասնամեակները լեցնող իրողութիւնների վրայ: Բնականօրէն, նիւթական կորուստները չվերադարձան, բազմաթիւ հարստութիւններ անհետ կորան և փլատակների վերածւեցին, երբեք մեր ոտքերի տակ չզգացինք մեր հայրերի սեփականութիւնը եղող պատմական վայրերի, քաղաքների և գիւղերի հողը:

Բայց, դրանց փոխարէն, անապատի կրակի միջից անցնող հայրերին, դրամագլուխ ունենալով միայն իր բազկի ոյժը, գործելու և նորը շինելու կամքը, օտար հորիզոնների տակ լծւեց աշխատանքի, և շնորհիւ իր անընկճելի կարողութեան, այսօր հասել է նախանձելի վիճակի: Արտասահմանում, գրեթէ ամէն տեղ, հայ ժողովուրդը կազմակերպւած գաղութ է այլևս, և իր կատարած նւաճումներով բոլորին զարմանք է պատճառում: Այսքան արագ սթափում, այսքան արագ յառաջադիմութիւն, այսքան կորով իրապէս զարմանահրաշքերէն է:

Բնականօրէն, անցնող տասնամեակների ընթացքում չփարատեց նաև մարդկային կորուստը. մէկ միլիոն նահատակների փոխարէն մէկ միլիոն հայութիւն չեկաւ, և սակայն, աճող գաղութներում, ինչպէս նաև մայր հայրենիքում, հրապարակ եկան այնպիսի դէմքեր, որոնք միջազգային շրջանակներում ևս դարձան մեծանուն դէմքեր՝ գիտութիւնների, արւեստների և մշակութային տարբեր ասպարէզներում: Նրանք հիւսեցին հայ ժողովրդի փառքը, նրանց հայ ազգի գաւակ լինելու հանգամանքովը յիշեցրին հայ ժողովրդի պատմութիւնը և մասաւանդ

տարածեցին հայ ազգի անունը և բոլորի ուշադրութեան առարկայ դարձրին հալ կոչումը: Այսօր հպարտութեամբ ենք լեցւում, երբ հնչում են նրանց անունները մեզ հիւրընկալող ժողովուրդների բերնի մէջ:

Նոյնը կատարւեց նաև մշակոյթի տարբեր մարգերում: Աւերւած խորանների փոխարէն ամենուրեք կառուցւեցին նոր տաճարներ, նոր դմբէթներ սյացան դէպի երկինք և հայ եկեղեցու գանգերն աւետեցին վերածնող հայրդիների նւաճումները: Դպրոցներ, մշակութային հաստատութիւններ, միութեան կազմակերպութիւններ ու թերթեր Մեսրոպեան գիրն ու մշակոյթը նոր հիմքերի վրայ դրած՝ եռանդ և ոգևորութիւն տւին բեկւած հոգիներին: Դպրոցներում հայոց լեզուն նոր թափով ուսուցւեց, Տպարաններում, մամուլի ճոխնչի տակ, Մեսրոպեան գիրը հայութեան բաշխեց ազգային մշակոյթի գանձերը: Այսպէս, գիտական, մարդական և այլ մարգերում բերկրանքի առիթներ ստեղծւեցին, և հիմա աշխատում ենք ուժացման դէմ թումբ կանգնեցնել, մեր ազգային դիմագիծը Մփիւքում պահելու համար:

Անցնող տասնամեակների ընթացքում աստիճանաբար կանոնաւորւեցին նաև Ամենայն Հայոց Հայրապետութեան, Մեծի Տանն Կիլիկիոյ Կաթողիկոսութեան, Երուսաղէմի և Կ. Պոլսոյ պատրիարքութեանց գարեմանքերը և եկեղեցականների նոր հոյեր պայծառացին եկեղեցին: Բոլոր մարգերում իրագործւող այս նւաճումները զարմանք պատճառող երեւոյթներ են և այս բոլորը գալիս են հաստատելու հայ ժողովրդի աննկուն կամքը և ստեղծագործ ոգին. ահա թէ ինչու Ապրիլեան սրգահանդէսների ընթացքում լացն ու ողբը մէկ կողմ դրած, հիւսում ենք նաև հայ ժողովրդի փառքը:

Յարդ աշխատում էինք մենք մեզ կազմակերպել որպէս գաղութ, տյժմ առաւել և նւազ չափով, այլա-

զան երկրներում, ունենք վարչականօրէն կազմակերպւած գաղութներ, և միահամուռ ճիգերով տքնում ենք ազգային, եկեղեցական և մշակութային գործերի մէջ մեր ունեցածը պահպանել և աւելին ձեռք բերել:

Ձեռք անդրադառնում, թէ ի՛նչ արեց ջարդարարը այս տասնամեակների ընթացքում, բայց պարզ իրողութիւն է, որ ցարդ հայաբնակ բոլոր վայրերը մնում են աւերակ և քար ու քանդ վիճակում. ամայի այդ վայրերում պատահական անցորդներին լուռ բողոքարկու են դարձել աւերած եկեղեցիներն ու ամէն տեսակի կառուցումների մնացորդները: Իսկ մենք տակաւին համբերութեամբ և յոյսով սպասում ենք արդարութեան:

Եթէ երբե՛ք մէկ միլիոն նահատակների ցիր ու ցան ոսկորները կարելի չեղաւ ամփոփել մի գերեզմանոցում, և մինչև իսկ նրանք մնացին անթաղ, բայց իրենց յիշատակը և մասնաւորաբար այն ոգին և հաւատքը՝ որ իրենցը եղաւ, մեզ համար հանդիսանում է ոյժ՝ մեր յոյսերի և իրաւունքների պսակումի մէջ:

Երանի թէ ընդհանրական սուգի այս օրը դառնար համազգային ոյժերի միասնաբար գործունէութեան լաւագոյն առիթը, որովհետև միայն ա՛յս կերպով կարելի կը լինի հաւաքական աշխատանք տանել և մեր պահանջների իրագործման ճանապարհի վրայ առաւել արդիւնքներ ձեռք բերել:

«Յիշատակն արդարոց օրհնութեամբ եղիցի»:

ՎԱՍՆ ՀԱՅՐԵՆԵԱՑ ԵՒ ՎԱՍՆ ԿՐՕՆԻ ԱԶԱՏՈՒԹԵԱՆ

«Սա—Հայկ— խրոխացեալ ամբարձ զձեռն ընդդէմ բոնաւորութեանն Բնլայ»:

... «Իսկ բլուրն, ուր քաջամարտօսն անկաւ Բէլ, անուանեաց Հայկ Գնրեզմանս»:

Մ. ԽՈՐԵՆԱՅԻ

ՎԱՍՆ ՀԱՅՐԵՆԵՍՑ ԵՒ ՎԱՍՆ ԿՐՕՆԻ ԱԶԱՏՈՒԹԵԱՆ

Մեր պատմահայրը՝ Մովսէս Խորենացին, Հայկ Նահապետի ապստամբութիւնը նկարագրելիս ասում է. «Հայկը վայելչակամ էր, թիկնաւատ, գեղազանգուր մագերով, վառվռուն աչքերով, հաստ բազուկներով: Նա քաջ և երևելի հանդիսացաւ հսկաների մէջ, գիմազրոյ այն բույրին, որոնք ձեռք էին բարձրացնում իշխելու բույր հսկաների և դիւցազունների վրայ: Նա խրոխտանալով ձեռք բարձրացրեց Բէլի բռնաւորութեան գէմ, այն ժամանակ, երբ մարդկային ազգը սփռւում, տարածւում էր ամբողջ երկրի լայնութեամբ, բազմամբոխ հսկաների, անչափ կատաղիների և ուժեղների մէջ. որովհետեւ այն ժամանակ ամէն մի մարդ կատաղած, սուրն ընկերոջ կողն էր կոխում, մէկը միւսին ձգտում էր իշխել: Բէլին պատահամբ յաջողեց բռնանալ և ամբողջ երկիրը դըրուել: Հայկը չկամենալով նրան ենթարկել, ու հնազանդւել, Բաբելոնում իր Արմենակ որդին ծնւելուց յետոյ, չւեց, գնաց Արարատի երկիրը»:

Իսկ Հայկի և Բէլի պատերազմի վախճանին ա-

սում է. «Իսկ այն բլուրը որտեղ Բէլն ընկաւ քաջ գօ-
րավարների հետ, Հայկը կոչեց Գնրեզմանք, որ այժմ կոչ-
ւում է Գնրեզմանակ»:

Հայ ժողովրդի ամբողջ պատմութիւնը խտացել է
վերեւ մէջբերած երկու պարբերութիւնից անջատուող
երկու բառերի, աւելի ճիշտը՝ երկու գաղափարների մէջ.
«Հայկն ըմբոստացաւ Բէլի բռնաւորութեան դէմ», այ-
սինքն ուզեց ազատ ապրել, անկախ լինել և իր կամքի
համաձայն իր կեանքը վարել: Իսկ երկրորդը՝ «Բէլի ըն-
կած տեղը կոչուեց Գնրեզման»:

Ուրեմն, հայոց առաջին նահապետի մտքի մէջ
կաղապարուող առաջին գաղափարներն եղել են ազատու-
թեան, անկախութեան, բռնաւորութեան դէմ ձեռք բարձ-
րացնելու և գերեզմանի յղացումները: Հայ ժողովրդի
ծագումը բնորոշող աւանդական պատմութեան Հայկ նա-
հապետի առաջին մտածումները և արտասանած առաջին
բառերը եղել են ուրեմն՝ ազատութիւն և գնրեզման:

Եթէ երբեք քննենք ամբողջ հայոց պատմութիւ-
նը, պիտի նկատենք, որ բոլոր անցուղարձեքը համարեա
թէ հիւսւել են ազատութեան և գերեզմանի շուրջ: Հայ
ազգը երբե՛ք չի բռնացել ուրիշի վրայ, դրացի ազգերի
և պետութիւնների վրայ յարձակում չի կատարել, բայց
չի հանդուրժել նաև երբ ուրիշները բռնացել են իր վը-
րայ: Իր ազատութիւնը պաշտպանել է ի գին ամէն տե-
սակ զոհողութիւնների, տառապանքների, ցաւերի և եա-
թաղանների: Իր արիւնը առանց սակարկութեան տւել է
հայրենիքի ազատութեան և անկախութեան համար: Իր
անձը, ընտանիքը, գերդաստանը զոհել է և չի հանդուր-
ժել օտար և խորթ բռնապետութեան:

Այն բոլոր պատերազմները, որոնք կազմում են
հայոց պատմութեան արիւնագիր էջերը, խօսում են հա-
յոց ինքնապաշտպանութեան և ազատասիրութեան գաղա-

փարների մասին: Վասն հայրենեաց և վասն կրօնի, հա-
յոց պատմութեան բոլոր դարաշրջաններում. ա՛յս է եղել
հայ ժողովրդի ղեկավարների և ռազմիկների գլխաւոր
գաղափարախօսականը: Հայրենիքը և կրօնը հանդիսացել
են ընդհանուրին միացնող ոգին, և այնտեղ շողախւել և
իրար են միացել հայ ժողովուրդը բաղկացնող բոլոր
տարրերը: Բոլորը մէկ մտածումի մէջ առնւած, բոլորը
նոյն կրակից բռնկւած, բոլորը նոյն շրջանակի մէջ առ-
նըւած, շատերին գարմանք պատճառելու աստիճան հրաշ-
քի համագօր գործեր են կատարել ճգնաժամային օրե-
րին:

Միւս կողմից, հայ ժողովուրդը բացառիկ յարգան-
քի և պաշտամունքի հասնող վերաբերմունք է ունեցել
մեռելիների և գերեզմանի նկատմամբ: Չմոռանանք դար-
ձեալ, որ Հայկ նահապետի արտասանած առաջին բառե-
րից է նաև գերեզմանը, Գերեզմանը, աւելի ճիշտ մե-
ռելները, միշտ ոգեկան ներկայութիւն է ունեցել հայ
ժողովրդի համար, միշտ էլ նա հանդիսացել է անցեալի
հետ ամենախորունկ կապը ստեղծող իրողութիւն և ներ-
շնչումի աղբիւր: Գերեզմանի հանդէպ եղած յարգանքը
բացառիկ երեւոյթ է մեզ մօտ: Մեռելիների յիշատակումը
և նրանց ոգեկոչումը դարերի ընթացքին և մանաւանդ
այս օրերին, արտակարգ ձեռվ ոգևորութիւն է առաջաց-
րել հայ ժողովրդի մէջ և դրա համար երբե՛ք չպիտի
զարմանայ, որ ամէն տեսակի հոսանքների համար, ղեկա-
վարների թաղումը գաղափարների բռնկումի առիթ է ըս-
տեղծում: Վարդանանց յաւերժացումը լաւագոյն օրի-
նակն է վերոյիշեալ միտքը բարացուցելու համար:

Պատմութիւնն ասում է, թէ Արտաշէս թագաւորի թաղ-
ման միջոցին բազմաթիւ անձեր ինքնասպան էին լինում,
և իր որդին՝ Արտաւազգը յուսահատ և դժգոհ այդ վիճա-
կից, մեռելին գառնալով, ասում է. «Դու գնացիր, և քեզ

հետ տարար ամբողջ ժողովուրդը, ես ո՞ւմ վրայ թագա-
ւորեմ»։ Ժողովուրդը կարծում էր, թէ Արտաշէսի մահով
ամէն ինչ վերջ կը գտնի այլևս. իշխանութիւն, թագա-
ւորութիւն, թերևս նաև հայրենի ազատութիւն և ազ-
գութիւն նրա հետ միասին կը թաղւեն. հետևաբար ա-
ւելորդ է նաև իրենց կեանքը։ Այս էլ մի այլ երևոյթ է
հայ ժողովրդի նկարագրի մէջ՝ մեծ մեռելի յիշատակին
գնացող և նրա թաղումով իր յոյսերի կորուստը իսպառ
չքացող։ Անշուշտ, կարելի է քաղմաթիւ օրինակներ մէջ-
բերել՝ յայտնաբերելու համար այլազան ժամանակաշր-
ջաններում պատահած դէպքերը, ուր ուժեղ կերպով դըր-
սեւորում է մեռելների և զերեզմանների նկատմամբ
պաշտամունքի հասնող յարգանքը։

Ազատութիւն և Գերեզման, երկու բառեր, երկու
գաղափարներ, երկու յղացքներ հայ ժողովրդի նկարագի-
րը և խառնածքը լաւագոյնս արտայայտող։ Առաջինը
բռնութեան դէմ անհանդուրժող կեցւածքի արտայայտու-
թիւն, երկրորդը՝ այդ ճանապարհին ընկնող մարդկանց
յիշատակի յաւերժացում։ Երկուսն էլ որպէս գաղափար,
զգացում և ապրում, սրտակից են եղել հայ ժողովրդի
բոլոր զաւակներին։ Երբե՛ք չպիտի դարմանալ, որ եր-
կուսն էլ ծնունդ են առել հայ ժողովրդի ծագման ա-
ռաջին իսկ օրերին և եղել են Հայկ Նահապետի անդրա-
նիկ մտայղացումները։

Երբ վերոյիշեալ մտայղացումների ներքոյ քըն-
նենք նաև Մեծ Եղեռնի ժամանակաշրջանը և տակաւին
յիսուն տարիներ յետոյ նրանց յիշատակի հանդէպ հայ
ժողովրդի ունեցած յարգանքը, պիտի նկատենք, որ դար-
ձեալ ազատութիւն և գերեզման իրենց հարազատ բովան-
դակութեամբ պիտի ցոլան կենդանի մարդկանց և մե-
ռելների միջև։ Մեր ամբողջ ազատագրութեան պատմու-
թիւնը իր համար որպէս մզիչ ոյժ ունի բռնապետու-

թեան դէմ դուրս գալու և օտարի կեղեքումներից ու
ճնշումներից ազատագրւած անկաշկանդ, խաղաղ և ան-
դորր կեանք վարելու և իր հայրենի հողը շէնացնելու
գաղափարը. և այս առաւել ևս ենթահող գտաւ, երբ կե-
ղեքումները, ճնշումները, ձերբակալութիւնները և ջար-
դերը սկսեցին և այդ իսկ պատճառով անմարդկային վե-
րաբերմունքի և բռնադատութիւնների դէմ ինքնապաշտ-
պանութեան դիմեց հայ ժողովուրդը։ Անձեռնտու պայ-
մանների ներքոյ, միջազգային կեանքում հայ ժողովրդի
անուընթաց քաւական հոլովեց և ի վերջոյ լուութեան դա-
տապարտեց։

Եկեղեցի և ազգային իշխանութիւն, քաղաքական
կազմակերպութիւններ, ազգայիններ և հայ ժողովուրդը
ներկայացնող ամէն տեսակի խաւեր մի անգամ ևս, և
այս անգամ աւելի ուժեղ կերպով, մտածեցին և տենչա-
ցին ազատութեան։ Ազատութիւն՝ կեանքի ապահովութեան
համար. ազատութիւն՝ ունեցւածքի պահպանութեան հա-
մար, ազատութիւն՝ առօրեայ աշխատանքի համար, ազա-
տութիւն՝ մտածումների և գաղափարների արտայայտու-
թեան համար, ազատութիւն՝ ամէն տեսակ մարգերում,
որպէսզի մարդավայել կեանք ապրեն և զարկ տան ազ-
գային մշակոյթի ուղեւորման։

Այդ շրջանի քաղաքական գոյավիճակի մասին
պատմութեան գրքերում արդէն իսկ լայնօրէն վերլու-
ծումներ կատարւել են, իւրաքանչիւր հայ առաւել և
նւազ չափով տեղեակ է անց ու դարձերին, և այսօր, յի-
սուն տարիներ յետոյ, աւելի խաղաղ ձևով կարող է գը-
նահատանքի և վերլուծումի ենթարկել կատարւած գոհո-
ղութիւնները, և տակաւին, եթէ երբեք վաւերաթղթերը
ամբողջութեամբ բոլորի սեփականութիւն դառնան, աւելի
ևս լայնօրէն և պարզ ձևով կարելի է մտածել պատասխա-
նատուների և կատարւածի մասին։

Բայց ի՞նչ էլ լինեն պայմանները և մասնաւորաւ ջար Երբ նկատի ունենանք Եղեռնի նախորդ շրջանները, մասնաւանդ ժԹ դարի վերջաւորութեան կատարած ջարգերը, պիտի նկատենք, որ ամէն տեսակի շարժումները և այդ շրջաններին սկիզբ առնող կազմակերպութիւնները գլխաւորաբար մտածում էին ազատութեան իրականացման և այդ նպատակի համար պատրաստ էին ամէն ինչ զոհելու: Տակաւին այդ ժամանակաշրջանը մեզ համար թարմ պատմութիւն է, թերևս չգրւած պատմութիւն: Ականատեսները շատ են, շատերի սեփականութիւնն են դարձել արդէն անձնական վկայութիւններն ու յուշագրութիւնները: Մեր քննութիւններն ինչքան էլ խորացնենք ու մանրամասնութիւնների մէջ մտնենք, այնտեղ պիտի նկատենք հայ ժողովրդի գերագոյն ճիգը, բռնութիւնից և ճնշումներից դուրս գալու և ազատ պայմանների տակ ապահով վիճակում ապրելու տենչը, և այս՝ միշտ էլ հայ ժողովրդի ճիգն է եղել դարերի ընթացքում: Եղածն էլ մի արդար պահանջ է, որին ձգտում են բոլոր ազգերը, և մենք, այս յիսուն տարիների ընթացքում, ակնատես ենք եղել աշխարհագրութեան քարտէզի բազմիցս փոփոխութեան և նորագատ պետութիւնների հրշակման:

Սահմանադրութիւն, բարենորոգում, կնքւած դաշնագրեր, պաշտօնական խօսակցութիւններ միշտ էլ իրենց ենթահողն ունեն՝ ազատութեան ձգտումն ու հայ ժողովրդի իղձերի իրականացումը: Վաւերաթղթերը, և մասնաւանդ մօտաւոր պատմութիւնը, վկայ են կատարած բոլոր աշխատանքներին և այդ գաղափարի գործադրման ճիգին, թափւող արիւններին և քաջամարտիկ ռազմիկների նահատակութեան, և դրանցից յետոյ սկսւող արեւաշող արշալոյսներին:

Եթէ երբե՛ք մէկ միլիոնից աւելի նահատակներ

նազմադաշտում չզոհւեցին, որովհետեւ պատմութեան ծառնօթ ճակատամարտներից չէր կատարւածը: Եթէ երբե՛ք հաւասարէ հաւասար մղւող կուրի դաշտում զոհողներ չնկատուեցին նրանք, որովհետեւ մեզ ծանօթ պատերազմը, իր լայն առումով, տեղի չունեցաւ երկու ազգերի միջև: Եթէ երբե՛ք համաշխարհային պատերազմի ընթացքին այլ ազգերի նման ճակատից ճակատ բախումներ տեղի չունեցան և միայն մասնակի ինքնապաշտպանութեան դէպքեր պատահեցին, և պիտի ասել, որ եղածն էլ մեզ համար պատւաբեր նւաճումներ արձանագրեց, սակայն և այնպէս մեր նահատակները համարւեցին վասն հայրենեաց և վասն կրօնի ազատութեան համար ընկնող պանծալի նահատակներ և իրենց տօնակատարութեան առանձին օրն ունեցան օրացոյցի մէջ:

Ճիշտ է, որ նրանք գերեզման էլ չունեցան և տարտղնւեցին աւազների մէջ, սակայն ունեցան յուշարձաններ և մասնաւանդ՝ Ապրիլ 24-ի յիշատակի յաւերժացման մնայուն թւական և մեզ համար հայոց նահապետի լեզւից առաջին իսկ առիթով դուրս եկած բառը՝ գնրեզման: Իր ամենալայն բովանդակութեամբ իմաստ ստացաւ:

Մեռելներ, թէև անշիրիմ, նահատակներ թէև անգերեզման, մէկ միլիոն և աւելի գանկեր թէև առանց դագաղի, թաղումներ բիւր-բիւրերով, թէև առանց կրօնական պաշտամունքի և մօտաւոր սիրելիների ներկայութեան, սակայն և այնպէս իւրաքանչիւր տարին գէթ միայն մէկ օր խորագգած և համատարած սուգի կատարումով միշտ ներկայ մեր մտածումների և զգացումների մէջ: Գերեզմանի յարգանքը և պաշտամունքը միացած մեր զգացումներին, յաւիտենական կամար է կազմել ողջերի և մեռելների միջև: Եւ ճիշտ այս պատճառով է, որ այդ օրը մենք աւելի զգում ենք, քան թէ

խօսում> . մասնում ենք, քան թէ գրում . ապրում ենք, քան թէ գործում և իրենցով պաշտպանում, քան թէ նրանց պաշտպանում . մենք յարգում ենք, սիրում և մնում նրանց շնչի տակ և այս կենդանի և առողջ կապը գոգում, միացնում է ողջերը մեռելներին և եռանդ է տալիս մեր իրաւունքների պաշտպանութեան ճանապարհի վրայ կատարւող ամէն տեսակի ճիգերին: Բնական է, որ լաւագոյն պայմանների մէջ մեր պահանջների իրաւատէրը դառնալու համար մեզանից տարիներ և տարիներ պիտի պահանջւի: Բայց ի՞նչ կարող ենք անել, երբ պայմաններն անձեռնտու են: Սակայն, այս երբեք չի նշանակում թէ նրանք կը մոռացւեն որպէս նահատակներ և մանաւանդ որպէս մեր իղձերի ու տենչերի մարմնացումը համարւող կենդանի շողեր, ապրող գաղափարներ և վասն հայրենեաց և վասն կրօնի քաջամարտիկ նահատակներ:

Ազատութիւն և գերեզման, որպէս ըիւրեզանման մտածում, որպէս անդրանիկ ժառանգութիւն Հայկ Նահապետի կողմից կտակւած, որպէս հայ ժողովրդի խառնըլածքի լաւագոյն արտայայտութիւն, որպէս մեր տենչերի և իղձերի կենդանի յուշարձան, որպէս հայ ժողովրդի նկարագրի ամենացայտուն իրողութիւնը, որպէս բուն ինքը՝ հայ ժողովուրդը, եկել, խտացել և մարմնաւորւել են մէկ թւականի մէջ՝ ԱՊՐԻԼ 24:

Ապրիլ 24-ն այս օրերին դարձել է մեր հոգեոր արժէքների գնահատման, մեր նւաճումների ուժեղացման, մեր հաւաքական ուժերի և կարողութեան զօրացման, մեր իղձերի ու տենչերի իրագործման, մեր ճիգերի ամրապնդման և մանաւանդ մեր պահանջների հետապնդման և կորսւած իրաւունքների իրաւատէրը լինելու համար կատարւելիք միահամուռ աշխատանքի հանգրւան:

Եւ այս՝ վասն հայրենեաց և վասն կրօնի:

ՀԱՅ ԺՈՂՈՎՐԴԻ ԿՈՐՈՒՍՏԸ ԱՊՐԻԼԵԱՆ ԵՂԵՌՆԻՆ

Ասացե՛ք ցթագաւորն եւ ցբռնաւորսն,
թէ կորացարու՛ք եւ նսարու՛ք, զի անկաւ ի զլիսոց ձերոց պսակ փառաց ձերոց:

ԵՐԵՄԻԱ, ԺԳ. 18

ՀԱՅ ԺՈՂՈՎՐԴԻ ԿՈՐՈՒՍԵՐ ԱՊՐԻԼԵԱՆ ԵՂԵՌՆԻՆ

Հիմա, երբ արտասահմանի այլազան քաղաքներում ցրւած առաւել կամ նւազ չափով հանգստաւէտ պայմաններում, մտածում ենք յիսուն տարիներ առաջ կատարւած Եղեռնի մասին, բնականօրէն ամենից առաջ մեր մտքին պատկերանում է մէկ միլիոնից աւելի կորուստը և առաջին իսկ առիթով յայտարարում ենք, թէ արհաւիրքի այդ օրերին, երբ որոշել էր հայ ժողովրդի բնաջնջումը, մէկ միլիոնից աւելի անմեղ և անզէն ժողովուրդ նահատակւեց և փոքրաթիւ հայ ժողովուրդը ընդհանուր թւի համարեա մէկ երրորդը կորցրեց: Առաջին կորուստը, ուրեմն, նահատակների թիւն է, որ ծանրօրէն ճնշում է մեզ վրայ:

Բայց, եթէ երբեք մի քիչ ընդարձակենք մեր մըտածումը և հարցնենք թէ ի՞նչ էր ներկայացնում հայ ժողովուրդը իր երբեմնի օջախում, այն ժամանակ կատարւած հաշեկշիռը շատ աւելի ծանր պիտի կշռի եղած կորուստների վրայ: Անմիջապէս յայտնենք, որ թւաբանական ճշգրիտ հաշիւներ, և ոչ էլ վաւերական թւահամարներ չէ որ պիտի փորձենք տալ, այլ ընդհա-

նուր ձևով, ակնարկային հպումներով, հնարաւորութեան սահմաններում, կատարւած կորուստների յիշատակումն է որ պիտի կատարենք:

Ուրեմն, փորձենք ուրւագծային պատկերը տալ հայ ժողովրդի՝ Կիլիկիայում կամ օսմանեան կայսրութեան այլ շրջաններում:

Բոլորին յայտնի է, որ բիւզանդական կայսրութեան անկումից և Պոլսոյ գրաւումից յետոյ երկրի սահմաններում մնացած քրիստոնեայ բնիկ տարրերին կրօնական համայնքներ կազմելու առանձնաշնորհումներ տրւեցին, բացառիկ իրաւունքներով: Այդ իրաւունքներից օգտւեց նաև հայ ժողովուրդը:

Պոլիսը դարերի ընթացքին մեզ համար հայկական բովանդակութիւն ստացաւ և որպէս թիւ ու որակ բացառիկ հանգամանք գրաւեց. հայերն ընդհանրապէս սեփականատէրեր էին և ժառանգաբար իրենց պապենական օջախն ունէին:

Կիլիկիայում և այլ շրջաններում, ուր բազմամարդ թւով հայեր էին ապրում, մի պահ եթէ նկատի ջուներանք կատարւած ճնշումներն ու կեղեքումները, իւրաքանչիւր ընտանիք իր պապենական հողի վրայ էր, ունէր տուն և ստացւածք, և ո՞վ գիտէ, քանի՛ սերունդներ նոյն տան մէջ անց էին կացրել իրենց կեանքը, և որդւոց որդի փոխանցում կատարել:

Առաւելաբար ժողովրդի մեծագոյն տոկոսն իր սեփականութիւնն ունէր, և տան մէջ կային թանկարժէք իրեղէններ, և տակաւին այլազան տեսակի հարստութիւններ, իսկ գիւղերում ու գիւղաքաղաքներում հողն ամբողջապէս հայերի սեփականութիւնն էր, և շատ քիչ վայրերում գիւղատիրոջ ճորտերն էին:

Ուրեմն, մարդկային գոհերից բացի, երբ բոլոր շրջանները պարպւեցին, այն բոլոր կալւածներն ու տները,

այն բոլոր հողերն ու ապրանքները, որոնք հայ ժողովրդի սեփականութիւնն էին, ամբողջութեամբ գրաւեցին և տան իրեղէններն էլ կողոպտեցին: Հաւանաբար, եաթաղանի այն օրերին, ահ ու սարսափի մէջ, գտնւեցին պաղարիւն անձեր, որոնք հանդարտութեամբ մտածեցին նաեւ իրենց հետ առնելիք իրեղէնների մասին և առաջին իսկ առիթով տան կալւածագիրը վերցրին, և թերեւս մինչեւ այսօր ապահով պահւած կալւածագրեր և այլ վաւերական թղթեր կարելի է գտնել բազմաթիւ մարդկանց մօտ: Եթէ երբեք փորձենք դրամական արժէքի վերածել այն բոլոր հողերն ու ստացւածքները, որոնք հայ ժողովրդի սեփականութիւնն էին եղել, չգիտենք թէ ինչ ահռելի հաշիւների պիտի յանգենք: Այս եւս կազմում է մեծագոյն կորուստը հայ ժողովրդի համար:

Երբ փորձում ենք թւել կատարւած կորուստները, մեր մտքի առաջ գալիս է նաեւ իւրաքանչիւր հայի սեփական գործը: Հայերը յայտնի էին որպէս վաճառականներ, արհեստաւորներ և գործարանատէրեր: Գործի մարդ էին և շնորհիւ իրենց աշխատունակ խառնւածքին, ամէն տեղ հասել էին նախանձելի դիրքերի: Առեւտրական մարդում, շուկայում, արհեստների ասպարէզում, չէինք սըխալւի, եթէ ասէինք թէ հայերն առաջին կարգի վրայ էին գտնւում: Ամէն տեղ ստեղծել էին իրենց գործը, սեփական խանութ և սեփական գործ ունէին, պակաս չէր թիւը նաեւ այն անձանց, որոնք շնորհիւ իրենց ձեռներէցութեան՝ տէրն էին արդէն հսկայական գործերի ու գործարանների: Նրանք՝ իրենց դրամագլուխը դրել էին գործի մէջ և իրենց աշխատանքով աւելացնում էին ե՛ւ գործը ե՛ւ շահը: Եթէ երբե՛ք կարողանանք դրամական արժէքի վերածել արհեստների, առեւտրի եւ տնտեսական այլ մարդերում հայերին պատկանող գործերը, պիտի նկատենք, թէ ինչպիսի՛ հսկայական գործեր, ինչպիսի՛

դրամագլուխներ եւ ինչպիսի՛ ապրանքներ փչացւեցին եւ դրամական ի՛նչ կորուստ արժեց հայերի համար:

Գիտենք նաեւ, թէ հին-հին շրջաններից, վանքեր, եկեղեցիներ և բարեսիրական այլ հաստատութիւններ, իրենց սեփականութիւններն ունէին և նրանք վազձ անւան տակ ազգային սեփական կալւածներ էին: Նման սեփականութիւններ շատ ունէին ազգային Առաջնորդարանները: Տակաւին գիտենք նաեւ, թէ վանքերն ունէին իրենց գիւղերը և այնտեղ աշխատում էին բազմաթիւ գիւղացիներ, և այսպէս, հասութաբեր գիւղեր ու կալւածներ ազգի սեփականութիւնն էին: Նոյն ձեւով գրաւեցին նաեւ ազգային կալւածները, և այն եւս, որպէս կորուստ, կարելի է աւելացնել ժողովրդի ունեցած կորուստների վրայ:

Ազգային հաստատութիւնների շարքում կարելի է թւել եկեղեցիներն ու դպրոցները և այլ ազգապատկան հաստատութիւնները, որոնք կառուցւել էին բարերարութեամբ և կամ ժողովրդի լուծանքով: Վերջին շրջաններում հրատարակող հայրենակցական միութիւնների պատմութիւններում և կամ այլ յուշագրութիւնների մէջ շատ ենք հանդիպում յիշատակութիւնների ազգային սեփականութիւն համարող եկեղեցիների, դպրոցների եւ այլ հաստատութիւնների ու ոյակապ շէնքերի մասին: Որոնք չգիտենք այսօր կանգո՞ւն են, թէ աւերակ, բայց միայն գիտենք, որ մեզ համար այլեւս կորուստ են, եւ վստահաբար, աւերած վիճակում, եւ թերեւս շատերի հետքն իսկ անհնար է գտնել: Այս եւս կորուստ է մեզ համար եւ ցաւով ենք յիշում, թէ ինչպի՛սի սքանչելի շէնքեր քանդւեցին եւ ոչնչացւեցին, եւ նրանց դրամական արժեւորումը ո՞վ գիտէ ինչքա՛ն է:

Մեր սեփական հողերի վրայ կային նաեւ պատմական կոթողներ, ճարտարապետական գլուխ գործոց վան-

քեր ու եկեղեցիներ, որոնք մինչև այսօր իրենց սքանչելի կառուցւածքով բոլոր այցելուներին հիացում և զարմանք են պատճառում: Այսօր այդ վայրերն ամայի են և բնութիւնն իր դրոշմը դրել է սքանչելի հնութիւնների վրայ. նրանք ենթակայ են քայքայման և փլուզման. ո՞վ պիտի պահպանի և առաջն առնի բնութեան աւերների: Միջազգային մամուլում յաճախ նկատում ենք նըկարագարդ յուշագրութիւններ, ճամբու նօթեր, և մեր ազգային հպարտութիւնը շոյոււմ է կատարւած ներքողներով ու հիացիկ արտայայտութիւններով, և առաւել հրճւանքով ենք լեցւում, երբ ակնարկում են նաեւ թէ այդ սքանչելի կոթողներն ո՛ւմ գործն են և այնտեղ ո՞վքեր են ապրել և ո՛ւմ սեփականութիւնն են եղել:

Բայց գլխաւոր մտահոգութիւնը, որ բռնագրաւողից աւելի մերն է, նրանց պաշտպանութեան հարցն է: Իւրաքանչիւր պետութիւն հիանում է իր հնութիւններով և այդ գործի համար յատուկ հաստատութիւններ ու բազմաթիւ հիմնարկութիւններ կան, եւ անգին դրամ են տրամադրում հնագիտական վայրերը պահելու համար: Որեւէ երկրի այցելուների թիւը բազմացնելու գլխաւոր միջոցը հնագիտական վայրերի ձգողական ոյժն է: Որքան գիտենք, հիմիկւայ պատասխանատու անձերն այնքան էլ մտահոգ չեն այդ վայրերում գոյութիւն ունեցող սքանչելի կառուցումների պահպանման համար: Զգիտենք, պահակներ կա՞ն, թէ այդ պատահականութեան է թողնւած: Կարծում ենք, Իւնեսքոն էլ, որ անգին դրամներ է ծախսում հնագիտական արժէք ներկայացնող վայրերի վրայ, այդ ուղղութեամբ աշխատանք չի տանում: Բնականօրէն, շահագրգռւողն և հետաքրքրւողն էլ չկայ: Պատասխանատու պետութիւնն էլ այսքան տարիների ընթացքին ո՛չ միայն պատշաճ կարգադրութիւններ չարեց, այլ այդ ամբողջ վայրերն ամայի վիճա-

կուժ թողեց և խիստ արդելքներ դրեց այցելութիւնների նկատմամբ:

Մեզ համար նրանց պահպանութեան հարցը մտահոգութիւն է պատճառում, որովհետեւ եհակի կոթողներ են եւ նոր կառուցումները ինչքան էլ շքեղ լինեն, չեն կարող նրանց փոխարինել: Նկատի ունենալով նման կառուցումները եւ կոթողները, առ այժմ նրանք էլ կորուստների մէջ են մտնում եւ այժմեան վիճակը ցաւ է պատճառում բոլորին:

Հիմնական կորուստի շարքին կարելի է նկատել նաեւ ձեռագիր մատեանները, որոնցից միայն շատ քչերը փրկւեցին, իսկ մնացեալների մասին որեւէ տեղեկութիւն չուենք: Այրւեցի՞ն, փչացւեցի՞ն, թէ մնում են թագուն, մի օր այս կամ այն կողմից գտնւելու համար: Ամէն պարագային, մեծ եկեղեցիներին կից մատենադարաններ կային, ուր խնամքով պահուում էին ձեռագիր մատեաններ, որոնց մէկ մասի ցուցակագրութիւնը կատարւել է և ձեռագրերի բովանդակութիւնը ծանօթ է մեզ, իսկ մէկ մասն անծանօթ վիճակում է մնացել:

Ձեռագիր մատեանների հետ պիտի աւելացնել նաեւ ոսկերչական այն նուրբ գործերը, որոնք եկեղեցու սեփականութիւնն էին կամ թէ մնում էին մասնաւոր հաստատութիւնների և տների մէջ, նրանք էլ կողոպտւեցին եւ անհետ կորան, պատճառելով մեծ կորուստ՝ հայ ժողովրդի ազգային ունեցւածքի վրայ:

Այսպէս, ուրեմն, Մեծ Եղեռնին նիւթական և բարոյական անհամար հարստութիւններ զոհ գնացին և մեզ համար ներկայացնում են որպէս անվերադարձ կորուստ: Ո՞վ և ի՞նչպէս պիտի կարողանայ ստանալ՝ այս օրերի սնանկ պետութիւն ներկայացող երկրից հայ ժողովրդի կորցրած հողային և գրամական արդար իրաւունքները:

Տակաւին վերոյիշեալների վրայ կարելի է աւել-

լացնել գուտ դրամական կորուստները, որոնք պատահեցին կողոպուտների ընթացքում և կամ այն բոլոր աւանդ գումարները, որոնք պահ էին տրւած դրամատներին և պատկանում էին անհատ հայերի և կամ հաստատութիւնների: Չգիտենք, թէ ի՞նչ ճակատագիր վիճակեց նրանց, բայց, վստահաբար, նրանք ևս համարւեցին կորուստ հայ ժողովրդի ունեցւածքի վրայ:

Արդ, ուրւագծային յիշատակութեամբ, ուրեմն, Մեծ Եղեռնին որպէս կորուստ ունեցանք մէկ միլիոն հայութիւն, տոււն և այլ սեփականութիւններ, գործի, ունեցւածքի, աւանդ գումարների, կալւածների, մշակութային հաստատութիւնների և տակաւին բազմաթիւ այլ ունեցւածքների, որոնց դրամական փոխարժէքը գլխապըտոյտ պատճառելու չափ անհաշւելի է:

Մանր կորուստները ժամանակի ընթացքին մոռացւում են, դրամական արժէք ունեցող այլ կորուստներն էլ թերեւս մոռացութեան տրւեն, բայց հիմնական կորուստները մնում են և յիշուում դարերի ընթացքում:

Ամենից աւելի հիմնական կորուստ համարւեց հողային սեփականութիւնը, որովհետեւ այն բոլոր պապենական օջախներում, ուր բազմամբոխ ներկայութեամբ հայերն էին ապրում, պարպւեցին և համարւեցին «Հայկական Դատ» բնորոշումով ծանօթ հողային պահանջի խնդիրը: Հակառակ բազմիցս խնդրոյ առարկայ դառնալուն և միջազգային դաշնագրերում նախատեսւած լինելուն, հայ ժողովրդին պատկանող հողերն ամբողջութեամբ պարպւեցին իրենց բուն իրաւատէրից, և մինչեւ այսօր էլ մնում են ամայի ու աւերակ վիճակում:

Մեծ Եղեռնի ընթացքին, հայ ժողովրդի ունեցած կորուստների մէջ թերեւս շատերն անհետ և անվերադարձ կորուստ համարւեն, բայց ինչ որ թերեւս բուն պատճառն էր նաեւ Եղեռնի, սպառնդի, տեղահանութեան,

ցեղասպանութեան, մնալով հանդերձ որպէս կորուստ, տակաւին երկար ժամանակ պիտի շարունակւի յիշատակւել, յաճախակի առիթներով արծարծւել, մինչև որ մի օր կարելի լինի իրաւագրկւած ազգերի վիճակով զրազւող դիւանագիտական ներկայացուցիչների ուշադրութեանը յանձնել, և գէթ այս կերպով բազմաթիւ կորուստներից մէկը փրկել:

Ո՞վ գիտէ, գուցէ մի օր, գեղածիժաղ մի առաւօտ, չգիտենք մօտաւոր թէ հեռաւոր ապագայում, ամբողջ մարդկութեան ցնծութեամբ աւետենք, թէ հայ ժողովուրդը, շնորհիւ իր տոկունութեան, համբերութեան ու աշխատասիրութեան, կարողացաւ տէր կանգնել մոռացելու վրայ եղող իր իրաւունքին: Եւ եթէ մի օր արգարացիօրէն լուծւի հայ ժողովրդի հողային խնդիրը, հաւանօրէն ինքնաբերաբար մոռացեն նաեւ միւս կորուստները, անշուշտ բացի մէկ միլիոն նահատակներից, որոնք յաւերժօրէն պիտի յիշատակւեն և մնան օրացոյցի մէջ, որպէս նոր օրերի նահատակներ:

Ահա, հպանցիկ ակնարկով ներկայացրինք այն, ինչ որ կորցրեց հայ ժողովուրդը Մեծ Եղեռնին: Իսկ թէ ի՞նչ կատարւեց այս վերջին յիսուն տարիների ընթացքում, հայի և թուրքի համար, այդ այլ պատմութիւն է:

ՀԱՅՑ. ԵԿԵՂԵՑՈՒ ԿՈՐՈՒՍՏԸ ԱՊՐԻԼԵԱՆ ԵՂԵՌՆԻՆ

Առաջնորդ եղեն մեզ ուղիղ գնացիւք ի շաւիղս արխայութեան նրկնից. մեծապայծառ ջահիւ՝ հաւատով եւ սիրովն իւրեանց, ծագեցին զլոյս ասուածգիտութեան ի սիրսս մեր:

ԺԱՄԱԳԻՐՔ

ՀԱՅՑ. ԵԿԵՂԵՑՈՒ ԿՈՐՈՒՍՏԸ ԱՊՐԻԼԵԱՆ ԵՂԵՌՆԻՆ

Ապրիլեան Եղեռնի ոգեկոչումով լեցւած այս օրերերին, երբ անդրադառնում ենք հայ ժողովրդի ունեցած կորուստների մասին, նիւթական, բարոյական և թւական մարգերում, ցաւով յիշատակում ենք նաև եկեղեցու կրած կորուստը, իր ամենալայն տարողութեամբ:

Հայ ժողովրդի ազգային և մշակութային կեանքում գլխաւոր դերակատար հանդիսացաւ նաև եկեղեցին, և իր ազգային լինելու հանգամանքը՝ իր մէջ բովանդակեց հայ ժողովրդի այլազան խաւերն ու հոսանքները և ճգնաժամային պահերին իր լայն մասնակցութիւնը բերեց ազատագրական շարժումներին կաթողիկոսների և պատրիարքների վերին հովանաւորութեամբ:

Եկեղեցին, իր սկզբնական շրջաններից մինչև այսօր, պահեց իր բարոյական հեղինակութիւնը, եղաւ մօտիկ թագաւորին, նախարարին, իշխանին, ժողովրդին, ժամանակի պահանջների և մտայնութեան համաձայն: Միշտ էլ պահեց իր պատկառանքը և իր ներկայութեամբ հանդիսացաւ ոյժ և հեղինակութիւն առաւել և նւազ շափով գործօն մասնակցութեամբ, բոլոր ժամանակների ըն-

Թացքում: Եթէ երբե՛ք բաւարար ու գոհացուցիչ խղճմը-տութեամբ նկատի առնւի եկեղեցու ունեցած ոյժը՝ ազգային և մշակութային կեանքում, այն ժամանակ մեր ունեցած յարգանքին, սիրոյն և պատկառանքին պիտի միանայ նաև մեր խորունկ հաւատքը հայ ժողովրդի և եկեղեցու անքակտելի միութեան և նրա մեծութեան, բարոյական ոյժին ու հեղինակութեան:

Աւելորդ կրկնողութիւն է այլևս խօսել եկեղեցու դերի և դիրքի մասին, մասնաւորաբար այս օրերին, երբ ամենայն լրջութեամբ գիտակցում ենք թէ մեր ազգային կեանքը իր վարչական այլազան բաժիններով հիւսուում է եկեղեցու մէջ, եկեղեցու շուրջ և եկեղեցու հետ: Այստեղ պիտի չմոռանալ նաև այդ հսկայ հաստատութիւնը առոյգ և կանգուն պահող անհատներին, հոգևորական կամ աշխարհական, որոնք իրենց անձնագոհութեամբ միշտ էլ անսասան են պահում նրա հիմքը:

Վարչական մարզում աւելի դերակատար հանդիսացաւ եկեղեցին ժԼ և ԺԹ դարերում, երբ աստիճանաբար առանձին ուշադրութեամբ օրինական հիմունք ըստացաւ նրա կազմակերպութիւնը, ազգային և եկեղեցական գործերի կենտրոնացումով և վարչական ժողովներով:

Կաթողիկոսարան, պատրիարքարան և առաջնորդարան գլխաւոր կենտրոններն էին հայ ժողովրդի ներքին գործերի կառավարման և մասնաւորաբար հանդիսանում էին նաև ժողովրդի և պետութեան միջնորդ օղակը:

Օսմանեան կայսրութեան մէջ, շնորհիւ տրւած իրաւունքների, որոնք հեղինակութիւն էին ստանում կայսերական ֆերմաններով, եկեղեցին ներկայացրեց նաև հայ ժողովրդի և պետութեան միջև յարաբերող իրաւասու հաստատութիւնը:

Շնորհիւ այդ օրերի լայնախոհ մտայնութեան, ամենուրեք կազմակերպեցին թեմերը և վարչական մեքենան միատեսակ հոլովոյթ և ընթացք ստացաւ: Պետութեան կողմից ճանաչւած օրէնքն էր հիմքը ներքին ընտրութիւնների եւ վարչական ժողովների:

Տարիների ընթացքում, ամէն տեղ կառուցեցին առաջնորդարաններ, եկեղեցիներ և կազմակերպեցին թեմեր: Իսկ ԺԹ դարում, շնորհիւ Օրմանեան և Գուրեան սրբազանների թափած ջանքերի, օրւայ պայմաններին համապատասխանող եկեղեցականներ, կուսակրօն կամ ամուսնացեալ, յատուկ շքեղութիւն տւեցին եկեղեցական կեանքին: Ուսումն այլևս եկեղեցականութեան գլխաւոր հիմքն էր: Առաջնորդներ, քարոզիչներ և քահանաներ գործօն մասնակցութիւն ունէին կրօնական, ազգային և մշակութային կեանքում: Արմաշի Գարեվանքը կարճ ժամանակամիջոցում արդէն իսկ յիշեցնում էր հին շրջանների վանքերը, ուր ծաղկողներ, գրիչներ ու պատմիչներ կեանք էին տալիս ձեռագիր մատեաններին: Պոլսոյ թաղային եկեղեցիներն արդէն իսկ օժտւել էին քարոզիչ վարդապետներով, իսկ գաւառները՝ առաջնորդներով: Եկեղեցին վերագարթնումի մէջ էր, և ամենուրեք շնորհակալ նւաճումներ էին կատարւում:

Արեւմտահայութիւնը, այդ ժամանակաշրջանում, այլազան գիւղերում և քաղաքներում 2000-ից աւելի եկեղեցիներ և վանքեր ունէր, բոլորն էլ համապատասխան եկեղեցականներով: Եկեղեցին ծաղկման մէջ էր՝ ապրում և գիտակից լուսաւորութեան մի նոր շրջան էր սկսել հայ ժողովրդի համար:

Ծաղկման այդ շրջանին յանկարծակի վերիվայրումի ենթարկւեց նաև եկեղեցին: Եկեղեցու սրբազան իրերը կողոպտեցին, շէնքերը գրաււեցին, և երբ ժողովուրդը ամբողջութեամբ տարագրւեց, աւերւեցին և քար

և քանզի եղան այն բոլոր աղօթավայրերը, ուր սերունդներով ու սերունդներով ծունկի էր իջել հայ ժողովուրդը և իր արդար վաստակից բաժին հանել «Տիրոջ նըշխարի» համար:

Շէնքերի կորուստը, որոնց զբամական փոխարժէքն անպայման հսկայ գումարների է հասնում՝ նկատի ունենալով որ երկու հազարից աւելի եկեղեցիներ կային՝ մեզ համար համարուեց անվերադարձ կորուստ, որովհետև շատերի հետքն իսկ չի մնացել այս օրերին:

Տարագրութեան ճանապարհին ժողովրդի հետ քըշւեցին նաև եկեղեցու բարձրաստիճան հոգևորականները, առաջնորդներն ու վարդապետները, քարոզիչներն ու քահանաները, և շատերը, տակաւին իրենց երիտասարդական թարմ ուժերի մէջ, խոշտանգւեցին և սպանւեցին: Եաթաղանն իջնում էր նաև եկեղեցու սրտին, նրա զարկերակները դադարեցնելու համար: Մեծի Տանն Կիլիկիոյ կաթողիկոսութիւնը իր պատմական վայրից, Սսից տարագրւում էր ալեհեր Հայրապետով եւ փոքրաթիւ միաբանութեամբ: Վեհաբանն ու մայր տաճարը շուտով վերածւում էր աւերակի եւ այդ կերպով հին-հին յիշատակներ անհետ ջնջւում էին եւ դառնում՝ յուշ եւ յիշատակ: Ո՞վ գիտէ ինչպիսի դառնակսկիծ ապրումներ ունեցաւ հայոց ալեհեր Հայրապետը, երբ իրեն արմատախիլ էին անում մայր հողից: Եկեղեցական իրերից շատ քչերն է, որ կարողացան իրենց հետ փոխադրել, իսկ մընացեալները, դարաւոր արխիւների հետ, կողոպտւեցին եւ հրոյ ճարակ դարձան:

Արմաշի Դպրեվանքն ամբողջութեամբ քանդւում էր, եւ այնտեղ սկսւող կրօնական-մշակութային կեանքը թաղւում աւերակների տակ, իսկ այն սքանչելի սերունդը, Արմաշեան միաբանութիւնը, որ Պոլսում եւ գաւառներում տենդագին գործի էր լծւել, ամբողջու-



Մահաւասակ կեցակցութեան և զոհողութեան արձանագրութիւնները:


թեամբ սպանւում էր, սուգի մատնելով եկեղեցին: Քահանայից դասը, որ մինչև իսկ հեռաւոր գիւղերում հընչեցնում էր եկեղեցու զօղանջը, հայ գիւղացու աշխատանքին և երկրի բերքին Աստծոյ օրհնութիւնը հայցելու համար, զրեթէ մեծամասնութեամբ խոչտանդւում էր եւ սպանւում:

Այսպիսով, այն բոլոր անձինք նւիրեալները, որոնք եկեղեցու պայծառութեան և փարթամութեան համար իրենց աշխատանքն էին բերել, այն բոլոր մշակները, որոնք եկեղեցու տակաւ աղօտացող զահին և սեղանին ծիրանի էին հագցնում, ահա զոհւում էին որպէս կենդանի պատարագ եւ ողջակէզ:

Հետագային, երբ Ապրիլեան Եղեռնի մնացորդացը կայք հաստատեց այլազան երկրներում և գերագոյն զոհողութեամբ կարողացաւ մասամբ փարատել կատարւած կորուստները, եկեղեցին երկաթօրէն չկարողացաւ լեցնել հսկայ բացը և տակաւին մինչև այսօր զգալի է տարէջ սերնդի պակասը, մասնաւորաբար կուսակրօնների շարքում:

Տարագրւող ժողովուրդն էլ, ինքնակորոյս վիճակում, տկարացաւ ազգային-կրօնական սովորութիւնների մէջ, որոնք դարերի աւանդութեամբ յատուկ շքեղութիւն ունէին իր կրօնական կեանքում: Ուխտակատար սրբավայրերը քար ու քանդ եղան, կամ մնացին իրրեւ յիշատակ յուշագրական մատեաններում:

Այսպիսով, ուրեմն, տարագրւող ժողովուրդը հարկադրաբար լքում էր երկու հազարից աւելի վանք և եկեղեցի, իրենց նրբարեւատ հաստատութիւններով, ոսկերչական արւեստի գեղեցկութիւնները արտացոլող եկեղեցական իրերով, սրբազան մատեաններով և ամենից աւելի կսկծալին՝ բազմաթիւ նահատակ եկեղեցականներով: Եկեղեցական այնպիսի մի սերունդ էր առաջ ե-



ԱՄՈՒՐԻ ԶԻ

կել, որ ժողովուրդը հրճեազին հեռեւում էր նրանց միջոցով կատարւող նւաճումներին: Նրանք գիտակից իրենց կոչումին, հմուտ՝ եկեղեցական գիտելիքներին, օժտւած մտաւորական և վարչական կարողութիւններով, պանծացնում էին Հայց. եկեղեցու անունը: Արմաշը կարծես անցեալից յանկարծակի յայտնւող Հաղպատի կամ Սանահինի վանքն էր իր հմուտ և եռամեծար կղերականներով: Արմաշի երիտասարդ սերնդից հազիւ մի քանի հոգի ազատւեցին սպանդի ճիրաններից, մնացեալները օսմանեան կայսրութեան ոստիկանների կողմից առաջնորդւեցին անծանօթ վայրեր, և այնտեղ, ժողովրդի աչքից հեռու, քարերով կամ դաշոյններով սպանւեցին: Հաւատաւոր քահանաները նոյն ճակատագրին ենթարկւեցին: Հօտ եւ հովիւ միասին արտասուեցին ու ողբացին. կիլիկիոյ ծերունագարդ Հայրապետն այլեւս համարձակութիւն իսկ չունէր յետ դառնալու, որովհետեւ այնտեղ ամէն ինչ աւերակ էր եւ սուգի մէջ, իր եղբայրները խոշտանգւելէին եւ նահատակւել, նրանց սպանւած վայրն իսկ անծանօթ էր: Աղօթք ու խունկ... բայց որտե՞ղ, ո՞վ շիրիմ ունեցաւ, որ նահատակ եկեղեցականներն ունենային:

Ապրիլեան Եղեռնին մեծագոյն կորուստն ունեցաւ եկեղեցին՝ հոգեւորականների սպանութեամբ, եւ տակաւին, մինչեւ այսօր, հակառակ թափւող ճիգերի, հնարաւոր չեղաւ նրանց կորուստը դարմանել:

Սուրբ եւ աղօթք նրանց անշիրիմ, բայց անթառամ յիշատակին:



ՀԱՅ ՄՏԱԻՈՐԱԿԱՆՈՒԹԵԱՆ ԿՈՐՈՒՍՏԸ ԱՊՐԻԼԵԱՆ ԵՂԵՌՆԻՆ

Ճառագայթ փառաց...

ՀԱՅ ՄՏԱԻՈՐԱԿԱՆՈՒԹԵԱՆ ԿՈՐՈՒՍԸ ԱՊՐԻԼԵԱՆ ԵՂԵՌՆԻՆ

Ազգերի մեծութեան չափանիշը իրենց մշակոյթն է: Մշակոյթն էլ գոյակերտուում է մարդկանցով: Մարդիկ, որոնք իրենց պատրաստութեամբ, ուսումով և տաղանդով բաժանուում են սովորական մարդկանց խմբից, բարձրանում են ժողովրդի սովորական մակարդակից և կազմում են ներկայացուցչական տարրը՝ պատւաբեր նւաճումներ կատարողներին:

Մտաւորականը հասնում է բազմաթիւ տարիների պատրաստութեամբ, ի գին մեծ զոհողութիւնների, և իր գործունէութեամբ սատարում ժողովրդի վերելքին: Սլւեւտի ալլազան ճիւղերը իրենց յառաջադիմութիւնը պարտական են այն բացառիկ անհատներին, որոնք որպէս արդիւնք իրենց տքնաջան աշխատանքների, մնայուն գործեր են տալիս և իրենք էլ արժանանում յաւիտենական յիշատակութեան:

Մտաւորական տարրը հասարակութեան բարձրագոյն և վերին խաւն է: Կարելի է ասել մտաւորականը ժողովրդի ուղեղն է, իր մտածելու եւ գործելու հանգամանքով: Գիտութիւնը, արւեստը եւ մշակոյթը մտաւոր-

րականների միջոցով են ճոխացնում իրենց հարստութիւնը: Մտաւորականներն արւեստի այլազան մարգերում եւ կամ այլ ասպարէզներում իրենց մասնակցութիւնն են բերում եւ սատարում մշակոյթի ուճացմանը եւ այդպիսով բարձրացնում իրենց պատկանած ազգի անունը:

Ժամանակին հասարակական կեանքում մտաւորականները գրաւում էին առաջին տեղը: Նրանք էին գլխաւոր գերակատարներն ազգերի յարաբերական կեանքում: Շընորհիւ իրենց ստեղծագործութիւնների՝ մեծ արւեստագէտները դառնում էին համամարդկային դէմքեր: Գաւառներում, ուր դպրոցական ցանցը քիչ տարողութիւն ունէր, մտաւոր լուսաւորութիւնը նւազ չափով էր տարածւում և մշակութային նւաճումները թեթեւակի կերպով թափանցում, գրաճանաչը հանդիսանում էր մեծագոյն անձնաւորութիւնը եւ բոլորի կողմից արժանանում էր յարգանքի ու պատէի: Մասնաւորաբար Արեւելքում այսպէս էր ընդհանուր կացութիւնը:

Ժողովրդի մտաւոր լուսաւորութիւնը կատարւում է մտաւորականների եւ մասնաւորաբար կրթական մըշակների միջոցով, կարեւոր էլ չէ թէ նրանք թւով շատ լինեն, միշտ որակն է որ մեծ կշիռ է ունենում: Պատմութեան ընթացքում դարաշրջաններ կան, հանգրւաններ կան, որոնք անձերի անուններով են յատկանշւում: Նրանք բացառիկ կարողութեամբ անհատներ են, որ անջատւում են մարդկանց հաւասար դաշտից, կազմում են բարձրաբերձ լեռներ ու տեսնւում բոլորի կողմից, կամ այլ բացատրութեամբ՝ նրանք շողացող աստղեր են, որոնց ամպերն իսկ չեն կարող ծածկել մարդկանց աչքերից:

Մեր ազգային կեանքում եւս գլխաւոր գերակատարները հանդիսացել են մտաւորականները: Ոսկեդարն էլ որ աննախընթաց երեւոյթ էր այդ շրջանի ընդհանուր ազգերի պատմութեան մէջ, իր յաջողութիւնը պարտա-

կան է փոքրաթիւ մտաւորականների խմբին: Մի խումբ նւիրեալներ նոր դարաշրջան բացեցին մեր ամբողջ ազգի համար: Ամբողջ Հայաստան աշխարհի մտաւոր լուսաւորութիւնը Մեսրոպեան խմբի շնորհիւ կատարեց: Ժողովրդական լայն խաւերի մէջ ուսումը տարածւեց անձնագոհ եւ նւիրեալ մարդկանց աշխատանքով: Այնուհետեւ, դժւարին պայմաններում, մշակոյթը նւաճումներ արձանագրեց շնորհիւ անխոնջ մշակների, որոնց անունները յաւերժացել են հայոց դպրութեան մատեանում:

Իւրաքանչիւր ժամանակաշրջան տւել է իր դրոշմը պատմաբանի եւ գրողի աշխարհայեացքին եւ այսօր մեզ փոխանցւած գործերի միջոցով հեշտութեամբ կարողանում ենք ապրել բոլոր ժամանակաշրջանների հոգեվիճակը: Ճիշտ է, որ ամբողջ հայ ժողովուրդը իր հաւաքական կեանքով մտաւոր լուսաւորութիւն չի ստացել երկար դարերի ընթացքում, բայց կատարած բթէ համեմատութեան մէջ դնենք դրացի ազգերի մշակոյթի հետ, պիտի նկատենք, որ եղածն էլ պատւաբեր նւաճում է:

Եթէ երբեք առաջինը չենք, վերջինն էլ չենք, առաջինների շարքումն ենք կանգնած. վկայ մեր մշակոյթը:

ԺԹ դարում հայոց գրական լեզուն իր վերջնական կազմաւորումն ստացաւ, իր արեւելյահայ եւ արեւմրտահայ ճիւղերով: Իպրոցներ, գրքեր, թերթեր ու այլագան տեսակի հրատարակութիւններ սերտ կապ ստեղծեցին ժողովրդի լայն խաւերի եւ մշակոյթի միջեւ: Եւրոպական ուստաններում իրենց կրթութիւնը ստացած մտաւորականներ, տոգորւած հայրենի մշակոյթով եւ լեցւած գործելու աւիւնով, լծւեցին գործի: Մշակոյթի կենտրոններ դարձան Պոլիսը, Թիֆլիսը, Իզմիրը, Վասպուրականը եւ այլ շրջաններ, իրենց դպրոցներով ու վանքերով:

Պոլսում մասնաւորաբար հայ ժողովրդի արեւմը-

տեան թեւը իրրեւ քանակ և որակ ստացաւ իր հայեցի կազմաւորումը: Բազմաթիւ վայրերից Պոլիս փոխադրեցին և տարէց տարի կատարւած նւաճումները ստեղծեցին հայկական Պոլիսը, և այդպիսով նա դարձաւ մշակութային նախանձեյի մի կենտրոն: Աստիճանաբար կազմակերպւեցին նաեւ դաւառներն ու շրջանները, ուր մամուլը ևս իր փրկարար դերը կատարեց: Գարոցն ընդարձակեց իր ցանցը և յայն խաւերի գաւազներին ընդունեց իր մէջ: Գրականագէտները ստեղծագործական և թարգմանչական աշխատանքներով նոր շունչ, նոր եռանդ, թափ ու թռիչք ներշնչեցին երիտասարդութեան. գրականութիւնն արագաթռիչ ուստումներ կատարեց և նորանոր նրւաճումներն ուղեւորին հայոց մշակոյթը: Գիրն ու գրականութիւնը մուտք գործեց ընտանիքների մէջ, մեծ յեղաշրջում կատարեց հայկական կեանքում: 1860-ական թւականներին հայ ժողովուրդը զարթօնքի շրջան էր ապրում:

Ընկերային և հասարակական կեանքն ևս նոր կազմաւորում և նոր թափ ստացաւ: Հայ ժողովրդի վարչական կեանքը փոխւեց, ամիրայական քմահաճ կարգադրութիւնների փոխարէն, ժողովրդավարական հիմունքներով, սահմանադրական օրէնքներ մշակւեցին: Սերտ գործակցութիւն ստեղծւեց ժողովրդի և ազգային իշխանութեան միջեւ և այս բոլորը կատարւեց շնորհիւ Եւրոպայից վերադարձող երիտասարդ մտաւորականների տքնաշան ու կորովի աշխատանքների և կրթական բազմաթիւ մշակների եռանդուն ջանքերի: Գարոցը, թատրոնը, մամուլը, դասախօսութիւնները և այլ ձեռնարկները նոր ձեւաւորում տւին ազգային-հասարակական կեանքին: ԺԹ դարի վերջաւորութեան մտաւորականների խումբն արդէն իսկ մեծ նւաճումներ ձեռք բերեց: Այսպէս, խաղաղ պայմաններում ուղեւորում և զարգանում էր հայոց

մշակոյթը: Հայ ժողովուրդը վերելքի մէջ էր:

Ի. դարում արեւմտահայութիւնը վայելում էր արդէն գրականութեան և արեստի այլ մարզերում կատարող նւաճումների արդիւնքը: Տքնաջան աշխատանքներն ու մեծ գոհողութիւններն արդիւնաւորեցին, այլևս հայ ժողովրդի մեծագոյն գանգաւոր մօտիկ էր Եւրոպական առումով նրբագոյն ճաշակների: Գեղարեստագէտ սերունդն իր դրոշմը դրեց էր օր քստ օրէ աճող գրականութեան վրայ: Հրատարակութիւններն իրար էին յաջորդում: Ուղեւորում էր հայոց մշակոյթը և իր հետ բարձրացնում հայ ժողովրդի անունը: Դաստիարակում և կրթում էին երիտասարդները, և իրենց ծառայութեամբ պատիւ բերում ազգին: Գրականութիւնը, շնորհիւ տաղանդաւոր մշակների, համարեա թէ հասել էր իր գագաթնակէտին և իրաւամբ այդ շրջանը գրական քրննադատների կողմից քննորոշում է արեւսագէտ սերնդի արջան: Այնտեղ էին Կոմիտասը, Գանիէլ Վարուժանը, Սիւսաննան, Գրիգոր Զօհրապը, Զարդարեանը, Սենուսիկ, Ինտրան, Ռ. Սեակը, և խումբը մեծ մտաւորականների: Ինչքա՞ն լոյս, ինչքա՞ն եռանդ, ինչքա՞ն ստեղծագործութիւն կար այդ շրջանում: Լոյսի աղբիւրը մօտ էր բոլորին և նրանք բմբոխյնում էին կատարւած նւաճումները: Երանելի վիճակ, երանելի օրեր, հայ մշակոյթի գարուն օրեր, ծաղկուն ուստաններ:

Բայց յանկարծակի խաւարն իջաւ բոլորի վրայ, մթազնեց հայոց պայծառ երկինքը, վերիվայրումների ենթարկւեց ամբողջ հայկական կեանքը: Հայ մտաւորականները ժողովրդի հետ ապրեցին 1895-ի ջարդերը, որին հետեւեց 1915-ի Եղեռնը:

Բոլոր ցաւայի պատահարները իրենց արձագանգը գտան մտաւորականների ապրումների մէջ և այդ շրջանի ստեղծագործութիւններն ամբողջութեամբ դար-

ձան ողբի, լացի ու արցունքի տաղեր. ցաւ ու վիշտ էր երգում հայ երգիչը: Ողբի ու կոծի մէջ հայոց քնարը դարձաւ միայլար: Սեւ խաւարը դարձաւ հային ընկեր, այլեւս բնութիւնը իր բազմահրաշ Երեւոյթներով չէր ներշնչում բանաստեղծին: Հայ ժողովուրդը հրկիզում էր ջարդւում էր. ողբասացներ էին դարձել բոլոր տաղերգուները: Արցունք ու լաց էր երգում հայի սիրտը: Գարաւոր ոտիւր դարձել էր հայ հոգիների ամենից տիրական սարսափը, զոհերի արիւնը միշտ թաց էր մնում հայ գրականագէտների երգերի մէջ: Սկսել էր հայ ժողովրդի Գողգոթան և այնտեղ հիւսւում ու երգւում էին միայն տխուր երգեր:

Արեւմտահայութեան մշակութային կենտրոնները պարպւում են իրենց բովանդակութիւնից: Մտաջին իսկ առիթով ձերբակալւում են մտաւորականները և առաջնորդւում բանտ: 1915-ի Ապրիլի 24-ին, տակաւին լոյսը չբացւած, տաճիկ ոստիկանները, տրւած հրահանգի և ցուցակի համաձայն, ձերբակալւում են մտաւորականներին և աչքի ընկնող ազգային գործիչներին:

Պատճառաբանութիւն և հարցաքննութիւն չկար: Շփոթի, լացի, սուղի օրն սկսել էր արդէն: Բազմահարիւր ընտանիքներ իրար էին անցել և խուճապի ենթարկւել: Կրթական մշակներ, մամուլի աշխատակիցներ, մտաւորականներ, ազգայիններ լցրել էին արդէն բանտերը: Ապրիլի 24-ին չարաշուք օր էր սկսւում հայ ժողովրդի համար: Լացն ու կոծը զալիս էր հայ տներից, ձերբակալւածներից լուր չկար, ազատ մնացողների վիճակն էլ անորոշ էր: Յանկարծակի տուն էին մտնում, կողոպտում էին տան իրեղէնները, ձերբակալւածներին տանում էին անձանօթ ուղիներ և այնտեղ սպանում: Երիտասարդ հարսերին և աղջիկներին այլ ճակատագիր էր սպասում: Երեխաներին, եթէ ողջ թողնէին, յանձնում էին որբա-

հաւաք օտար հաստատութիւններ: Ո՞վ կարող էր դիմադրել, ո՞վ կարող էր ընդդիմանալ: Սարսափի, վախի և սպանդի օրերն սկսել էին:

Այսպէս, մեր աննման ու տաղանդաւոր մտաւորականները տակաւին ստեղծագործելու աւիւնով լեցւած, ձերբա-



Նահասակ գրագէտների և ազգ. գործիչների մի հոլլ.

կալւում էին և աքսորւում: Երկար տարիների պատրաստութեամբ հասարակական կեանքի մէջ արդէն իսկ մնալուն տեղ գրաւած և օր ըստ օրէ նւաճումներ արձանագրող բանաստեղծներն ու արձակագիրները յանկարծ-

օրէն շիջում էին: Արիւնարթու թշնամու թաթը իջնում էր նրանց վրայ և նրանք դադարում էին ստեղծագործելուց: Ինչքան առոյգ ու կենսունակ և իրենց սքանչելի տեսիլներով ու ապրումներով մտաւորականներ անձանօթ վայրերում խոշտանգւեցին ու սպանւեցին:

Ապրիլի 24-ին լոեց «Հորովել, հօ»-ն, եղեգնեայ գրչով փառքեր երգող ու ցեղի սիրտը լսելի դարձնող գրիչը փշրւեց: «Հողեվարքի և յոյսի ջահեր» փոթորկող երգիչը չքացաւ, «Լուռ ցաւերը» յաւիտենական ցաւերի վերածւեցին, և պանդուխտի երգեր հիւսող տաղասացները դարձան պանդուխտ ու աքսորական: Փշրւեցին և կըտըրւեցին բոլոր գրիչները: Հայոց գրականութիւնը որբացաւ, հայոց մշակոյթը ամայացաւ, հայոց երգիքները սուգ հագան: Չորանալիք ձեռքերը շխնայեցին աննման տաղանդներին, փայլուն ստեղծագործողներին, և բոլորին բոլորին, ովքեր ներկայացնում էին հայ ժողովրդի լաւագոյն դասակարգը, մտաւորականների անդերագանցելի փաղանգը:

Հայոց երկինքը մթազնեց, խաւար պատեց լոյսեր բաշխող հայ դպրութեան օջախների վրայ, բեռնատար կառքերով, սայլերով ու հետիոտն, սւիների սարսափի տակ, մեր մշակոյթի ջահակիրները առաջնորդւեցին ամայի վայրեր, քարերով, սուրբերով, բուս դանակներով խողխողեցին ու նրանց համբուրելի ուղեղները փշրւեցին: Անգութ ձեռքեր, յաւիտենական անէծքի արժանի ոճրագործներ, յօշոտեցին բոլորին: Չոհեցին և լոեցին անդերագանցելի երգիչները, ընկան նըրանք հայրենիքի ազատութեան համար: Հոսեց նրանց արիւնը հայոց մշակոյթի համար: Նրանք ընկան ո՛չ թէ հայրենական մարտում, այլ գազանային գործերի հմուտ բարբարոս մարդկանց ձեռքով:

Հազորդւելու համար նրանց սրբազան յիշատա-

կով, սարսուռով ու դողացող մարմնով, յիշատակենք մի քանիսի անուանները. — Դանիէլ Վարուժան, Սիամանթօ, Գը-



ՆԱԼԱՏԱԿ ԳՐԱԳԷՏՆԵՐԻ ԵՒ ԱԶԳ. ԳՈՐԾԻՉՆԵՐԻ ՄԻ ՀՈՅԼ.

Գր. Զօհրապ, Է. Ակնունի, Վարդգէս, Խամակ, Սիամանթօ, Դ. Վարուժան, Յ. Շահրիկեան, Ռ. Զարդարեան, Ռ. Սեւակ, Չեկիւրեան, Օզանեան, Հրանդ, Գեղամ Բարսեղեան.

բիգոր Զօհրապ, Ակնունի, Գեղամ Բարսեղեան, Մելքոն Կիւրճեան, Վարդգէս, Ռուբէն Սեակ, Գ. Սաժակ, Ռ. Զարդարեան, Թլկատինցի, և տակաւին շատեր, մինչև երեք հարիւրի հասնող: Հայ մտաւորականները առաջին գոհերը դարձան գաղանային և ճիւղային ծրագրի: Աշխարհի վրայ կարծես միայն մեղաւոր ազգը հայն էր, որ պիտի քաւէր իր հայ ծնւած լինելու մեղքը:

Ապրիլի 24-ին շիջում և մարում էին լուսապայծառ դէմքերը հայ մտաւորականների: Հայ կրթական հաստատութիւններում և եւրոպական ուստաններում լուսաւորւած հայոց ազգի երգիչները փշրւում էին անտաշ քարերով, բութ դանակներով: Բանտ, աքսոր, սպանութիւն և յաւիտենական լուռութիւն: Լուռութիւն և ամայութիւն հայ գրականութեան: Կորուստ հայոց ծաղկող մշակոյթի: Սուգ հայ ժողովրդի:

Այսօր, նրանք նստած հայ գրականութեան պանթէոնում, յաւերժօրէն լեցնում են իրենց ներկայութեամբ ուղեղները հայոց մատաղ սերնդի: Գրականութեան միջոցով սրբազան հաղորդութիւն է կատարւում մեր և նրանց միջև: Նրանք դարձել են յիշատակի խորաններ, ուր իրենց անւան հետ զետեղւել է նաև անմահութեամբ պսակւած գործը:

Անթառամ ծաղիկներ, անկորնչելի անուներ, փառքի ճառագայթներ: Յաւիտենական լոյս իրենց յիշատակին:



ՉՄՈՒԱՆԱՆՔ

Եթէ մոռացայց զքեզ, Երուսաղէմ, մոռացի զիս աչ իմ: Կցեսցի լեզու իմ ի քիմքս իմ՝ թէ ոչ յիւցցից զքեզ, թէ ոչ նախ նուագնցից զքեզ, Երուսաղէմ, սկիզբն ուրախութեան իմոյ:

(ՄԱՂՄ. ձԼԶ Ե)

Յուս լիցին ձեզ կապեալքն, որպէս թէ դուք ընդ նոսա կապեալք իցեք, եւ չարչարեալքն, որպէս եւ դուք իսկ մարմնաւորք էք:

(ԵՔՐԱՅԵՑԻՍ ԺԳ Զ)

ԶՄՈՒԱՆ ԱՆՔ

Հայոց պատմութեան գրքերում յաճախ հանդիպում ենք Հայաստան արշաւող քանակների աւերումներին և սպանութիւններին: Յուզումով ենք լսում և կարդում հսկայական արշաւանքներին զոհ գնացած անգէն և անպաշտպան ժողովրդի սպանութեան և ջարդերի մասին: Սոսկումով ենք կարդում բռնապետների կատարած աւերումների և հազարաւոր անմեղների սպանութեան մասին: Աւելի սրտաճմլիկ իրողութիւններ են պարզում օտարների տիրապետութեան ընթացքին հարկահաւաքների, ոստիկանների ու կառավարիչների կեղեքումներն ու ճնշումները և զազանային արարքները:

Պատմութեան դասագրքերից առաւել մեր պատմագէտներն են, որ աւելի մանրամասն և սրտառուչ տեղեկութիւններ են տալիս կատարւած աւերումների և ըստ սպանութիւնների մասին: Մեր ամբողջ պատմութիւնն այլազան դէպքերի բերումով հիւսւել է մարտերի և արիւնահեղ ընդհարումների մէջ: Դարեր շարունակ օտար բռնակալների արիւնոտ սուրը կախւած է եղել հայ ժողովրդի գլխին: Դարերի ընթացքում զանազան այլազգի և այլազաւան թշնամիներ տարել են մեր արդար վաս-

տակի արգիւնքը, ոտնահարել են մեր ամենանւիրական սրբութիւնները, ձեռք են բարձրացրել մեր ազատութեան և անկախութեան վրայ, վիրաւորել են մեր ազգային արժանապատուութիւնը, արհամարհել են մեր լեզուն ու կրօնը, ոչնչացրել մեր հոգևոր, իմացական և նիւթական լաւագոյն յուշարձաններն ու կոթողները, խորապէս խոցել են մեր հոգին և բռնադատել մեր իրաւունքն ու պատիւը:

Օտար բռնակալների պատճառով է որ խաղաղասէր ու ստեղծագործ հայ ժողովրդի երկիրը պարբերաբար դարձել է պատերազմների թատերաբեմ, աւերւել և ամայացել են ծաղկուն քաղաքներն ու գիւղերը, և այս շատերի կարծիքով, Հայաստանի աշխարհագրական դիրքին է վերագրւել:

Քարքարոտ Հայաստանը հայ մշակների աշխատանքով վերածւել է ճոխ ու փարթամ քաղաքների ու գիւղերի, վանքեր և այլ հաստատութիւններ ու շինարարարութիւններ գեղեցկացրել են Հայաստանը, Յաճախակի աւերումները երբեք չեն կասեցրել հայ ժողովրդի աշխատանքի թափը: Աւերւածը միշտ էլ վերաշինւել է երբ նպաստաւոր պայմաններ են ստեղծւել:

Այս ուղղութեամբ հետաքրքրական է ժ դարի արաբ աշխարհագիր Իբն Ալֆակիի Համադանիի «Երկրների գիրք» գործի մէջ եղած մէկ ականարկութիւնը, թէ՛ «Ես գտայ գրքերի մէջ... որ Մեքքան աւերում են հարէշները, Մեդինան՝ սովը, Բասրան՝ ջրհեղեղը, Քուֆը՝ գաղթը, Ջիրալը քար ու քանդ է լինում կայծակի հարւածներից ու երկրաշարժներից, Սորասանը՝ այլ և այլ պատուհասներից, Ռէյը բռնադատում են Դիլմացիք և թափարսանցիները, իսկ ինչ վերաբերում է Հայաստանին և Ատրպատականին, ապա այդ երկու երկրները կործանւում են հեծելագործի սմբակներից և մէկ էլ կայծակների ու

երկրաշարժի հարւածներից»:

Նոյն հեղինակը մէջբերում է նաև հետևեալ խօսակցութիւնը. «Սիրիացի Մաքհուլն ասաց.—Սմենից յաճախակի աւերմունքի ենթակայ երկիրը Հայաստանն է: Նրանից հարցրին՝ ի՞նչն է դրա պատճառը. նա ասաց.— Հեծելագործի սմբակները»:

Նոյնիմաստ միտք է արտայայտում նաև ԺԲ դարի հայ պատմիչ Մատթէոս Ուռհայեցին: Պատմիչը նկարագրելով սելջուկեան բռնապետների Հայաստանում կատարած աւերածութիւններից մէկը, դատնացած բացագանչում է. «Սմբակք երիվարաց նոցա մաշեցին զլերինս և զբլուրս»:

Հայ ժողովրդի խաղաղասէր ու ստեղծագործ խոնրւածքի ու պատմական ճակատագրի միջև եղած յիշեալ ուժեղ և ցայտուն հակադրութիւնը ծանրացրել է նրա կեանքը: Բարեբախտաբար, այս բոյոթով հանդերձ, ժողովուրդը երբեք չի յուսահատւել, տոկացել է և ապագայի համար վառ յոյսեր ու հեռանկարներ է հիւսել: Սմէն անգամ պայքարով դիմադրել է իր երկիրը խուժող թրչնամուն և ազատագրելով նրանից հայրենի հողը, մեծ ջանասիրութեամբ, արիւն-քրտինք իրար խառնելով, վերականգնել է իր քանդւած բոյնն ու երկիրը: Անդու աշխատանքով և ծանրածանր տքնութեամբ նոր ի նոյոյ վերաշինել է իր աւերւած քաղաքներն ու գիւղերը, ալիսել խոպան մնացած դաշտերը, հրաշակերտել իր հոյակապ վանքերն ու տաճարները, գարգացրել իր գիրն ու գրականութիւնը, հնչեցրել իր աշխատանքի ու սիրոյ գմայլելի երգերը և ազօթքներով գոհունակութիւն է յայտնել Աստծուն իր վայելած բարիքների համար:

Որքան աւելի արիւնարբու և բարբարոս է եղել թշնամին, այնքան աւելի մեծ ու անսասան է եղել հայ ժողովրդի պայքարի ու կառուցելու կորովը: Յաճախ իր

խոփը վահան դարձրած և գրիչը սուր, վանքերը դարան շինած ու խաչքարերը դիրք, խաչն ու սուրը իրար միացրած, յամառօրէն դիմադրել է թշնամուն: Արիւնահեղ կռիւներով, անհաւասար ուժերով, բազմաթիւ մարտերում աշխատել է իր հայրենի սահմաններից հեռու վանել սոխներին: Բազմաթիւ տարիների ընթացքում հետզհետէ բուժել է նրանց հասցրած ծանր ու խոր վէրքերը: Բայց բուժելով, վերաշինելով, վերածաղկեցնելով երբեք չի մոռացել իր պատուհասիչներին, թշնամիներին, նրանց կատարած աւերն ու աւարը, նրանց դաւադիր ու նենգ կերպարը, նրանց չար ու վատ կեցւածքը: Պատմիչների և գրողների միջոցով դրոշմել է նրանց անունները, նրանց հետ իր յարաբերութիւնների ընթացքում աշխատել է միշտ զգոյշ լինել, թափել է արիւն, պատուհասել է անհատ սոխներին, և այս բոլորը ի շահ հայ ժողովրդի և հայրենի երկրի ազատութեան և անկախութեան:

Բնականօրէն, սխալ կը լինէր ասել, թէ մեր ամբողջ պատմութիւնը ողբերգութիւնների շարան է և մեր պատմիչներն էլ ողբերգուներ են: Ունեցել ենք նաև բարգաւաճ, խաղաղ և շինարարական շրջաններ: Մենք այստեղ շեշտը առաւելաբար դնում ենք տխուր իրողութիւնների վրայ, առանց այդ յաւերժացնելու մտածումն ունենալու, ցանկանում ենք չմոռացելիք դէպքերի ու թշնամութիւնների մասին արձագանգել միայն:

Գպրոցում աշակերտը իր այլազան դասերի հետ սովորում է նաև հայոց պատմութիւն և այդ կերպով հոգեկան կապ է ստեղծուում անցեալի ու ներկայի միջև: Տարիներ յետոյ՝ իր սովորածներից աղօտ պատկերներ, յիշողութիւններ և դէպքեր են մնում միայն: Սպասելի չէր, որ ամէն ինչ մանրամասնութեամբ յիշէր և ամէն բոլոր կարողանար պատանեկան թարմ յիշողութեամբ պատմել, Բայց, պարագաներն ու հանգամանքներն ինչ էլ որ լի-

նեն, մի քանի անուներ, մի քանի կարևոր դէպքեր ուժեղ կերպով տպաւորուում և մնում են յիշողութեան մէջ, առանց մոռացութեան վտանգին ենթարկւելու. օրինակ, ո՞վ կարող է մոռանալ մեր աշխարհակալների՝ Արտաշէսի և Մեծն Տիգրանի անուները, Գրիգոր Լուսաւորչին, Մեսրոպ Մաշտոցին, Վարդանանց ճակատամարտը, և այլն:

Այսպէս, ուրեմն, մի քանի անուներ, դրւագներ, դէպքեր անջատուում են պատմութեան ամբողջութիւնից և յաճախակի առիթներով յիշատակութեան են արժանանում: Նրանք յաւերժական անուներ և դէպքեր են և այդ իսկ պատճառով դառնում են յաւիտենական ներկայութիւն: Նրանցով կարող ենք ե՛լ հպարտանալ ե՛լ պարծենալ ու միջազգային բեմերից ամբողջ մարդկութեան ուշադրութեան արժանի դառնալ: Նրանք համամարդկային տարողութեամբ արժէք ունեցող անուներ են:

Չմոռացելիք անուներ են նաև մեր արիւնոուշտ թշնամիների անուները:

Չմոռացելիք և յաւիտենապէս յիշատակելիք դէպքերի շարքին է նաև Մեծ Եղեռնի թաւականը: Ո՞վ կարող է մոռանալ 1915 Ապրիլ 24-ը: Ո՞վ կարող է մոռանալ մէկ միլիոն նահատակների, բազմահարիւր մտաւորականների սպանութիւնը, տեղահանութիւնը, աքսորը, ջարդը, երբ մանաւանդ բոլորը ժամանակակից պատմութիւն են տակաւին:


Ժամանակին, երբ Երուսաղէմի ժողովուրդը գերեվարւած էր Բաբելոն և այնտեղից վերադարձի ու հայրենի երկրի համար կարօտի երգեր և երագներ էր հիւսում, Իսրայէլի մեծ տեսանողը մարգարէաշուանչ պատգամով ժողովրդին ուսուցանում էր. «Երուսաղէմ, Երուսաղէմ, եթէ մոռանամ քեզ, թող լեզուս քիմքիս փակչի»: Ի՞նչպէս կարելի էր մոռանալ Երուսաղէմը, երբ այնտեղ էր անցել ժողովրդի ամբողջ պատմութիւնը: Ի՞նչպէս կա-

րելի էր մոռանալ Երուսաղէմը գերեզմարեւած այդ վիճակում: Ի՞նչպէս կարելի էր ուրանալ և մոռանալ հայրենիքը: Բարեւունն իր ամբողջ հարստութիւններով չէր կարողացել իսրայէլացիների սէրը գրաւել: Նրանք անձկագին կարօտով նայում էին Աւետեաց Երկրի սահմաններին: աչքները միշտ սևեռած Երուսաղէմի հորիզոններին, երգում էին հայրենական տաղեր և արտասանում էին կարօտի մարգարէաշունչ խօսքեր. «Երուսաղէմ, Երուսաղէմ, եթէ մոռանամ քեզ, թող լեզուս քիմքիս փակչի»... Հայրենաշունչ երգեր, պանդուխտի երգեր և կարօտի երգեր, հայրենասիրական զգացումները վառ պահելու համար: Երգերի, տաղերի խորքը կազմում էր հայրենիքը չմոռանալու զգացումը: Չմոռանալ անցեալը, չմոռանալ պապենական երկիրը, չմոռանալ հայրենիքը, չմոռանալ կրօնը: Վա՛յ նրան, որ կը մոռանայ, որովհետև նա կը կորսուի ազգութիւնից, կը հեռանայ իր ժողովրդի պատմութիւնից և կը դառնայ այլափոխուած և ուժացած մարդ:

Նոյն մարգարէաշունչ ոգին կայ նաև մեր հայրենաբաղձ բանաստեղծների տաղերի մէջ: Պանդուխտի երգերի նիւթը խեղճերի վիճակի նկարագրութիւնը չէ միայն, այնտեղ խորապէս զգալի է առաւելաբար տան կարօտը, հայրենի երկրի կարօտը: Իսկ հայրենակարօտ երգերի հիմնական թեման՝ սարերի, ջրերի, օդի, գեփիւռի և այլ իրողութիւնների խորքում խորապէս զգալին հայրենասիրութիւնն է: Հայրենի հողը, հայրենի երկիր և հայրենի լեռ շօշափելի իրեր նկատւելուց աւելի բանաստեղծի հոգին փոթորկող հայրենիքի կարօտի զգացումներն են:

Բայց ինչի՞ համար են այդ երգերն ու տաղերը, ինչի՞ համար են հայրենասիրական երգերը, որոնք յաճախ բեմերից մեր հոգին թունդ են հանում և ծափերի արձագանգը մինչև իսկ երկինք են հասցնում: Բանաստեղծի հայրենասիրական զգացումին յաղո՞ւրդ տալու համար և կամ հանդիսաւոր ատիթներով երգելու և արտասանելու՞ համար միայն: Այս բոլորի հետ հիմնական նպատակը հայրենասիրական զգացումի չմոռացւելն է: Չմոռանալ և յիշել հայրենիքը, չմոռանալ և յիշել նւիրական թւականները, չմոռանալ և յիշել հրաշքի համագօր դրւագները ու նւաճումները, չմոռանալ և յիշել հին, բայց կենսունակ գաղափարները, չմոռանալ և յիշել ար-

տեղծի հայրենասիրական զգացումին յաղո՞ւրդ տալու համար և կամ հանդիսաւոր ատիթներով երգելու և արտասանելու՞ համար միայն: Այս բոլորի հետ հիմնական նպատակը հայրենասիրական զգացումի չմոռացւելն է: Չմոռանալ և յիշել հայրենիքը, չմոռանալ և յիշել նւիրական թւականները, չմոռանալ և յիշել հրաշքի համագօր դրւագները ու նւաճումները, չմոռանալ և յիշել հին, բայց կենսունակ գաղափարները, չմոռանալ և յիշել ար-



ՅՈՒՇԱՐՁԱՆ ԲԻՒՐԱԽՈՐ ՆԱՀԱՏԱԿՆԵՐԻ
(Խորհրդապատկեր)

դար և նւիրական պահանջները, որոնք մեր մեռելների հետապնդած սրբազան գաղափարներն եղան, չմոռանալ և յիշել անցեալը, որ մեզ շողկապող և նոյն ազգի պատմութիւնը մեր մտքի մէջ կենդանի պահող միակ նւիրական ազգակն է, չմոռանալ և յիշել հայրենի երկիրն իր բիւրեղացած մաքրամաքուր գաղափարի և զգացումի մէջ:

Զմոռանալ և յիշել մանաւանդ տակաւին պատմութիւն չդարձած Մեծ Եղեռնը, որի տօնակատարութիւնը լաւագոյն առիթն է հոգու խորքում անտեսանելի, բայց իմանալի յուշարձաններ գոյակերտելու: Զմոռանալ և լեցել չմոռանալու առաքինութեամբ:

Միթէ մարգարէաշունչ նոյն պատգամը չէ՞ հայ ժողովրդի վշտի երգիչներից ամենից հարազատի և լաւագոյն ներկայացուցչի խօսքը, ուղղւած բոլոր վշտահար հայերին. «Այսքան չարիք թէ մոռանան մեր որդիք, թողող շախարհ հային կարգայ նախատինք»...

Կատարւածը ո՛չ միայն չարիք էր, այլ էապէս աղէտ և ցեղասպանութիւն էր, որին երբեք չի ենթարկել հայ ժողովուրդը իր պատմութեան ամբողջ ընթացքում: Արշաւոդ բանակներ շատ են եկել ու անցել Հայաստանի վրայով, աւերումներ, կեղեքումներ, կողոպուտներ շատ են եղել Հայաստանում: Մարդկային գոհեր, և այն էլ իզուր տեղը շատ է տւել հայ ժողովուրդը, Պատերազմներ շատ է մղել հայոց բանակը: Բայց այդ բոլորը անցել են արդէն, պատմութեան և դասագրքերի մաս են կազմում: Ճիշտ է, սրտաճմլիկ և սարսուզողեցիկ դէպքեր շատ են պատահել, և սակայն, երբե՛ք ամբողջական և հաւաքական կոտորած չի պատահել: Եղածների ամբողջական նկարագրութիւնը կարող ենք կարգալ պատմիչների մօտ. իսկ վերջին եղեռնը մասամբ հաւաքւել է յուշամատենների մէջ: Վստահ ենք, թէ նա իր արժանի տեղն ունի իւրաքանչիւր հայի հոգու ամենախորունկ ծալքերում և այնտեղից երբեք դուրս չի գայ, չի մոռացւի, կը մնայ իբրև յաւիտենական և մշտնջենական ներկայութիւն: Վա՛յ մեզ, եթէ մոռանանք, անէ՛ծք նրան, որ կը մոռանայ. նախատինք բոլոր հայորդիներին, եթէ մոռանան:

Քրիստոնէութեան տարածման առաջին շրջաններում նորադարձ քրիստոնեաները ո՛չ միայն հալածւում

էին, այլ նաև վայրագօրէն չարչարւում, բանտերում ա-նասելի զրկանքների էին ենթարկւում, կրկէսների մէջ կատաղած առիւծների առաջ էին հանւում և սպանւում: Պողոս առաքեալն իր խօսքը նորադարձ քրիստոնեաներին ուղղելով, նրանց ուշադրութեանն է յանձնում բանտարկւածների և չարչարւողների պարագան և յատկապէս շեշտում. «Ձեզ յուշ լինեն չարչարւողները, որպէս թէ դուք ևս նրանց հետ չարչարւում էք»: Քրիստոնեաները Քրիստոսով եղբայրացած էին, անհատական սեփականութիւն չկար, մէկը բոլորի համար էր, բոլորը մէկի համար: Առօրեայ ապրուստը միասնաբար էին հոգում, և իրարու ուրախակից և ցաւակից էին, կարծես մէկ ընտանիքի անդամներ լինէին:

Առաքեալը փոխադարձ կապը աւելի ամուր հիմքերի վրայ դնելու համար՝ կենդանի և ուժեղ յարաբերութիւն էր ուզում հաստատել բանտարկւածների, չարչարւողների և ազատ քրիստոնեաների միջև և ասում էր. «Դուք ձեզ այնպէս համարեցէք, թէ նրանց փոխարէն դուք կարող էիք լինել»: Քրիստոնէութեամբ եղբայրացածների համար բանտարկւածներն ու չարչարւողները չպիտի մոռացւէին և յաճախ պէտք է յիշատակւէին:

Առաքեալի խօսքը աւելի իմաստ և նշանակութիւն ունի մեզ համար, երբ մասնաւորաբար նկատի ունենանք յիսուն տարի առաջ կատարւածը: Խօսքը, որ մի միջոց է մեր մտածումները փոխանցելու, վստահաբար պիտի չկարողանայ Եղեռնի ամբողջութիւնը տալ ուրիշին: Գրքիչը որ միջոց է մեր ապրումները բազմաթիւ մարդկանց փոխանցելու, չպիտի կարողանայ ճշգրիտ միջնորդն ու թարգմանը հանդիսանալ: Եթէ կատարւածը ուրիշին փոխանցելու ակտի մէջ թերի պիտի մնան մեր ամբողջ աշխատանքները, սակայն անհրաժեշտ է, որ չմոռանալու գաղափարը ամենից աւելի տիրական և կենդանի

դառնայ մեր մտքի մէջ:

Ժամանակը մի այնպիսի երկայնաքար է, որի տակ ճգմուտում և մոռացում են բազմաթիւ դէպքեր, պատահարներ և զգայացունց լուրեր ու տեղեկութիւններ:

Ամէն ինչ հնանում ու մոռացում է և իր տեղը տալիս է օրը օրին յայտնուող նորութիւններին: Ի՞նչ է մնացել հսկայական կայսրութիւններից կամ ճոխ ու փարթամ հարստութիւններից, միլիոններով ու միլիոններով ապրող մարդկանցից: Ի՞նչ է մնացել հսկայական արշաւանքներից. ոչ ի՞նչ. յիշատակ և պատմութիւն միայն: Ո՞վ է յիշում ճիւղաղային ու գազանային արարքները բռնակալների. պատմութիւնը միայն, այն էլ դասարանում սովորելու և թւանշան ստանալու համար: Այս մտածումն է, որ բռնակալներին ու ջարդարարներին անմարդկային արարքներ է կատարել տւել: Սպանել, ջարդել, տիրել և իշխել:

Ժամանակը որ մի քիչ էլ թաւալի, նոր մարդիկ գան, նոր դէպքեր պատահեն, եղածը կը մոռացւի արդէն:

Բայց երբեմն այնպիսի աղէտներ, կորուստներ և պատահարներ կան, որոնք եթէ ուզենանք էլ մոռանալ, չե՛նք կարող: Այդպիսի թւական է 1915-ը մեզ համար: Ազգային ցաւի և սուգի թւական է: Ազգային իրաւունքների կորուստի թւական է: Ազգային հողերի բռնագրաւման թւական է և պիտի չմոռացւի այդ թւականը, մինչև որ կարողանանք մեր կորցրած բոլոր իրաւունքների տէրը դառնալ: Այլ խօսքով, կարելի պիտի լինի ներել միայն այն ժամանակ, երբ կարողանանք ներելու վիճակին հասնել:

Ժամանակին կրօնական իշխանութիւնը եկեղեցու համար նահատակողներին սուրբերի շարքն էր դասում, սօնացոյցի մէջ յատուկ օր էր նշանակում և կրօնական

շարականներում նրանց ներքողն էր հիւսում, սրպէսզի նրանք չմոռացեն և հաւատացեալների ու նահատակողների միջև գէթ տարին մէկ օր կենդանի կապ ստեղծւի: Այս օրերին կատարող անլանակոչութեան տօնակատարութիւններն արձագանգն են այդ օրերի անունների յիշատակութեան: Հաւաքական սուրբերի տօնակատարութիւնն առաւելագոյն չափի հասած յիշատակի յաւերժացման կատարումն է: Վարդանանք արդէն իսկ ազգային չափանիշով դարձել են խորհուրդ: Նեղ պայմաններում, ճնշումների օրերին, մեր ազգային գաղափարները նըրանց տօնակատարութեամբ աւելի են բոցավառւել: Գարբերի ընթացքում նրանք չեն մոռացել և չեն էլ մոռացւի, որովհետև նոյնացել են հայ ժողովրդի հետ: Բիւրաւոր նահատակներն ևս անցել են արդէն օրացոյցի մէջ, և իւրաքանչիւր տարի: Ապրիլի 24-ին՝ կրօնական արարողութեամբ և ժողովրդական սգահանդէսներով յիշատակւում են:

Նրանց յիշատակի հետ պիտի չմոռացւեն նաև այն բոլոր հարցերը, որոնք սերտօրէն կապ ունեն իրենց նահատակութեան հետ:

Չմոռանա՛նք նրանց: Չմոռանանք մանաւանդ այն բոլոր իրաւունքները, որ արդարօրէն մերն են: Չմոռանանք և վառ պահենք ազգային բոլոր պահանջները: Մոռացումը կորուստ է և անցեալի պատմութիւն: Մինչ յիշատակումը նախադուռն է իրաւունքների պաշտպանութեան և իրաւատէրի հանգամանքին:

Ասւած է՝ ամէն ինչ կանցնի, ամէն ինչ կը նստայ, ամէն ինչ կը մոռացւի, բացի յիշատակից:

Մեր Բիւրաւոր նահատակները կենդանի և ապրող յիշատակներ են:

Ս Պ Ա Ս ՈՒ Մ

Եւ հրեշտակ Տնառն ըստ ժամանակի
իջանէր յաւազանն եւ յուզէր զջուր-
սըն եւ որ նախ ի շարժումն ջուրցն
իջանէր, բժեկէր՝ ոչ ունելով նշան հի-
ւանդութեան իւրում:

(ՅՈՎՀ. Ե. 4)

Ս Պ Ա Ս ՈՒ Մ

Երոսադէմում գտնուում էր Փրոփատիկէի աւագանը, որի շուրջ հիւանդները հաւաքւած, նստում էին շարք-շարք. տարւայ մէջ մի անգամ հրեշտակը երկընքից իջնում էր, ջուրը խառնում և այն հիւանդը, որ արագ շարժելով իջնում էր ջրի մէջ, բուժուում էր և հիւանդութեան նշանն իսկ չէր մնում իր վրայ: Միւսները սպասում էին, որ ջուրը դարձեալ խառնէր, առիթից օգտւէին և բուժւէին: Հիւանդները երկար տարիներ նստած, սպասում էին այն յոյսով, որ մի օր էլ հերթը իրենց կը հասնի, և աւագանի միջից բոլորովին բուժւած դուրս կը գան:

Վերոյիշեալ պարզ դրւագի մէջ մեզ հետաքրքրողը Փրոփատիկէի աւագանի ջրի խառնելը և այնտեղ երկար տարիներ նստած հիւանդների՝ յոյսով սպասումն է: Եթէ երբեք փորձենք այս իրողութիւնը յարմարեցնել նաև մեր պատմութեան այլազան շրջաններին, մասնաւորաբար վերջին ժամանակների ազատագրական ճիգերին, տաճկահայ նահանգների բարենորոգումների հարցերին, սպասումներին, պիտի նկատենք, որ կարծես մենք էլ նստած ենք Փրոփատիկէի աւագանի շուրջ և անձկա-

նօք սպասում ենք, թէ ե՞րբ պիտի ջուրը խառնւի և աստուածային հրաշքով մենք էլ պիտի կարողանանք ջրի մէջ մտնել, բուժւել և հասնել մեր նպատակին:

Մեր պատմութեան ընթացքին զանազան տոհմեր իշխել են միանեծան և կամ այլ կերպով, և անցել. թագաւորական, նախարարական և իշխանական տներ որոշ շրջանում գործել են և իրենց գործով յաւերժացել: Դրժքախտաբար, նրանց իշխանութիւնը երկար դարաշրջաններ չի տեւել և միշտ էլ յարափոփոխ վիճակ է ստեղծւել: Ներքին պառակտումներն ու դրսից խուժող հսկայական արշաւանքները միշտ էլ սպառնացել են հայ ժողովրդի ազատութեան և անկախութեան: Մի ժամանակ Հայաստանը բաժանւել է երկու մասի, այլ ժամանակներում փոխն ի փոխ անցել է օտար իշխանութիւնների լծի տակ և այդ ժամանակւայ հայ ժողովրդի տառապանքը, անասելի շարչարանքները, ողբերգական վիճակը յուզիչ կերպով պատմիչների կողմից գրի է առնւել: Զեռագրերի յիշատակարաններում երբեմն ծաղկողի, պատմագրողի, ընդօրինակողի, պատւէր տւողի կողքին սարսուղեցիկ արձանագրութիւններ ենք կարդում: Բոլորն էլ դժբախտ դէպքերի արձանագրութիւններ են ժամանակակից ականատեսի ձեռքով վկայւած և մեզ փոխանցւած:

Անշուշտ, շահեկան պիտի լինէր մեր ամբողջ պատմութեան շրջանների ժամանակագրական ցուցակը կազմել, իմանալու համար թէ ինչքա՞ն ժամանակ անկախ և ինքնուրոյն իշխանութիւն ենք ունեցել և ինչքա՞ն ժամանակ օտարի լուծի տակ մնացել: Բնականաբար, եզրակացութիւնը մխիթարիչ չպիտի լինի: Վստահաբար, օտարների տիրապետութեան նժարն աւելի պիտի կշռի: Բայց հակառակ այս իրողութեան, միշտ էլ սպասել ենք, ճգնել, աշխատել, մեր ներքին ուժերը զօրահաւաքի ենթարկել և յանկարծ նկատել այսինչ կամ այնինչ նա-

խարարի իշխանութեան տարածումը և իրենով հայ ժողովրդի պետական կեանքի կազմաւորումը:

Յանկարծ, դարձեալ, նկատել ենք իշխանութեան շիջումը, որին նորէն յաջորդել է սպասում, շա՞տ երկար սպասում և յանկարծ մի թագաւորութեան կամ մի քանի թագաւորութիւնների հաստատումը, դարձեալ նրանց շիջումը և այս անգամ մելիքութիւնների, ամիրաների իշխանութիւնը:

Մեր ամբողջ պատմութիւնը մի այսպիսի շղթայ է, սև ու ճերմակ օղակները միշտ յաջորդել են իրար: Սպասում և յաճախ շատ երկար սպասում՝ վերստին իշխանութեան տիրանալու համար: Աւերումներ, կեղեքումներ, գաղթեր, և յետոյ ծաղկումի, խաղաղութեան և շինարարութեան շրջաններ: Սեփական իշխանութեան ձրգտումը, կամքի տոկունութիւնը, ստեղծագործելու կրակը և աւերւածը վերստին շինելու տենչը մղիչ ուժ են հանդիսացել հայ ժողովրդի համար, և այդպիսով ամէն տեսակի պայմանների ներքոյ հսկայական նւաճումներ են կատարւել: Մեր պատմութեան հիւսւածքը Հայաստանում, Կիլիկիայում և կամ այլուր այսպէս է եղել:

Օտարների տիրապետութիւններից ձարբազատւելու համար սպասել, տոկալ և համբերել...

Եւ ո՞վ հրաշք, մեր մշակութային նւաճումները, արւեստի մարզում կատարւող պատւաբեր գործերը, այսպիսի նեղ և տառապալի օրերին են կատարւել և դարձել ամրակուռ շաղախ՝ հայ ժողովրդի ինքնուրոյնութեան, ազգապահպանման և գոյատեւման համար:

Բազմաթիւ ազգեր, հսկայական պետութիւններ արդէն իսկ անհետացել են պատմութեան թատերաբեմից, բայց փոքրաթիւ հայ ժողովուրդը տոկացել է, ստեղծագործել և կարողացել է առաւել կամ նւազ չափով իր յոյսերի պսակումին հասնել:

Այսպէս, ուրեմն, օտարներէ կողմից խոցւած մեր հիւանդ մարմինը երկարօրէն սպասել է Փրոֆիատիկէի աւագանի շուրջ, առաջին իսկ պատեհութեամբ առիթից օգտւելու, խառնուող ջրի մէջ նետւելու և այնուհետև բուրիին ցոյց տալու համար իր առողջացած մարմինը, երբեմն, երբ նկատելի է թէ ջուրը չի խառնուում, ինքն է փորձել խառնել և յուզւող ջրի միջից դուրս գալ որպէս հաւաքականօրէն առողջ մարմին:

Կիրիկիայի թագաւորութեան անկումից յետոյ կատարւող բոլոր ազատագրական շարժումները, ինքնուրոյն իշխանութեան համար տարւող աշխատանքներն ու մղւող պայքարները որոշ արդիւնքի չհասան: Բաւական երկար տեւեց սպասումը: Յաճախակի կատարւող ազատագրական շարժումները յանգեցին շուտափոյթ շիջումի: Վեց դարերի ընթացքում Փրոֆատիկէի աւագանի շուրջ նստած սպասեցինք, որ ջուրը խառնւի, բայց ի զուր, մեր յոյսերը չիրականացան: ջուրը չխառնւեց. փորձեցինք դառնալ աւագանի շուրջը, բայց դարձեալ մնացինք յուսահատ: Գտնւեցին մարդիկ, որոնք դրօշակիրները հանդիսացան հիւանդ Հայաստանը իրենց ձեռքով աւագանի մէջ նետելու, բայց ջուրը չխառնւեց: Փորձեցին իրենք խառնել, դարձեալ անօգուտ: Դիմեցինք այլ մարդկանց, որ խառնեն, դարձեալ մնացինք նոյն վիճակում: «Յոյս չկայ օտարից»:

Սպասման ժամանակաշրջանում պատահեցին գաղթեր, տեղափոխութիւններ և ձուլումներ: Նրանց յաջորդեցին կեղեքումներ և զուլումներ: Արեւելեան և արեւմտեան հայութեան վիճակը նոյնն էր, օտարի թաթի տակ ճնշուում էր հայ ժողովուրդը, իր աշխատանքի արդիւնքը չէր վայելում, գալիս, հաւաքում և տանում էին, չկար կեանքի ապահովութիւն, ամենուրեք անորոշ վիճակ էր տիրում: Եւ հայ ժողովուրդը, այս պայմաններում

նստած Փրոֆատիկէի աւագանի շուրջ, սպասում էր թէ ե՞րբ պիտի խառնւի ջուրը: Ինքը պատրաստ էր առաջին իսկ առիթով նետւելու աւագանը և դուրս գալու ազատւած և ձերբազատւած ամէն տեսակի հիւանդութիւններից ու կաշկանդումներից: Ջուրը չէր խառնուում և օրից օր աւելի էր վատթարանում հիւանդի վիճակը: Կեղեքումներին, նեղութիւններին ու ճնշումներին յաջորդեցին ձերբակալութիւններ, աւելի ծանր ճնշումներ, սպանութիւններ և ջարդեր, Հիւանդը չդիմացաւ, աւագանը չէր խառնուում և իզուր էին անցնում այդ բոլոր ճիգերը, գոնէ աւելի հօօրների միջոցով հնարաւոր դարձնելու աւագանի ջրի խառնելը: Դժբախտաբար, աւագանը միշտ մնում էր լճացած վիճակում: Որեւիցէ փոփոխութիւն չէր նկատուում հայ ժողովրդի վիճակի մէջ:

Բոլորի աչքի առաջ մեր հիւանդ մարմնի վայս ծանրանում էր օտարի մտրակը և նրանք ծանրախոհականատեսի լրջութեամբ դիտում էին պատահարը:

Աւագանի շուրջ նստած հիւանդը արտաքին խոստումներից և օժանդակութիւններից յուսահատ, մասձեց ինքն իրեն բուժել և առողջանալ. շարժման մէջ դրեց իր մարմնի անդամները, խոյացաւ վեր և մնաց ոտքի վրայ: Ջուրը չէր խառնուում, բայց զգաց, թէ ինքը առանց նրան էլ կարող է ոտքի վրայ կանգնած մնալ և իր նպատակներին հասնել: Ազատ և անկախ շարժւելու համար անհրաժեշտ էր իր ամբողջական և հաւաքական ուժերի հաւաքումը: Նրա մարմնի վրայ կազմւեցին երիտասարդական աւելնով լեցւած, հայ ժողովրդի ազատագրութեամբ տոգորւած և իրենց կեանքը առանց սակարկութեան հայրենիքի ազատութեան նւիրաբերող անձեր, խմբեր և կազմակերպութիւններ: Մղւեց գործի և Բաբը Ալիի, Բանք Օթոմանի, Սանասորի ու Սարգալաբադի նւաճումները արդիւնքն էին երիտասարդական

հաւաքական այդ ուժերի: Կատարւեցին հրաշքի համագոր-
նւածումներ, հայկական զրօշը պարզւեց, հայր դո՛ւրս ե-
կաւ Փրոփատիկէի աւագանի շուրջ նստած հիւանդի վի-
ճակից և սկսեց պետական կեանք: Հայ ժողովուրդը 1918
թ. ունեցաւ պետութիւն, ունեցաւ խորհրդարան, ունե-
ցաւ նախագահ, ունեցաւ քանակ, ունեցաւ դրամ և զը-
րոշմաթուղթ և ամենից կարևորը՝ հային պատկանող Հա-
յաստան, և տակաւին մինչև այս օրերին շարունակուում



է հայ ժողովրդի պետական կեանքը:

Բայց թաթը դամոկլեան սրի պէս մնում էր կախ՝
ոտքի կանգնած մարմնի գլխին, անասելի շարչարանք-
ները շարունակուում էին, մեր դարաւոր թշնամին ու-
ղում էր հայ ժողովրդին ամբողջութեամբ բնաջնջել, ըս-

պանել և ջարդել բոլորին: Բնաջնջել հայի անուան իսկ,
և պահել միայն մէկ հոգի, այն էլ թանգարանի համար:

Գազանային ու ճիւղային ձևով տեղի էին ունե-
նում աւերումները, սպանութիւնները և ջարդերը: Ըս-
պանւողների թիւն անցաւ մէկ միլիոնից: Մնացեալները
տեղահան եղան և փոխադրւեցին անապատները, որբա-
նոցները լեցւեցին, այդ տեղերից այլ վայրեր սալւե-
լու համար: Այս բոլորը հեքիաթ չէ, չափազանցւած պատ-
մութիւն չէ, այլ մօտակայ անցեալում կատարւած ամե-
նադաժան իրողութիւնն է, որ մարդկային պատմութիւնը
տեսած լինի: Է՛յ մարդկային դիւանագիտութիւն և պե-
տական առևտուր: Կարծես լոեյ էր մարդկային խիղճը
և ցաւակից եղբայր չէր ճարուում: Անպաշտպան և անզէն
հայ ժողովուրդը յանձնւած տաճիկ սեփնաւորների հսկո-
ղութեան: Քշուում էր անձանօթ ուղիներով, անօթի, ծա-
րաւ: Կարաւաններն իրար էին յաջորդում: Գէպի կա-
ռափնարան, դէպի անապատ, դէպի Գէր Զօր, դէպի Մփ-
րատի ափերը: Կարաւանների շարքին էին խառնել ար-
ւեստագէտներին, մտաւորականներին, քաղաքներից ու
գիւղերից հաւաքւած բազմութիւններին: Տանում էին
դէպի անձանօթ և անմարդաբնակ վայրեր: Այսպէս, ճա-
կատագրի խաղին յանձնւած, թուրք ոստիկանների սեփն-
ների տակ, քշուում էին հայերը, տեղահան էին լինում
իրենց պապենական դարաւոր տներից, տեղերից, առանց
իմանալու թէ պիտի վերադառնա՞ն, որտե՞ղ են գնում և
արդեօք ո՞ղջ պիտի մնան: Թշուառ ու անտէր ժողովուրդն
սպասում էր հրաշքի, սպասում էր աստուածային պատու-
հասի, չէ՞ որ ինքը այդպիսի նեղ պարագաներում դարե-
բով ապաւինել էր իր Աստծուն, սպասում էր մանաւանդ,
որ ջուրը խառնւի, ջուրը յուզւի և իր վիճակն էլ պար-
զւի, բայց անօգուտ: Միակ չոր իրականութիւնն այն
էր, որ ինքը տեղահան էր լինում և ամէն տեղ ջալ դէր

էին կատարուում: Տխուր պատմութիւնը ծանօթ է բոլորին, կարիք չկայ մանրամասնութիւնների մէջ մտնելու: Տխուր իրականութիւն, սրտաճմլիկ տեւալան: Մէկ միլիոն նահատակներ և ողջ մնացածների ցրում աշխարհի բիւր երկրներում:

Այս օրերին, երբ յետադարձ ակնարկ ենք նետում անցեալի վրայ և փորձում ենք մեր տկար ուժերով երեւան հանել 1915—18 թ. պատահած աղէտը, դողահար մարմնով, մնում ենք շարած, թէ ինչպէ՞ս կարելի է նկարագրել այդ օրերի դժբախտ ու գազանային դէպքերը:

Մենք լուսանկարչական մեքենաներ չենք և մեր զգացական աշխարհը թոյլ չի տալիս որ կարողանանք հանդարտ մտքով նկարագրել պատահածը: Շարժանկարի դերակատարներ էլ չենք, որ դիմակաւոր ձևով ուրիշի կերպարանքի մէջ մտնենք և պարզապէս մեր դերը խաղանք: Մեր մեռելների արիւնը տակաւին պղպջում է մեր աչքերի առաջ: Մենք և նրանք նոյնացած ենք նպատակների իրազորման ճանապարհի վրայ:

Անցել են արդէն յիսուն տարիներ և ամենուրեք վերածաղկել է հայ ժողովրդի կեանքը: Պատուաբեր նւաճումներ են կատարւել՝ սկսած մայր հայրենիքից մինչև հեռաւոր փոքրաթիւ հայ գաղութները: Ուրախալի երեւոյթները, պատուաբեր նւաճումները, շինարարութիւնները և մշակութային աշխատանքները գոհունակութեամբ են լեցնում բոլորիս սրտերը: Բայց տակաւին, հակառակ այս ուրախալի երևոյթներին, սպասողական վիճակը դեռևս շարունակւում է կարծես:

Սպասում ենք հրաշքի, սպասում ենք մի ինչ որ նոր բանի, սպասում ենք զգայացունց լուրերի, սպասում ենք, մեր երաշխների իրականացման: Նոր դժւարութիւնների առաջ, նոր կեանքի մէջ, սպասում ենք դերբնական



Հայ ազատագրական պայքարը 1914—18 թ.

ուժերի յայտնութեան: Նոր հարցեր, նոր դժւարութիւններ սպառնում են մեր հոգեկան գոյութեանը: Իւրաքանչիւր գաղութ, կատարւող հսկայական յառաջադիմութեան և կազմակերպւած վիճակի հետ, ներքին հարցեր և անորոշ վիճակ ունի, և յաճախ տխուր հայեացքով է նայում ապագայի վրայ: Յիսուս տարի կարողացել է դիմանալ, շինել, կառուցել և ստացածը պահել: Յիսուս տարի իր ծննդավայրի կարօտը հոգում յարմարւել է նոր պայմաններին և դարձել քաղաքացի: Յիսուս տարիներ ընթացքում երկու սերունդ է եկել և նրանք ամբողջութեամբ նոր վայրերի և միջավայրերի գաւակ են արդէն: Ծննդավայրի կարօտ չունեն, պապենական տան կարօտ չունեն: Նոր տուն, նոր միջավայր, նոր ծննդավայր: Յիսուս տարիներ յետոյ ինչքա՞ն հայութիւն պիտի մնայ իր ապրումներով, հետաքրքրութիւններով և զգացումներով:

Յուզումի վտանգն սպառնում է բազմաթիւ վայրերում կայք հաստատած հայութեան, այնտեղ իւրաքանչիւր հանդարտ նստած Փրոփատիկէի աւագանի շուրջ, սպասում են, թէ ե՞րբ պիտի խառնւի ջուրը, ի՞նչ հրաշք պիտի կատարւի և ի՞նչ գոյավիճակ պիտի ստանայ գաղութի ապագան: Ոմանց համար ամէն ճիգ ու ջանք աւելորդ է արդէն, նոր պայմաններում արդէն իսկ հայութիւնը այնտեղ պիտի վերջանայ, ուստի՝ աւելորդ են կարկատանի ձեռք կատարւող աշխատանքները: Տան լեզուն, ընտանիքի լեզուն երբ հայերէն չէ, բնականօրէն աւելորդ պիտի համարել բոլոր տեսակի աշխատանքները: Բայց հակառակ այս իրականութեան, Փրոփատիկէի աւագանի շուրջ նստած հիւանդների նման, նրանք էլ սպասում են թէ ե՞րբ ջուրը պիտի խառնւի, և հրաշքով իրենք էլ բուժուեն և առողջանան:

Կազմակերպւած գաղութներից ոմանք երբ հասել

են արդէն վարչական լաւագոյն վիճակի, դպրոցները, եկեղեցիները, մամուլը, ազգային և մշակութային կեանքը միշտ եւ ու զեռի մէջ է արդէն և միշտ էլ աշխատանք են տանում հայեցի շունչը պահելու համար, այս անգամ ներքին պառակտումներ, ներքին ճակատներ, ներքին անհասկացողութիւններ, գանազան տեսակի տագնապներ պատճառ են դառնում ուժերի ջլատման, անհամերաշխութեան և զուր են վատնւում մեր նիւթական և իմացական կարողութիւնները: Պայքար, ներքին ճակատ, բաժանում, անհանդուրժող կեցւածք, նոր պայմանների մէջ, նոր կացութեան առաջ անտարբեր և անորոշ գոյավիճակ են ստեղծում և մարդ ակամայ երբ անգրագատում է թէ ինչո՞ւ նման դէպքեր, անհանդուրժող կեցւածքներ և այն էլ հասկացող խաւերի կողմից պատճառ են լինում այս գոյավիճակին և ի՞նչ է արդեօք ելքը, որպէսզի հրնարաւոր լինի ազգային գերագոյն շահերի շուրջ համախմբել բոլորին: Եւ եթէ չի կարողանում գտնել ճամբան և մնում է անորոշ կացութեան մէջ, դարձեալ սպասողական վիճակ է տիրում: Սպասում է Փրոփատիկէի աւագանի շուրջը, թէ ե՞րբ պիտի խառնւի ջուրը և ինքը մէջը նետւի այլազան ցաւերից բուժուելու համար:

Այսպէս, ուրեմն, սպասողական վիճակ է տիրում ամէն տեղ: Սպասում ենք ինչի՞, ի՞նչ բանի: Զգիտենք: Բայց միշտ սպասում ենք աւելի լաւ օրերի և ժամանակների համար: Սպասում ենք հակառակ այն իրողութեան, որ գիտենք թէ Ս. Գրիգոր Լուսաւորիչը եկել և գոյակերտել է Հայց. Եկեղեցին: Մեսրոպեան խումբը եկել և տւել է մեր ոսկեդարը: Նարեկացին եկել և տւել է մեր աղօթքը: Մշակոյթի գործիչները եկել են և ուսուցանել հայոց մշակոյթը: Արեւստագէտները եկել են և իրենց նւաճումներով բարձրացրել հայոց արւեստը: Գպրութեան մշակներն ուսուցանել են և սերունդներ են

դաստիարակել: Բոլոր մարզերում և ասպարէզներում մարդիկ եկել են և իրենց լուսման թողել հայոց գանձարանում: Գանձարանի հարստութիւնը մե՛րն է հիմա: Մեզ մնում է պահել, ուռճացնել և փոխանցել դալիք սերունդին, որպէսզի չկտրուի շղթան:

Բայց մենք արդարօրէն սպասում ենք առաւելաբար Մեծ Եղեռնի առիթով կորցրած մեր իրաւունքների վերստացման, մեր պապենական հողերի վերստացման, մուրհակը մեր ձեռքին երկար սպասել ենք և տակաւին պիտի սպասենք, մինչեւ որ արդարացիօրէն լուծում ըստանայ հայկական դատը:

Սպասում ենք, նստած Փրոփատիկէի աւագանի շուրջ, որպէսզի ջուրը յուզւի, խառնւի և մենք էլ նետուենք ջրի մէջ, դուրս գալու այս անգամ ողջ և առողջ, իրաւատէրի հանգամանքում եւ լծւենք շինարար աշխատանքի:

Շատերն են սպասել աւագանի եզերքին, ուրիշների օժանդակութեամբ նետւել ջրի մէջ եւ բուժւել, եւ այսօր նրանք դատ-դատաստան չուեն: Հերթը մերն է. չգիտենք թէ տակաւին ինչքա՞ն պիտի սպասենք եւ ո՞վ պիտի օգնի մեզ, որպէսզի կարողանանք լրիւ եւ ամբողջական տէրը լինելու մեր կորցրած իրաւունքների:

Սպասենք եւ տեսնենք: Թող Աստուած օգնական լինի բոլոր սպասողներին:

Տ Ա Ր Ա Գ Ր Ո Ւ Թ Ի Ի Ն

Երթալով Երթային եւ լային ոյ՛ք
բարձրեալ սանէին զսերմանիս իւրեանց,
գալով նկնսցնն եւ ցնծասցնն, ոյ՛ք ա-
ռեալ բերիցնն զորայս իւրեանց:

ՍԱՀ. ՃԻԵ Ե

ՏԱՐԱԳՐՈՒԹԻՒՆ

Ժամանակին, երբ պանդխտութեան էին գնում, նոր հորիզոնների տակ, նոր միջավայրում երազում էին նաև վերադարձի մասին: Պանդուխտը թողնում էր տուն ու ընտանիք, դժւարին պայմաններում իր ամենօրեայ հացը շահում և բազմաթիւ գրկանքների ենթարկելով՝ մի փոքր բաժին էլ խնայողութիւն անում, որպէսզի վերադարձին ցնծութեամբ յանձնի իւրայիններին: Պանդխտութեան գնացողը, վերադարձի յոյսը սրտում, աշխատանքի էր լծւում: Ընտանեկան պարագաների կարօտը ձգողական ոյժ ունէր նրա սրտում և անվերջ երազում էր հարազատ շրջանակի մասին: Տունը քաղցր էր և պանդուխտը տան ջերմութեամբ լեցւած, տարիների աշխատանքի արդիւնքով բեռնաւորւած, տուն էր գալիս և վերջ գնում պանդխտութեան:

Ժամանակին, գաւառներից և այլ շրջաններից Պուլիս և կամ այլուր և մինչև իսկ շատ հեռաւոր վայրեր պանդխտութեան էին գնում բազմաթիւ հայեր, հացի և ընտանիքի հոգսի համար: Գնում էին լացով, կսկիծով, իրենց հետ տանում էին ընտանեկան յիշատակներ և յաճախակի առիթներով մտածում էին բերկրալի վերադարձի մասին: Իւրաքանչիւր պանդուխտ սպասող ունէր, լա-

ցող և մտածող ունէր, և անվերջ մտորում էր վերահարձի մասին: Տան կարօտը ամէն բոլորէ յուզումով էր լեցնում իր հոգին. օտար ու խորթ շրջանակները չէին կարող երջանկութեամբ լեցնել իր կսկծացող սիրտը: Մայրեր, հարսներ, զաւակներ հեռուներից կանչում էին նրան: Երջանիկ էր այն պանդուխտը, որ կարողանում էր իր աշխատանքի արդիւնքով բաւարարել բոլոր սպասողներին: Այդ օրերին հիւսւած պանդուխտի երգերը, տակաւին, մինչև այսօր, յուզումով են լեցնում մեր սրբտները:

Պանդխտութիւնը գաւառներում շատացաւ, երբ թրջական կեղեքումներն ու ճնշումներն անոռի վնասներ պատճառեցին անպաշտպան հային: Ծարան-շարան գնում էին պանդխտութեան, հացի համար, կեանքի ապահովութեան համար: Բայց պանդխտութեան գնացողը վերադարձի յոյսեր էլ ունէր, մէկ աչքը իր ետևն էր թողնում, և անդադար, մտովին փոխադրւում էր տուն, այնտեղ ստանալու համար հոգեկան բաւարարութիւն: Պանդխտութիւնն անդամահատում էր ընտանիքին և մարդկանց սիրտը կիսով ճեղքում:

Ճնշումները, կողոպուտները և կեղեքումներն սկսեցին շատանալ, անապահով վիճակ էր տիրում արևմտահայոց կեանքում: Հակառակ ստորագրւած դաշնագրերի և կատարւած խոստումների, աւելի սաստիկ ճնշումներ էին կատարւում: Բարեկարգումների խոստումը վերածւեց չարագործութիւնների, սպանութիւնների և սպանդի:

Շատերը թողնում և հեռանում էին, բայց ամէն տեղ նոյն սարսափը և նոյն արհաւիրքն էր տիրում: Ուրուշել էր արդէն հայերի բնաջնջումը և տարագրութիւնը: Յանկարծակի ձերբակալութիւններ էին կատարւում և անծանօթ ու անմարդաբնակ վայրերում սպանում էին բոլորին: Երիտասարդներն ահ ու սարսափի

մէջ թագնւում էին՝ իրենց կեանքը փրկելու համար, բայց ամէն տեղ որոնում և դտնում էին նրանց տաճիկ ոստիկանները, կարաւաններով տանում և վերջ դնում նրանց կեանքին: Ամենուրեք սարսափի մէջ էր հայ ժողովուրդը, մղձաւանջային պահն սկսել էր. աքսոր, տարագրութիւն և սպանութիւն:

Կողոպուտներին, կեղեքումներին և սպանութիւն-



Մի անաւոր սեսարան Մեծ Եղեռնի սպանդից:

ներին յաջորդեցին աքսորը և տարագրութիւնը: Ամէն մարդ պէտք է թողնէր իր տունը, ամբողջ ունեցւածքը և հետևէր տարագրութեան ճանապարհին: Մտնում էին տուն և այնտեղ գտնուողներին դուրս էին հանում: Գիմազրողին սպանում էին և սայլերով տանում, թափում փոսերի մէջ:

Տարագրութեան կարաւանը սկսել էր արդէն: Անօթի, ծարաւ, բզիկ-բզիկ եղած հագուստներով գնում էին հայերը: Աւելի ճիշտը տաճիկ ոստիկանները քշում էին

հայերին, մտրակելով բոլորին: Սրտաճմլիի անսարանները ո՛չ մի ազդեցութիւն չունէին բարբարոս ցեղի գազանացած ոստիկանների վրայ. անօթութիւնը և ծարաւը, մեռնող որբուկի ու մամիկի լացը ոչ մի գութ չէր ներշնչում: Ընդհակառակն, նրանք աւելի էին գայրանում և լացող մանկան խլում էին մօր զրկից և դէն շարտում: Կենդանիների սմբակից գոյացած փոքրիկ փոսերում լճացած կեղտոտ ջրով իր ծարաւը յագեցնելու համար գետին ծուռող մամիկին հարւածում էին, որպէսզի այնտեղ մնայ և ծարաւից չորանայ: Ոտաբորիկ, կարաւանին հետեւող խեղճ կանայք և մանուկներն անասելի չարչարանքների էին ենթարկւում. ո՛ւմ հոգն էր, թէ նրանց կրունկներն արիւնոտւում էին և ուռած ոտքերով կարելի չէր օրեր և օրեր քայլել: Ո՛ւմ հոգն էր, թէ նրանք ուժասպառ էին դարձել և արդէն իսկ կեանքի և մահւան միջև վերջին բուխներն էին ապրում: Պէ՛տք էր քայլել, պէ՛տք էր շարժւել կարաւանների հետ: Բայց դէպի ո՛ւր:

Այսպէս, անվերջ, գիւղերից, քաղաքներից տարագրւում էին հայերը, և կենդանի մնացողները քչւում էին դէպի անծանօթ ուղիներ: Դաշտի վայրի խոտերն իսկ զլացւում էին նրանց և բնութեան պարզեցած ջուրն իսկ իրաւունք չունէին խմելու: Պիտի քայլէին մահւան գրնով: Գնում էին լացով և մինչև երկինք բարձրացող ճիւղերով: Դեր Զօրը վերջին կայանն էր նրանց. այնտեղ, հսկայ անապատում, փոսերի մէջ, ողջ-ողջ թաղում էին հայերին: Անսիրտ և անգութ ոստիկաններն աննկարագրելի արարքներով սպանում էին բոլորին:

Աքսորի և տարագրութեան ճանապարհին հետեւող հայերի շրթներին վերադարձի երգեր չկային, լայնատարած լուութիւն, տխրութիւն և մահւան սպասում կար: Այլևս կորսւած էր ամէն ինչ, տուն-տեղ, ստացւածք և հարըստութիւն արդէն իսկ դարձել էին տաճիկների սեփական-

նութիւնը: Հայրենական տուն, ընտանեկան օջախ՝ հին պատմութիւն էր, ցրւում և տարագրւում էին նրանք: Եփրատի ափերին, որպէս վերջին կայան, լեցրել էին աքսորւածներին, որոնց ողջ-ողջ գետն էին թափում և կամ գլուխը մարմնից անջատելով, հազար-հազարների դիակը յանձնում էին ջրի յորձանքներին. օրերով արիւն էր հոսում Եփրատը: Աւագ և ջուր հայերի արեամբ էին ներկւում:

Կարաւաններին հետեւում էին որբահաւաք անձեր և դժւարին պայմաններում հաւաքում հայորբուկներին: Որբանոցները լեցւել էին արդէն, և որպէս վերջին մը-խիթարութիւն և որպէս մարդասիրական վերջին փորձ, աշխատում էին այլ երկրներ ուղարկել անհայր և անմայր երեխաներին: Բազմաթիւ ազնւասիրտ օտարականներ սիրով որբ էին հաւաքում և պատսպարում: Ամբողջ արեւմտահայութիւնը դարձել էր մամիկների և որբերի հաւաքականութիւն: Գթացող չկար, օգնող չկար: Դիւանագիտական առեւտուր էր կատարւում և բոլորի աչքի առաջ բնաջնջւում էր մի ամբողջ ժողովուրդ:

Տարագրութեան ճանապարհին մահւան սարսափն էր տիրում: Մտրակի հարւածները, սւիճների հարւածները սովորական դէպքեր էին դարձել: Անպաշտպան ժողովուրդը սրախողխող էր լինում և սպանւում: Այսպիսի ջարդ ու եղեռն չէր տեսել ամբողջ մարդկային պատմութիւնը: Յուսահատ, հաշտւած մահւան գաղափարի հետ, նախընտրում էին բուխ առաջ մեռնել և ազատւել անասելի չարչարանքներից: Երիտասարդ կոյսերին տմարդի ձեռով չարչարում, խոշտանգում և սպանում էին, երեխաներին ծառերից էին կախում և սպանում: Նրանց թիւը հասել էր արդէն մէկ միլիոնի: Չորանալիք և խաւար դառնալիք այս աշխարհում կարծես միայն հայն էր մեզաւոր:

Պանդուխտը գոնէ վերագարձի յոյսեր ունէր իր հոգում, տարագրւողն ու աքսորւողը ոչ միայն չէր մըտածում վերագարձի մասին, այլ և անապահով վիճակում հերթի էր սպասում, թէ ե՞րբ իր արիւնն էլ պիտի խառնուրի անապատի աւազին և կամ Եփրատի ջրերին:



Մեծ Եղնուր (խորհրդապատկեր)

Տարագրութեան ճանապարհը շարունակւում էր տակաւին երկրի սահմաններից էլ այն կողմ: Մէկ միւլիոն զոհերից յետոյ ողջ մնացողներին ցրում էին օտար աշխարհներ: Այս անգամ նաւերով փոխադրում էին նրանց, և տանում, տեղաւորում նոր հորիզոնների տակ: Դարձեալ քշւում էին հայերը: Վերագարձի ո՛չ մի խօսք, ո՛չ մի յոյս: Հիւրընկալ երկրները, ազգւած տեղի ունեցող պատահարներից, ընդունում և տեղ էին տալիս գաղթա-

կաններին: Որք ու անտէր ժողովուրդը տարագրութեան նոր ճանապարհի վրայ նոր երազներ էր հիւսում: Ողբալի կացութեան մէջ, ապաւինած իր ոյժին, իր բազկին, նոր կայքեր էր հաստատում: Տարագրւածների համար աշխատանքի նոր շրջան էր սկսւում:

Այլևս պարպւած էին երբեմնի հայաբնակ վայրերը: Բազմաթիւ քաղաքներն ու գիւղերը դարձել էին աւերակ, փարթամ տները գրաււած էին և ընչաքաղց մարդիկ նստել էին հայի սրբազան օջախների վրայ: Անապատներում կուտակւել էին անմեղ զոհերի դանկերը: Ողջ մնացողները յանձնւած ճակատագրի խաղերին, փոխադրւում էին՝ արցունքը աչքերին: Լացում և ողբում էր հայ սիրտը: Տարագրութիւններ, փոխադրութիւններ իրար էին յաջորդում:

Նոր հորիզոնների տակ, նոր երկրներում, նրանք տեսնում էին այլ մարդկանց ծիծաղները, խաղաղ ու անդորր կեանքը և ողբում իրենց խղճալի վիճակը: Ամէն ինչ կորցրել էին, բացի յոյսից: Եկել էին, իրենց հետ բերելով միայն բազկի ուժը, սեփական աշխատանքով նորը կերտելու կամքը: Ճանապարհին, կարծես սաղմոսերգուն իրենց հետ իր տաղն էր երգում.

Նրանք գնում էին լալով

և իրենց հետ սանում էին սերմեր,

նրանք պիտի վերադառնան ցնծալով

և իրենց հետ պիտի բերեն որաներ...

Լացով էր գնում ամբողջ գաղթական ժողովուրդը, հայրենիքի հողից խլւած, տարտղնւում էր հայ ժողովուրդը: Պապենական հողը վերջնականապէս բռնագրաււած էր, և իրենք դարձել էին նոր կայքերի բնակիչ: Ինչ որ դարերի ընթացքին կառուցւած էր որպէս Աստծոյ տուն, մշակոյթի տուն, նիւթական և բարոյական ամէն տեսակի հարստութիւններ, դանձեր, մնացել էին իրենց հայրենի-

քում: Բնաջնջումի անոեյի գաղափարը գազանային ձևով իրագործել էր արդէն և սպանել ժողովրդի մեծագոյն տոկոսին: Շէն ու բարգաւաճ քաղաքներն ու գիւղերը ամայացել էին և կատարւող բռնութեան ու տարագրութեան հետեանքով շիջել, քայքայել և մահացել էր ազգային կեանք բնորոշումով հասկացւած մեր հաւաքական կեանքը:

Աղէտը, եղեռնը և տարագրութիւնը լռութեան և մահւան սարսափ էին տարածել կենդանի մնացողների մէջ: Երբ անորոշ ուղիներով փոխադրում էին նրանց, բոլորը մահւան տեսիլք ունէին, որովհետև տարագրութեան ընթացքին տեսել էին իրենց հարազատների կոտորածը և արցունքոտ աչքերով, յուսահատ և սարսափահար, ականատես էին եղել ամայի վայրերում հազարների հրկիզումին, ողջ-ողջ թաղմանը, կամ տեսել էին աւազների վրայ բլրացած հազարաւոր դիակներ: Չէ՞ որ նրանք Նփրատի եզերքին մահւան դուռն էին հասել և այնտեղ տեսել, թէ ինչպէս ջրերը ներկւում էին իրենց եղբայրների և քոյրերի արեամբ: Չէ՞ որ նրանք սարսափի ու մահւան ճամբով քշւել էին և այլևս յուսահատ, հանդարտութեամբ և հեզութեամբ մահւան էին սպասել: Եւ հիմա, երէկի սարսափը իրենց հոգում, նրանք փոխադրւում էին այլ վայրեր: Իրենց հետ տանում էին նահատակների կենդանի սերմերը: Գնում էին լացով, կամքի և հաւատքի սերմերը իրենց հոգում: Գնում էին արցունքով, իրենց հետ տանելով վերածաղկումի և վերակենդանացման սերմերը, եւ վստահ էին իրենց ոյժին, աշխատանքին եւ յաղթանակին: Եւ բոլոր նրանք, որ գնացին արտասւելով, իրենց հետ կեանքի ու կենդանութեան սերմեր շալակած, այսօր արդէն տէ՛րն են որանների, արդարօրէն սպասում են վերադարձի, դարձեալ շէնացնելու համար իրենց աւերւած եւ քանդւած երկիրը:

Դարերի ընթացքում քանի-քանի անգամ տեղափոխութիւններ, գաղթեր և նոր հորիզոններ ճանաչեց հայ ժողովուրդը: Այս քանիերո՞րդ անգամն է, որ հեռանում էր պապենական երկրից, հօրենական օջախից և իր ետեւ թողնում ամբողջ մի աշխարհ, հայ ժողովրդի քրտինքով ու արիւնով շաղախւած: Տարիների աշխատանքով շինում էր, ճոխացնում էր և յետոյ հարկադրւում էր լքել և այլ վայրեր գաղթել ու այնտեղ սկսել նոյն աշխատանքը: Կեղեքումին ու ճնշումին հետևում էր բռնագաղթը: Տարագրութեան ճանապարհին գոհւում և տառապում էր հայ ժողովուրդը: Բայց կարծես, ամէն անգամ, շնորհիւ իր անընկճելի կամքի, լացով գնում էր, ուրախութեամբ նորը կառուցում և միշտ այն յոյսն ունէր, որ վրէժի փոխարէն պիտի կարողանայ ցնծալով վերադառնալ և իր հետ բերել որաներ:

Բայց 1915-ի Եղեռնին հետևող տարագրութիւնն աննախընթաց երևոյթ էր մեր ամբողջ պատմութեան ընթացքին: Նախկին գաղթերն ու տարագրութիւնները ինչքան էլ տառապալի և կսկծալի լինէին, այս աղէտը, սակայն, ամբողջութեամբ արեան ճանապարհ էր: Մահւան ճանապարհ էր: Չգիտենք թէ գնացողները բացի արցունքից և լացից իրենց հետ ի՞նչ էին տանում: Սերմեր ունէի՞ն արդեօք, արդեօք կարողացե՞լ էին եաթաղանից ընտանեկան յիշատակներ վերցնել, թէ ամէն ինչ մոխրացած և աւերւած էր: Վստահ ենք, թէ իրենց հետ տանում էին հայութեան սերմերը, կամքի և յոյսի սերմերը: Արտասւելով գնացին և ամէն տեղ աճեցրին հայութեան ամենից հարազատ սերմերը, կառուցեցին նո՛րը, կերտեցին աւելի՛ փառահեղը, ցանեցին ու մեծացրին, և հիմա հրճւանքով դիտում են յիսուն տարւայ արդիւնքը: Արդեօք, պիտի վերադառնա՞ն՝ որաներ շալակած:

Վստահ ենք, թէ տառապանքի ճանապարհով տար-

ւած սերմերը՝ որպէս ցաւի սերմեր, որպէս հայութեան ա-
 մենից առաքինի եւ զգայուն սերմերը, որպէս կամքի ու
 յոյսի սերմերը, մէկ խօսքով Ապրիլի 24-ը բարացուցող
 եւ բնորոշող սերմերը, տեւաբար պիտի մնան եւ նրանց
 միջոցով պիտի աճեն ու բարգաւաճեն ազգային ու մը-
 շակութային ամէն տեսակի գործերը: Եւ այդ սերմերը
 ծնունդ պիտի տան որաների, որոնք, վստահաբար, պիտի



լինեն դափնեպսակները նւաճումից նւաճում զնացող հայ
 ժողովրդի սքանչելի գաւակներին:

Այլեւս մահւան թափօրի տեղ յաղթական շքերթ
 կայ, լացի տեղ՝ ուրախութիւն, տարագրութեան եւ տա-
 ոապանքի տեղ՝ նւաճում եւ ուրախութիւն:

Յնձութեամբ եւ ուրախութեամբ քայլենք մինչեւ
 մեր յոյսերի իրականացումը:

Հ Ա Տ Ո Ւ Ց Ո Ւ Մ

Օրհնեալ է փայտն՝ որով լինի
 արդարութիւն:

(ԻՄԱՍ. ԺԳ. 7)

Հ Ա Տ Ո Ւ Ց Ո Ւ Մ

Ընդհանրացած և տարածւած բմբռնում է, որ երբ որեւիցէ անձնաւորութիւն վնաս պատճառի մէկ ուրիշի և մի օր էլ նրա հետ հաշւեյարդարի նստի, պիտի մտածի գոնէ նւագագոյն չափով հատուցանել կատարւած անարդարութիւնը: Տարածւած իրողութիւն է նաեւ, որ երբ իրաւունքի խնդիր կայ և փոխադարձ գիջում չի կայանում, կողմերից ուժեղն է, որ դառնում է իրաւատէր: Այլ բացատրութեամբ, իրաւունքը յափշտակւում է տկարի ձեռքից: Անհատական և հաւաքական կեանքում ա՛յս է իրականութիւնը:

Սակայն, ազգերի յարաբերական կեանքում բոլորովին տարբեր է հատուցումի պարագան: Պատմութիւնից գիտենք, թէ ընդարձակածաւալ կայսրութիւններն ու իշխանութիւնները հիմնւում են ուժեղ աշխարհակալների շնորհիւ: Իշխանութեան գլուխը գտնւող անձը արշաւում է իր բանակներով, պատերազմ է տեղի ունենում և դրանից յետոյ յաղթող կողմը դառնում է նւաճւած երկրի տէրը, այնտեղ նշանակում է մի կառավարիչ, թողնում է մնայուն բանակ, և այսպիսով պարտւած կողմը դառնում է հպատակ, հարկատու և ենթակայ յաղթող

կողմին: Այսպէս շարունակուում է երկրի գոյավիճակը, մինչեւ որ պարտւած կողմը կարողանայ իր ուժերը հաւաքել, ապստամբել և իր ազատութիւնը ձեռք բերելով, ազատ ու անկախ իշխանութիւն հռչակել:

Պատմութիւնից գիտենք նաեւ, որ դարերի ընթացքում որքան մեծ փոփոխութիւնների ենթարկւեց աշխարհի քարտէզը: Որքան իշխաններ եկան, հսկայական կայսրութիւններ հաստատեցին և հետագային նւաճւած ազգերը դարձեալ կարողացան իրենց իրաւունքներին տէր կանգնելով՝ ազգային ինքնուրոյն պետութիւն հաստատել:

Վերջին շրջանի պատմութիւնից և անց ու դարձերից գիտենք նաեւ, թէ մեծ պետութիւնները զաղութային իշխանութիւններ հիմնեցին և բազմաթիւ երկրներ նրանց հովանաւորութեան ներքոյ մնացին տարիներ շարունակ: զաղութային վիճակում: Մի պայծառ օր էլ իրաւունք տւեցին, ազատութիւն տւեցին, որ այդ երկրների բնակիչները դուրս գան ենթակայ վիճակից, ունենան իրենց անկախ պետութիւնը, բանակը, դրօշը և իրենք էլ ուրիշ պետութիւնների պէս դիւանագիտական և կամ այլ յարաբերութիւններ ստեղծեն իրենց հարեւանների հետ: Բոլորին ծանօթ է, որ վերջին տարիներում բազմաթիւ ազգեր ազատագրւեցին գերեզմարեալ վիճակից եւ կազմեցին առանձին պետութիւններ: Եւ այս երեւոյթը շարունակուում է եւ մենք լսում ենք նորանոր պետութիւնների կազմութեան մասին:


Մեր խօսքը մասնաւորելով Օսմանեան կայսրութեան շուրջ, պատմութիւնից գիտենք, թէ երբ նա թուլութեան եւ տկարութեան նշաններ ցոյց տւեց, գերեզմարւած ազգերը մեծ պետութիւնների օժանդակութեամբ տիրացան իրենց սեփական երկրի իշխանութեանը եւ կազմեցին անկախ պետութիւններ: Այսպէս եղաւ պարս-

գան Բալկանեան ազգերի, յոյների և այլոց համար: Նրանք գերագոյն զոհողութիւններով ձերբազատւեցին թրքական տիրապետութիւնից եւ հիմնեցին ազատ ու անկախ պետութիւններ: Այդ շրջանին սկսւեց նաեւ Արեւելեան հարցը, որի մէջ մասնաւորաբար մեզ համար նշանակութիւն ստացաւ Հայկական Դատը եւ մինչեւ այսօր էլ, անշուշտ ո՛չ նախկին շրջանների ուժգնութեամբ, շարունակուում է, իր արդար լուծումն ստանալու համար:

Այդ շրջաններում, ի հետեւումն կատարւած հետապնդումների եւ աշխատանքների, ստորագրւեցին դաշնագրեր, յօդւածներ նախատեսւեցին հայ ժողովրդի կեանքի ապահովութեան, հայկական բարենորոգումների եւ մինչեւ իսկ ներքին ինքնավարութեան մասին: «Երկաթէ շերեփ» ունեցողը դուրս էր գալիս ստրուկի, հպատակի վիճակից եւ դառնում էր ինքնիշխան: Դժբախտաբար, այդ օրերին, երբ մեծ յոյսեր էինք կապել մեծ ազգերի դիւանագիտական ներկայացուցիչներին, տեղի ունեցան 1895 թւի ջարդերը եւ 1915 թւի Եղեռնը: Այն բոլոր քաղաքները, որոնց մեծամասնութիւնն էին կազմում հայերը, նախատեսւած եւ պատրաստւած ծրագրի համաձայն, անմարդկային ճնշումների ենթարկւեցին եւ տեղի ունեցան ջարդեր ու տեղահանութիւններ: Տաճիկ իշխանութեան միակ նպատակն էր հայ ազգը բնաջնջել, եւ մէկ անգամ ընդմիշտ փակել հայկական հարցը:

Արհաւիրքի այդ օրերին հիմնւեց նաեւ հայկական պետութիւն: Հայաստանն ազատ ու անկախ հռչակւեց, բայց ոչ անշուշտ իր պատմական հողերի ամբողջական տարածութեան վրայ: Այնուհետեւ Հայաստանը դարձաւ խորհրդային պետութիւն: Ուխլանեան ծրագրով նախատեսւած Հայաստանի տարածութիւնը մնաց երազ ու տեսիլ եւ այդ ուղղութեամբ կատարւած աշխատանքները որոշ արդիւնքի չհասան: Մայր հայրենիքից մինչեւ հե-

ուսուր գաղութների փոքրաթիւ հայութիւնն անձկանօք սպասուում է մայր երկրից պոկւած և ուրիշ հողամասերի միացւած հողերի վերամիացման, իր գերազոյն ուրախութիւնն ու երջանկութիւնն ապրելու համար: Թափւած արիւնը, մղւած մարտերը, կատարւած նահատակութիւնները և մասնաւորաբար մէկ միլիոն անմեղ զոհերը իրենց արդիւնաւորումը կարող են ստանալ այն ժամա-



Կոթող լադրանակի (խորհրդապատկեր).

նակ, երբ իրագործւեն նրանց ապրումն ու տեսիլը: Եւ վստահաբար, այդ էլ պիտի լինի արդարագոյն հատուցումը:

Յիսնամեակի այս օրերին ամենից աւելի տաք շնչով, եռանդով ու ջերմութեամբ խօսուում ենք կատարւելիք հատուցման մասին: Ոսուում ու գրում ենք, թըրթըռացնելով մեր ազգային ապրումների ամենից աւելի նրբագոյն թելերը, սպասուում ենք վարդահեղեղ արշալոյ-

նին, գարնանային վառ ապրումներ և երջանիկ պահեր ունենալու համար: Երկար տարիներ ազատագրական շարժումներով հետապնդել ենք գերազոյն նպատակ, վազել ենք տեսիլի ետեւից, ընթացել ենք երազների ճանապարհով և այսօր էլ նոյն իղձերով տոգորւած, պահանջում ենք իրաւո՛ւնք և հատուցո՛ւմ:

Բայց ի՞նչ է այս օրերի շոր իրականութիւնը:

Հայաստանը մայր կորիզն է հայութեան, և այնտեղ հաստատւած է խորհրդային պետութիւն: Թրքահայաստանի այն վայրերը, որոնք պատմականօրէն մեր սեփականութիւնն են եղել, պարպւած են հայութիւնից, համարեա թէ աւերւած են բոլոր քաղաքները, տիրող իշխանութիւնն անխնամ վիճակում է թողել պատմական յուշարձաններն ու կոթողները և մասնաւորաբար վանքերն ու եկեղեցիները: Արտասահմանում ծնւած ու մեծացած ներկայ հայ սերունդը գաղափար էլ չունի իր պապերի ծընընդավայրի մասին և երբե՛ք այն ապրումն ու զգացումը չունի, ինչ որ ունեն իր ծնողները, երբ Կիլիկիայի և կամ այլ վայրերի մասին է խօսուում:

Երբեմնի տարագիր և գաղթական հայերը արտասահմանի բազմաթիւ երկրներում ցրւելով, նախ և առաջ այդ երկրների քաղաքացին են դարձել, դարձել են կրօնական փոքրամասնութիւններ, կրօնական համայնքներ և այդ կերպով էլ կազմակերպել են իրենց ազգային-մըշակութային կեանքը: Սակայն, ամէն տեղ հայեցի շունչով լեցւած, հայրենասիրութեան սրբազան զգացումով հաղորդւած, իրաւատէրի հանգամանքում, միշտ պատնէշի վրայ հատուցում են պահանջում:

Կարելիութեան սահմաններում արդարացիօրէն հետապնդում ենք մեր դատը: Հետապնդում ենք, երբ մեր գրպանում ունենք մեր պատկանած երկրի քաղաքացիական թուղթը, և բոլորի սրտում հայութեան շունչն ու

հոգին, անշէջ կրակը մեր սրբազան գաղափարների: Այդ շունչի, կրակի և հոգու համար բազմահազար նահատակներ ենք տուել, և մէկ միլիոն նահատակներն էլ նոյն սրբազան գաղափարի զոհերն են:

Տակաւին, որպէս հողային հատուցման խնդիր, ունենք նաեւ «ներքին սահմանների ընդարձակում» բանաձեւի տակ ներկայացող դատը: Այսինքն, այն վայրերը, որոնք մերն էին և այժմ անցել են խորհրդային այլ պետութիւնների հողային սահմանների մէջ և ուր հայերը մեծամասնութիւն են կազմում:

Առհասարակ, վերոյիշեալ չոր իրականութիւնների ու պայմանների մէջ ենք հետապնդում մեր դատը, ըստ պատելով արդարութեան արեգակի բերկրալի ճառագայթներին:

Այս օրերին, մասնաւորաբար, ակնդէտ սպասում ենք, թէ ի՞նչ կերպարանք պիտի ստանայ հայկական դատը, ի՞նչպէս պիտի ձեւաւորւի հատուցման խնդիրը, ժամանակին Սրբիմեան Հայրիկը թղթէ շերեփի փոխարէն երկաթեայ շերեփ էր առաջարկում, որն այս օրերին այլեւս հին օրերի ուժգնութիւնն ու տարողութիւնը չունի...

Տակաւին չմոռանանք, որ դիւանագիտական կեանքն էլ ինչպիսի՜ փոփոխութիւններ կրեց և մեր հարցին տեղեակ անձերը դարձան յիշատակներ: Դեռ չենք անդրադառնում մեր ներքին կեանքի, միահամուռ ճիգերով աշխատելու, բանաձեւելու և պատշաճ ձեւով դիմումներ կատարելու մասին:

Ժամանակին միջազգային կեանքում գոյութիւն ունէր նաև հայ ազգը: Երբ Արեւելեան հարցն էր արծարծւում, դիւանագիտական ներկայացուցիչները խօսում և վիճում էին նաեւ հայկական հարցի և բարենդումների մասին: Տենդոտ աշխատանք էր տարւում եւ

հայկական պատւիրակութիւնները յուշագրերով միշտ արթուն վիճակի մէջ էին պահում հայկական դատը: Այժմ, միջազգային իրադարձութիւնների մէջ համարեա թէ գոյութիւն չունի հայկական դատը, կարծես մեծ պետութիւնների կողմից անտեսւած է այն: Նուրբ գոյավիճակ է տիրում և հարցը բարդ կողմերով է ներկայանում: Բէյրութի «Լօրիան» թերթի խմբագիրը շատ իրաւամբ նկատի ունենալով այս օրերին կատարւող շարժումը, հետեւեալ բնորոշումը տւեց.

«Հայկական հարցն ուզում է արթնանալ»:

Այս օրերի քաղաքական ներկայացուցիչները եւ մանաւանդ դիւանագիտական ներկայացուցիչները Միացեալ Ազգերի Կազմակերպութեան մէջ, չգիտենք թէ ինչքան գաղափար ունեն հայկական հարցի մասին: Յարատեւ եւ յարաճուն աշխատանքներ, մամուլի և հրատարակութեանց միջոցով կենդանի և արթուն կապ չստեղծեցին մեր եւ նրանց միջեւ: Յաճախակի առիթներով կարելի չեղաւ վերարժարծել հայկական հարցը: Տարւող աշխատանքներն էլ դժւարութիւնների բախւեցին, և այսպիսով, աստիճանաբար, իր բովանդակութիւնից և ուժգնութիւնից զգալիօրէն պարպւեց, և ինչո՞ւ չէ, նաեւ քրնեց հայկական խնդիրը:

Այժմ շատերի համար նշանակութիւն էլ չունի փոքրաթիւ հայ ժողովրդի վիճակն ու հարցը և հո՞ թւով բարեմիտների համար հեքիաթի կերպարանք ունի կատարւած Եղեռնը, մէկ միլիոն հայերի նահատակութիւնը:

Հայ մամուլում, բաւական ժամանակ է, որ արծարծւում է հայկական խնդիրը և բազմաթիւ յօդւածներ, ուսումնասիրութիւններ իրար են հրմշտկում: Ամէն հայ այն յոյսն ունի, թէ մի օր բոլոր կոչերն ու առաջարկները կը բիւրեղանան, և պատասխանատու անձինք, հայութեան պահանջների համաձայն, պատշաճ ձեւով կը

կատարեն իրենց վստահած աշխատանքը: Կարծիք յայտանելը բոլորի իրաւունքն է, բայց աշխատել և զիմուհներ անելը ձեռնհաս և այդ գործի համար պաշտօնի կոչւած մարդկանց գործն է: Բանաստեղծութիւնները, յօդւածներն և ուսումնասիրութիւններն այն առաւելութիւնն ունեն, որ գէթ արթուն վիճակում են պահում հայ զանգուածին ի սփիւռս աշխարհի և յաճախակի առիթներով յիշեցնում են մեր իրաւունքը: Ինչքա՛ն մխիթարական եւ շատ աւելի գործնական պիտի լինէր եթէ օտար մամուլում եւս յարմարագոյն առիթներով արծարծէր հայկական խնդիրը և միջազգային իրադարձութեան մէջ արթուն վիճակում մնար:

Երբ խօսում ենք հատուցման մասին և իմանում ենք թէ ո՛ւմից ենք հատուցում պահանջում, արդարացիօրէն մտորում ենք նաեւ, թէ արդեօք նա՛ ի՞նչ է մտածում: Մենք խօսում ենք մեր առնելիքի և ստանալիքի մասին, բայց ի՞նչ է ասում նա՛ իր տալիքի մասին: Արհաւիրքի օրերին նա իր հարցը փակեց ջարդելով և տարագրելով: Այնուհետեւ, երբ որ խօսեց հայկական ջարդերի մասին, նա այդ վերագրեց հայ ժողովրդի ապստամբութեան, թէ հայերը յաճախակի ապստամբութիւններով անհանդարտ վիճակ էին ստեղծել և այդ պատճառով էլ տեղի ունեցան նաեւ սպանութիւններ: Զգիտենք նաեւ, թէ մինչեւ այսօր ուղղակի հաշւեյարդարի նստեցի՞նք մեր պարտատէրի հետ, պահանջողի դերի մէջ մտա՞նք, թէ միջնորդ դերակատարի դիմեցի՞նք միայն:

Հետեւաբար, մեր պարտատէրը ո՛չ միայն հատուցանելու մասին չի մտածում, այլ եղածների մեղքն էլ բարդում է հայ ժողովրդի վրայ: Կատարւածի համար ո՛չ միայն չեն ցաւում, այլ մոռացութեան տալուց յետոյ մինչեւ իսկ աշխատում են ուրանալ: Գիտենք, որ երբ պատահական այցելուներ հիանում են Անիի և կամ պատ-

մական այլ վայրերի ճարտարապետական յուշարձանների ու կոթողների վրայ, ինչպիսի՛ յուշագրութիւններ են գրում, և մանաւանդ ինչպիսի՛ պատասխաններ են լսում տեղացի ժողովրդի կողմից, երբ հարցնում են, թէ ո՞վքեր են շինել և ապրել այնտեղ:

Բայց ամենից սարսափելին և ամենից թարմագոյնը, որին արձագանգ հանդիսացան վերջերս բոլոր հայ օրաթերթերը, ՄԱԿում պատահած Կիպրոսի արտաքին գործոց նախարարի պոռթկումն էր և հայկական ջարդերի արծարծումի առթիւ իր հակառակորդի կատարած ուրացումն էր: Կիպրոսի ներկայացուցիչը յիշեցնում է հայ ժողովրդի նկատմամբ կատարւած ցեղասպանութիւնը, իսկ իր հակառակորդը գարտուղի ճանապարհով փորձում է խուսափել և յայտնել թէ նման ջարդեր գոյութիւն չեն ունեցել:

Երբ մեր ներքին կեանքում մեզ համար վերածարձում ենք հայկական խնդիրը և հատուցում ենք պահանջում, մեր դիմաց միջազգային կեանքում մեր հողը բռնագրաւողը իր աշխատանքով կարողանում է հողերի պահանջը յետ մղել տալ և կամ կատարւած ջարդերը վերագրել որպէս հետեւանք տեղի ունեցած ապստամբութիւնների:

Ահաւասիկ, այսպիսի դառն իրականութիւնների առաջ կանգնած, խօսում և գրում և մանաւանդ աշխատում ենք հատուցման մասին:

Ցաւալի պատահարների ուրացումն է կատարւում, և մենք մեր իրաւունքը պաշտպանելու համար տկար ենք գտնւում: Մեր բախտից էլ, պայմաններն ի նպաստ մեզ չեն ներկայանում և տարիներից ի վեր՝ կանգնել, մնացել ենք նոյն տեղում:

Մեր ուժերը ճիւղաւորւում են, մեր աշխատանքները բարդանում, յանձնախմբերը շտտանում և նոյն

նպատակին հասնելու համար ճանապարհները տարբեր-
ւում են:

Բայց ինչ էլ լինեն պայմանները, ինչ կացութիւն
էլ տիրի, առանց իսկ նկատի ունենալու տարիների թա-
ւալումը, ազգովին հատուցում ենք պահանջում:

Հատուցում բռնազրաւած հողերի համար, հատու-
ցում մէկ միլիոն նահատակների համար, հատուցում յա-
փըշտակած հարստութիւնների համար, հատուցում կա-
տարւած աւերածութիւնների համար: Մէկ խօսքով՝ հա-
տուցում կատարւած անլուր ցեղասպանութեան համար:

Մեր նպատակի համար ծով արիւն ենք թափել,
սպասել ենք երկար տարիներ, և այսօր, տակաւին, մեր
աչքի առաջ եռում և պղպղում է մեր նահատակների ար-
իւնը: Զոհեածների արիւնը պիտի շարունակի պղպղալ
մինչեւ այն ժամանակ, երբ ամբողջական բաւարարու-
թիւն և հատուցում ստանանք:

Նման վիճակի հասնելու համար անհրաժեշտ է ի-
րաւագրկւած վիճակից դուրս գալ, բարձրանալ, հսկայա-
նալ և Արարատի բարձունքից համայն մարդկութեան ա-
ռաջ գոչել, կանչել, աղաղակել՝ ներեցինք քեզ, ո՛վ ցեղ
բարբարոս:

Նախ հատուցում, յետոյ ներում: Օրհնեալ է այն
ճանապարհը, որով կը լինի արդարութիւն:

ԲՈՎԱՆԴԱԿՈՒԹԻՒՆ

	Էջ
1.— Երկու խօսք	7
2.— Ապրիլեան քնար	11
3.— Ուրագծային պատմութիւն	17
4.— Ապրիլ 24	29
5.— Վասն հայրենեաց և Վասն կրօնի ազատութեան	39
6.— Հայ ժողովրդի կորուստը Ապրիլեան Եղեռնին	49
7.— Հայց. Եկեղեցու կորուստը Ապրիլեան Եղեռնին	59
8.— Հայ մշտութեան կորուստը Ապրիլեան Եղեռնին	69
9.— Չմոռանա՛նք	81
10.— Սպասում	95
11.— Տարագրութիւն	109
12.— Հետուցում	121



ՆՈՅՆ ՀԵՂԻՆԱԿԻՑ

ԽՕՍՔ ԺՈՂՈՎՐԴԻՆ, 1961, Քեհրան. (սպառուած)

Ա.Ի.ԵՏԱՐԱՆԻ ՇՈՒՆՉՈՎ, 1962, Քեհրան. (սպառուած)

**ՀԱ.ԻԱՏՔԻ ՀԱՐՑԸ ԱՐԴԻ ԸՆԿԵՐՈՒՔԵԱՆ ՄԷՋ, 1963, Քեհրան.
(սպառուած)**